

O LE EKALLESIA A IESU KERISO O LE AU PAIA O ASO E GATA AI • TESEMA 2011

O Le Liahona



**O Le Meaalofa a le Faaola
o le Filemu ma le Olioli, i. 18**

**Ulufafo mai le Puao ma ulu atu
i Lona Malamalama, i. 42**

**O Le Auala na Fesoasoani ai Nifae
ia te A'u ma Lo'u Tama, i. 56**

**O Mea e Manatua e Sister Uchtdorf
i le Kerisimasi, i. 66**



O Le Soifua Mai o Keriso, saunia e Phyllis Luch

Tatou te aoaoina i le Mataio 2:9–11 na avatu e le Au Makoi ni meaalofa ia Iesu Keriso ao tama itiiti o Ia, ma na taitaiina i latou e se fetu fou lea na iloa i Lona fanau mai.

“O le fetu, na iloa e i latou [le Au Makoi] i sasae, ua mua-mua atu ia te i latou, ua oo ina tu mai i luga o le mea ua i ai le tama itiiti.

“Ua latou iloa le fetu, ona matua tele ai lea o lo latou fiafia.

“Ua latou ulufale atu i le fale, ua latou iloa ai le tama itiiti ma Maria lona tina, ona latou faapauu ai lea, ma ifo atu ia te ia: ua talai foi a latou oloa, ona latou avatu ai lea ia te ia o meaalofa; o le auro, ma le pulu lipano, ma le pulu muro.”

SAVALI

- 4 Savali a le Au Peresitene Sili: O Le Filifiliga ina la Maua le Agaga Faafetai**
Saunia e Peresitene Henry B. Eyring
- 7 Savali a Faiaoga Asiasi: O Se Lalolagi Lautele o Faatinoga**

TALA FAAALIA

- 18 O Le Filemu ma le Olioli i le Iloa o loo Soifua le Faaola**
Saunia e Elder Russell M. Nelson
E alofa le Alo paia o le Atua soifua ia te outou, siitia outou, ma faaali atu o Ia Lava ia te outou pe a outou alolofa atu ia te Ia ma tausi i Ana poloaiga
- 24 O Le Auala i le Malumalu**
Saunia e Chad E. Phares
E ui ina sa latou faimalaga i ala eseese, ae ua iloa e le Au Paia o Aso e Gata Ai i Iukureini o auala amiotonu uma lava e taitaiina atu ai i le malumalu.
- 28 O Le Ki i Avanoa: Faamanatua ina o le 10 Tausaga o le Tupe Faaagaga mo Aoga**
Saunia e Rebekah Atkin
Na faasilasila mai i le 2001, ua faamanuiaina e le Tupe Faaagaga mo Aoga ia olaga o le faitau afe o tagata o le Ekalesia.

- 34 Leiloa ma toe Maua**
Saunia e Adam C. Olson
O le auala na faafesootai ai e se tasi o ulugalii ni faaiuga i aso taitasi ma se vaaiga i lo laua taunuuga e faavavau.

MATAGALUEGA

- 8 O Mea Laiti ma Faatauva**
- 11 O Tatou Aiga, O Tatou Auaiga: Pa'ulua ae e Tautonu Lava**
Saunia e JaNeal B. Freeman


I LE FAAVAA

Luma: ata na tusia e Matthew Reier. Tua: *O Le Fanau mai o Iesu*, saunia e Carl Heinrich Bloch, ua faaoga ina ua faatagaina e le National Historic Museum i Frederiksborg i Hillerød, Tenimaka

- 12 Auaunaga i le Ekalesia: O La'u Auaunaga o se Tagata Nofofua o le Ekalesia**
Saunia e Julie Burdett
- 14 Tatou te Talanoa ia Keriso: O Se Tali mo Soo Se "Pe Faapefea Pe Afai?"**
Saunia e Michael D. Woodbury
- 16 Tala Faamamai o le Talalelei: O Lesona mai le Matai**
Saunia e Elder Marvin J. Ashton
- 38 O Leo o le Au Paia o Aso e Gata Ai**
- 74 Tala Fou o le Ekalesia**
- 79 Manatu mo Afiafi Faaleaiga**
- 80 Seia Tatou Toe Feiloai: O Le Malamalama o le Alo**
Saunia e Jeff S. McIntosh

Malumalu o Kyiv Ukraine 24





42

42 Sa Latou Saunoa Mai ia i Matou: O Mai, Tatou Vivii ia te la

Saunia e Elder Patrick Kearon



Vaai pe mafai ona e mauaina le Liahona o loo natia i le lomiga lenei. Faaitete: o se meaalofo o loo i lalo o le laau.

46 Fesili ma Tali

Pe mafai faapefea ona ou tau-sisia se uiga faaalua lelei e uiga i le lumanai?

48 Pepa Lautele o I Ai se Savali: E Le o Tuua Na o Outou

49 O Le Auala Na Ou Iloa Ai: Sa Liligi Mai e le Alii Faamanuiaga

Saunia e Kim Koung

50 O Se Molimau Mautinoa

Saunia e Elder Carl B. Pratt

Pe o faatatau ea le folafolaga a Moronae ia te oe?

52 O Le Faailoga Lenei ia te Outou

Saunia e Whitney Hinckley

O le auala na faataunuu ai faavavega ia valoaga o le fanau mai o Iesu Keriso.

55 O Meaalofa na Mafaufauina

O faauigaga o le auro, pulu lipano, ma le pulu muro lea na tuuina atu i le tama itiiti o Keriso.


56 O Latou E Tatau Ona Sui

Saunia e Francisco Javier

Lara Hernández

58 Feiloai ia Uso Iosefa

O ni nai mea nei atonu tou te le o iloa e uiga i le Perofeta o Iosefa Samita.



72

59 Molimau Faapitoa: Pe Mafai Faapefea Ona Ou Mulimuli i le Faola?

Saunia e Elder Quentin L. Cook

60 O Na Upu

Saunia e Angie Bergstrom Miller

O le a se mea e mafai ona fai e Shelby ina ua ia faalogo o palalauwale ana uo?

62 O La Tatou Itulau

63 Kata o Malumalu

64 Aumaia o le Peraimeri i le Fale: Ua Aoao Mai e Tusitusiga Paia ia te Au e uiga i le Soifua Mai ma le Afio Mai Faalua o le Faola

Saunia e Jennifer Maddy

66 O Le Laau Kerisimasi

Saunia e Harriet R. Uchtdorf

O mea ou te manatu i le Kerisimasi mai aso a o ou laitiiti i Siamani.

68 Tupe o La'u Misiona

Saunia e Spencer S.

E mafai ona e amata sefeina mo lau misiona i le taimi nei.

69 O Mataupu Faavae o le Faatuatua

O o tatou talitonuga autu e sefulutolu.

70 Mo Tamaiti Laiti

50

O Le Lomiga Faamaonia Faa-Samoa a le Ekalesia a Iesu Keriso o le Au Paia o Aso e Gata Ai

Susuga a le Au Peresitene Sili: Thomas S. Monson, Henry B. Eyring, Dieter F. Uchtdorf

O Le Korama a Aposetolo e Toasefululua: Boyd K. Packer, L. Tom Perry, Russell M. Nelson, Dallin H. Oaks, M. Russell Ballard, Richard G. Scott, Robert D. Hales, Jeffrey R. Holland, David A. Bednar, Quentin L. Cook, D. Todd Christofferson, Neil L. Andersen

Faatonu: Paul B. Pieper

Fautua: Keith R. Edwards, Christoffel Golden Jr., Per G. Malm

Pule Faatonusili: David L. Frischknecht

Faatonusili e Fuafuaina ma Faatonutonu:

Vincent A. Vaughn

Faatonu o Karafi: Allan R. Loyborg

Pule Faatonutonu: R. Val Johnson

Pule Faatonutonu Lagologo: Jennifer L. Greenwood, Adam C. Olson

Au Faatonu Fesoasoani: Susan Barrett, Ryan Carr
Aufaigaluega Faatonutonu: Brittany Beattie, David A. Edwards, Matthew D. Flitton, LaRene Porter Gaunt, Carrie Kasten, Jennifer Maddy, Lia McClanahan, Melissa Merrill, Michael R. Morris, Sally J. Odekirik, Joshua J. Perkey, Chad E. Phares, Jan Pinborough, Paul VanDenBerghe, Marissa A. Widdison, Melissa Zenteno

Pule Faatonusili o Faatufugaga: J. Scott Knudsen

Faatonusili Tusiata: Scott Van Kampen

Pule i le Gaosiga: Jane Ann Peters

Au Mamanu Sinia: C. Kimball Bott, Thomas S. Child, Colleen Hinckley, Eric P. Johnsen, Scott M. Mooy

Aufaigaluega e Mamanuina ma Gaosia: Collette Nebeker Aune, Howard G. Brown, Julie Burdett, Reginald J. Christensen, Kim Fenstermaker, Kathleen Howard, Denise Kirby, Ginny J. Nilson

Tailolomi: Jeff L. Martin

Faatonusili Lolomiga: Craig K. Sedgwick

Faatonusili o le Tufatufaga: Evan Larsen

Mo O le okaina o mekasini, alu i le store.lds.org po o le Falefusi Tutotonu i Pesega. Telefoni 64127. Totogi o le Mekasini: \$0.55 (Samoa) i le kopi. Totogi mo le Tausaga Atoa \$6.60 (Samoa).

Auina atu tusitusiga ma faafesili i luga o le initoneti i le liahona.lds.org: pe meli mai i le Liahona, Rm. 2420, 50 E. North Temple, Salt Lake City, UT 84150-0024, USA; po o le i-meli: liahona@ldschurch.org.

O Le Liahona (o lona uiga i le Tusi a Mamona o le "tapasa" po o se "faatonu" e lomia i le faa-Alepania, Aminia (Sasae), Pisilama, Palekeria, Kemupotia, Sepuano, Saina, Kalaotia, Siekislovakia, Tenimaka, Take, Iglisi, Esitonia, Fiti, Finelani, Farani, Siamani, Eleni, Hanikeri, Initu, Iselani, Initonesia, Italia, Iapani, Kiripati, Korea, Lativia, Litunia, Malakasa, Masela, Monokolia, Nouei, Polani, Potukale, Romania, Rusia, Samoa, Silovenia, Sipaniolo, Suetena, Tagaloka, Tahiti, Tai, Toga, Iukureini, ma Urutu, ma Viatenama. (E eseese lava gagana.)

© 2011 Puletaofia e le Intellectual Reserve, Inc. Ua taofia aia tatau uma. Lomia i le lunaite Setete o Amerika.

E mafai ona kopi tala ma ata o le Liahona mo le toe faaagaina i lotu po o le aiga ae ia le faia ai ni pisinisi. E le tatau ona kopi ni tala po o ni ata pe afai o faasa mai i le laina o loo ta'ua ai le e ona lea faatufugaga. Auina atu fesili e uiga i le puletaofia i le Intellectual Property Office, 50 East North Temple Street, Salt Lake City, UT 84150, USA; i-meli: cor-intellectualproperty@ldschurch.org.

For Readers in the United States and Canada:

December 2011 Vol. 35 No. 12. O LE LIAHONA (USPS 311) Samoan (ISSN 1045-0947) is published monthly by The Church of Jesus Christ of Latter-day Saints, 50 East North Temple, Salt Lake City, UT 84150. USA subscription price is \$10.00 per year; Canada, \$12.00 plus applicable taxes. Periodicals Postage Paid at Salt Lake City, Utah. Sixty days' notice required for change of address. Include address label from a recent issue; old and new address must be included. Send USA and Canadian subscriptions to Salt Lake Distribution Center at address below. Subscription help line: 1-800-537-5971. Credit card orders (Visa, MasterCard, American Express) may be taken by phone. (Canada Poste Information: Publication Agreement #40017431)

POSTMASTER: Send address changes to Salt Lake Distribution Center, Church Magazines, PO Box 26368, Salt Lake City, UT 84126-0368.

Faaopoopoga o loo maua i le Initoneti

Liahona.lds.org



MO TAGATA MATUTUA

Ua faatupulaia le **Teugatupe Faaagaga mo Aoga** talu mai le faasalalaua a Peresitene Gordon B. Hinckley i le 10 tausaga ua mavae atu (tagai i le itulau e 28). Ina ia faitauina nisi o tala faamanu-iaina, aoao i le auala e maua ai se nono-gatupe o le TFA, po o le saofaga atu foi i le teugatupe, asiasi i le pef.lds.org.

MO LE AUTALAVOU

Faitau i le auala na faamalosa ai e le Malumalu o Kyiv Ukraine ia aiga (tagai i le itulau e 24) ma maimoa i le auala na faamalolosa ai molimau a talavou na aafia i le **faafiafiaga faaleaganuu a le autalavou** lea na faataunuaina a o lumanai le faapaia o le malumalu. Maimoa i le vitio musuia i le youth.lds.org (saili mo le "Kyiv Ukraine Temple").

MO TAMAITI

Ia fiafia i tala o le Kerisimasi o loo i itulau e 64, 66, ma le 70. Ona **maimoa lea i se vitio o le uluai Kerisimasi e faatatau i le Luka 2**. Asiasi i le lds.org/new-testament-videos.

AUTU I LENEI LOMIGA

E ta'u mai e numera le itulau muamua o le tusiga.

- Agaga Paia**, 50
- Aiga**, 11, 34, 56
- Amio po o uiga faaalai**, 46
- Aoao atu**, 11, 16
- Aooga**, 28
- Aualofa**, 7
- Auauna atu**, 4, 7, 12, 28, 38, 39, 40, 41, 68
- Faamalologa**, 14
- Faamanuiga**, 4
- Faamoemoe**, 42, 46
- Faaitaiga**, 7, 11, 60
- Faatoagaina**, 34
- Faatuatua**, 69
- Galuega faafaifeu-talai**, 39, 49, 50, 56, 68
- Galuega faalemalu-malu**, 24, 69
- Iesu Keriso**, 4, 14,
- 16, 18, 42, 48, 52, 55, 59, 64, 70, 80
- Kerisimasi**, 4, 9, 12, 18, 38, 39, 40, 41, 42, 52, 55, 66, 70, 72, 73
- Lauga**, 60
- Liua**, 49, 50, 56
- Lotofaafetai**, 4
- Molimau**, 50
- Musika**, 11
- Perofeta**, 52, 58
- Salamo**, 24, 34, 42
- Samita, Iosefa**, 58
- Snow, Lorenzo**, 10
- Talafaasolopito o le Ekalesia**, 8
- Togiola**, 4, 14
- Tulaga faatonuina**, 60
- Tupe Faaagaga Mo Aoga**, 28
- Valaauga**, 12

I LAU GAGANA

O loo maua le Liahona ma isi tusi a le Ekalesia i le tele o gagana i le www.languages.lds.org.

**Saunia e Peresitene
Henry B. Eyring**

Fesoasoani Muamua i le Au
Peresitene Sili



O LE FILIFILIGA INA IA MAUA LE Agaga Faafetai

Ua poloaia i tatou e lo tatou Tama o i le Lagi ina ia tatou faafetai mo mea uma lava (tagai i le 1 Tesalonia 5:18), ma e Na te manaomia lo tatou tuuina atu o le faafetai mo faamanuiaga ua tatou maua (tagai i le MF&F 46:32). Ua tatou iloa o Ana poloaiga ua fuafuaina tatou te maua ai le fiafia, ma e tatou te iloa ai foi o le solia o poloaiga e taitai atu ai i le malaia.

O lea la ina ia fiafia ma aloese mai le malaia, e tatau ona tatou maua le agaga faafetai. Ua tatou vaaia i o tatou olaga le fesootaiga i le va o le agaga faafetai ma le fiafia. Tatou te fia lagona uma lava le agaga faafetai, ae peitai e le faigofie ona tumau ai pea le agaga faafetai i mea uma ona o luitau o le olaga. O le mama'i, lē fiafia, ma le aveesea atu o e pele ia i tatou i taimi o o tatou olaga. Ua faafaigata e o tatou faanoanoaga ona tatou iloa atu o tatou faamanuiaga ma le talisapaia o faamanuiaga ua faapolopolo e le Atua mo i tatou i le lumanai.

O se suega le faitauina o o tatou faamanuiaga aua ua tatou masani lava i le taliaina o ni mea lelei e aunoa ma le amanaiaina. Afai ae leai se taualuga i luga atu o o tatou ulu, meaai e aai ai, po o le mafanafana o uo ma aiga, ona tatou iloa lea sa tatau ona tatou lotofaafetai i le taimi na tatou maua ai.

O le mea pito i sili, o nisi taimi e faigata ai mo i tatou ona lava lo tatou agaga faafetai mo meaalofa silisili ua tatou maua: o le fanau mai o Iesu Keriso, o Lana Togiola, o le folafolaga o le toetu, o le Toefuataiga o le talalelei ma le perisitua ma ona ki. Ua na o le fesoasoani lava a le Agaga Paia tatou te amata lagonaina ai po o a uiga o na faamanuiaga mo i tatou ma mo i latou tatou te alolofa i ai. Ma ua na o le pau lea o le mea ua mafai ona tatou faamoemoe e maua mai ai le loto faafetai i mea uma, ma aloese mai ai i

le solitulafono i le Atua ona o le le loto faafetai.

E tatau ona tatou ole atu i le tatalo ina ia fesoasoani mai le Atua, e ala i le mana o le Agaga Paia, ina ia tatou vaai ma le manino i o tatou faamanuiaga e oo lava i le lotolotoi o o tatou tofotofoga. E mafai ona fesoasoani o Ia ia i tatou e ala i le mana o le Agaga ina ia iloa ma ia maua le loto faafetai mo faamanuiaga tatou te le o amanaiaina. O le mea sa sili ona fesoasoani ia te au o le ole atu lea i le Atua i le tatalo, “Pe mafai ona Ia taitaiina atu a’u i se tasi e mafai ona ou fesoasoani atu i ai mo Ia?” O le fesoasoani atu i le Atua ina ia faamanuia isi ua ou vaai ai ma le sili ona latalata i ou lava faamanuiaga.

Sa taliina la’u tatalo i se tasi taimi ina ua valaauliaina a’u e se ulugalii ou te lei iloaina muamua matou te o i le falemai. O iina sa ou maua ai se pepe matuai laitiiti lava na mafai ona ofi i lo’u lima. I le na o ni nai vaiaso o lona ola, ae ua tele ni ona taotoga ua faia. Sa ta’u atu e le fomai i matua e faigata atu taotoga o le a manaomia mo le fatu ma ona mama ina ia ola ai pea lona atalii laitiiti a le Atua.

I se talosaga mai a matua, sa ou tuuina atu ai i le pepe se faamanuiaga faaleperisitua. Na aafia i le faamanuiaga se folafolaga o le a faaauau lona ola. Na sili atu i lo le na o le tuuina atu o se faamanuiaga, sa ou mauaina se faamanuiaga mo au lava ia o le lotofaafetai sili atu.

O le fesoasoani mai a lo tatou Tama, ua mafai ai e i tatou uma ona filifili ina ia lagonaina atili le agaga faafetai. E mafai ona tatou aiai atu ia te Ia e fesoasoani mai ina ia tatou vaai atu ma le manino i o tatou faamanuiaga, e tusa lava po o a tulaga. Sa ou talisapaia, mo au lava ia i lona aso, le vavega o le lelei o lo’u lava fatu ma o’u mama. Sa ou tuuina le faafetai ao agai atu i le fale mo faamanuiaga i la’u fanau ua mafai ona ou vaai atu ma le manino o ni vavega o le agalelei mai



Na tuuina mai e le Tama Lona Alo, ae na tuuina mai ia i tatou e Iesu Keriso le Togiola, o le meaalofa silisili lea o meaalofa uma ma foai uma

le Atua ma mai tagata agalelei o loo siomiaina i latou.

O le mea pito i sili, sa ou lagona le agaga faafetai mo le faamautinoaga o le Togiola o loo aoga i olaga o na matua popole faapea foi ia a'u. Sa ou vaai i le faamoemoe ma le alofa mama o Keriso o loo susulu mai i o latou foliga, e oo lava i o latou luitau faigata. Ma sa ou lagonaina le faamautinoaga e mafai ona e lagonaina pe a e fesili atu i le Atua ina ia faailoa mai ia te oe e mafai e le Togiola ona faatagaina oe ia lagona le faamoemoe ma le alofa.

Tatou te mafai uma lava ona fai se filifiliga ina ia tuuina atu le faafetai i le tatalo ma aioi atu i le Atua mo le taiala e auuina atu ai i isi mo Ia—aemaise lava i lenei taimi o le tausaga ao tatou faamanatuina le fanau mai o le Faaola. Na tuuina mai e le Tama Lona Alo, ae na tuuina mai ia i tatou e Iesu Keriso le Togiola, o le meaalofa silisili lea o meaalofa uma ma foai uma (tagai i le MF&F 14:7).

O le avatu o le faafetai e ala i le tatalo o le a faatagaina ai i tatou ina ia iloa atu le tulaga o nei faamanuiaga ma isi o tatou faamanuiaga uma ma ina ia maua ai le meaalofa o se loto faafetai atili. ■

AOAO ATU MAI LENEI SAVALI

O le tusiina i lalo o o tatou aafiaga ma faamanuiaga o le a fesoasoani lea ia i tatou ina ia manatua ma aumaia ia i tatou se mea e toe vaai i ai. Mafaufau e fai atu ia i latou o loo e aoaoina e tusi i lalo mea latou te loto faafetai ai—ina ia fesoasoani latou te manatua ai faamanuiaga na latou maua, iloa ai ia faamanuiaga o lenei vaitaimi, ma tepa taulai atu i faamanuiaga o le lumanai.

E mafai foi ona e uunaia i latou o loo e aoaoina ina ia mulimuli i faataitaiga a Peresitene Eyring i le aioi atu i le Tama Faalelagi e taiala i latou i se tasi latou te mafai ona fesoasoani atu i ai pe auuina atu i ai.

Fai se Suega o le Agaga Faafetai

Saunia e John Hilton III ma Anthony Sweat

Aua ne'i na o lo tatou talanoa e uiga i le faitauina o o tatou faamanuiaga—ae ia fai loa! Tusi se lisi o mea e 100 e te faafetai ai. Afai e te lagona ua tele naua na mea, ia fai la le mea lea:

1. Tusi ni tomai faaletino se 10 e te faafetai ai.
2. Tusi ni 'anomea po o ni meatotino se 10 e te faafetai ai.
3. Tusi ni tagata se toa 10 o loo soifua e te faafetai ai.
4. Tusi ni tagata se toa 10 ua maliliu e te faafetai ai.
5. Tusi ni mea se 10 e uiga i le natura e te faafetai ai.

6. Tusi ni mea se 10 e uiga i le asō e te faafetai ai.
7. Tusi ni nofoaga se 10 i luga o le fogaeleele e te faafetai ai.
8. Tusi ni mea na fausia faanonapo nei se 10 e te faafetai ai.
9. Tusi ni meaai se 10 e te faafetai ai.
10. Tusi ni mea se 10 e uiga i le talalelei e te faafetai ai.

Afai tatou te faia se lisi faapea, o le a tatou iloa ai o se lisi o mea e 100 ua na o le amataga lea o mea uma ua tuuina mai ia i tatou e le Atua.

TAMAITI

Fesoasoani Mai ina ia Ou Iloa O'u Faamanuiaga

Oloo talosaga atu Felipe i le Tama Faalelagi e fesoasoani ia te ia ina ia iloa faamanuiaga o lona olaga. Fesoasoani atu ia te ia e saili mea e mafai ona ia maua ai le loto faafetai e ala i le lioina o na mea. Ia mautinoa e te le o misia

mea nei o loo natia i le ata: fale, fa'i, maile, lotu, aoga, lavalava, uila, kitara, polo, ma le fugalaau.

Mafaufau e fai se lisi o mea o loo e faafetai ai ma faasoa atu i lou aiga.





O Se Lalolagi Lautele o Faatinoga

Suesue i mea nei, ma pe a talafeagai ai, ia talanoaina faatasi ai ma uso e te asia. Faaaoga fesili e fesoasoani ai ia te oe e faamalositia ai ou uso ma avea ai le Aualofa ma se vaega ola o lou lava olaga.

Faatuatua • Aiga • Toomaga

Emanaomia e le Alii, Lana Ekalesia, aiga, ma alalafaga ia faatosinaga a tamaitai amiotonu. E moni, na aoao mai e Elder M. Russell Ballard o le Korama a Aposetolo e Toasefululua faapea “o tuafafine uma i lenei Ekalesia, o e ua osi feagaiga paia e fesoasoani ai i le laveaaina o agaga, e taitai tamaitai o le lalolagi, e faamalositia aiga o Siona, ma fausia le malo o le Atua.”¹

Atonu e tau mafau fau nisi o tuafafine pe mafai ona latou ausia nei ituaiga faamoemoega mau-luluga. Peitai na faamalamalama mai e Eliza R. Snow (1804–87), o le peresitene aoao lona lua o le Aualofa, “E leai se uso ua mamao ese naua pe ua utiuti naua sona silafia e le mafai ai ona tele sona sao mo le atinaeina o le Malo o le Atua i le lalolagi.”² Na toe aoao mai foi Sister Snow faapea na faatulagaina le Aualofa “mo le ausiaina o galuega lelei ma le tautupu.”³

O le auai i le Aualofa e faalauaitele ai lo tatou lalolagi o uunaiga e ala i le tuuina atu o avanoa i tamaitai taitasi e fausia ai le faatuatua, faamalositia aiga ma auai, ma tuuina atu auai i le aiga ma le lalolagi atoa. Ma o le mea e lelei ai, o a tatou taumafaiga o ni tagata taitoatasi ma ni Aualofa e le manaomia ona tetele ma lofituina, peitai e tatau ona fuafuaina ma faifai pea. O gaoioiga amiotonu e pei o le tatalo faaletagata lava ia ma faaleaiga i aso uma, suesueina o tusitusiga paia i aso uma, ma le faalauaiteina o valaauaga i le Ekalesia o le a fesoasoani lea i le faateleina o le faatuatua ma le fausiaina o le malo o le Alii.

Mo tuafafine o e tau mafau fau pe o i ai se esesega o nei sao ua foliga e filemu, ua faamautinoaina mai e Elder Ballard: “O tuafafine uma lava e tutu atu mo le upumoni ma le amiotonu, o le a faaititiia faatosinaga a le tiapolo. O tuafafine uma o loo faamalositia ma puipuia lona aiga, o loo ia faia le galuega a le Atua. O tuafafine uma o loo ola o se tamaitai o le Atua, o loo ia avea ma faataitaga mo isi e mulimuli ma totoina fatu o le faatosinaga amiotonu lea o le a seleseleina i augatupulaga o i luma.”⁴

O Le a se Mea e Mafai ona Ou Faia?

1. Pe faapefea ona ou fesoasoani atu i tamaitai ou te asia ina ia iloa ma galue i o latou tomai ina ia avea o ni faatosinaga amiotonu?

2. Pe faapefea ona ou faaogaina a’u meaalofo ma taleni uiga ese ina ia faamanuaina isi?

Mai Tusitusiga Paia

1 Korinito 12:4–18;
1 Timoteo 6:18–19;
Mosaea 4:27; Mataupu Faavae o le Faatuatua 1:13

Mo nisi faamatalaga, alu i le relief society .lds.org..

Mai lo Tatou Talafaasolopito

Na tofia e Peresitene Polika Iaga (1801–77) ia Eliza R. Snow, o le sa galue o se failautusi ina ua faatulaga le Aualofa i Navu, e malaga i le Ekalesia atoa, ma fesoasoani i epikopo e faatulaga le Aualofa i a latou uarota.

Na aoao mai Sister Snow: “Afai o i ai soo se tamaitai ma tina i Isaraelu o loo lagonaina le le lava o lo latou silafia, o le a latou maua nei le tele o avanoa mo soo se malosi ma tomai e fai ai mea lelei lea ua matuai faamanuaina ai i latou. . . . Ua tatalaina e Peresitene Iaga le lalolagi lautele o faatinoga ma le aoga.”⁵

FAAMATALAGA

1. M. Russell Ballard, “Tamaitai o le Amiotonu,” *Liahona*, Tes. 2002, 39.
2. Eliza R. Snow, “An Address,” *Woman’s Exponent*, 15 Sete., 1873, 62.
3. Eliza R. Snow, “Female Relief Society,” *Deseret News*, 22 Ape., 1868, 81.
4. M. Russell Ballard, *Liahona*, Tes. 2002, 39.
5. Eliza R. Snow, *Deseret News*, 22 Ape., 1868, 81.



O Mea **Laiti** ma **Faatauva**

“O mea laiti ma faatauva e faataunuu ai mea tetele”
(Alema 37:6).

TALAFASOLOPITO O LE EKALESIA I LE LALOLAGI



Na feagai le atunuu ma faaifitauli faaupufai mo le tele o tausaga, peitai na faamaoni pea ia tagata anamua o le ekalesia. Na faatulagaina le uluai siteki e tautala faa-Sipaniolo, le Siteki a Mikesiko, i le aso 3 o Tesema, 1961. Na tatalaina e le Ekalesia ni nai a’oga, e aofia ai ma Benemérito de las Américas, lea na faavaeina i le Aai o Mekisiko i le 1963, ma o loo i ai pea lava.

Na faapaiaina i le 1983 le uluai malumu na fausia i Mekisiko, lea e i le Aai o Mekisiko. E oo atu i le 2000, ua valu malumu ua faapaiaina i Mekisiko.

E oo atu i le 2004, ua avea Mekisiko ma uluai atunuu i fafo atu o le Iunaite Setete ua tasi miliona tagata o le ekalesia o i ai.

Mekisiko

Na taunuu ia uluai faifeautalai a le Au Paia o Aso e Gata Ai i Mekisiko i le 1875. Sa vaevaeina i latou i ni vaega se lua. Na auina atu e le tasi vaega ni Tusi a Mamona faa-Sipaniolo i taitai lauiloa o le atunuu ma aoao atu le toatele o tagata, ae sa leai ni a latou tagata na liliu mai. O le isi vaega na papatisoina ia uluai

tagata o le Ekalesia e toalima i Mekisiko, i Hermosillo, Sonora. O le fa tausaga mulimuli ane, na talosaga ai se tasi o taitai o, Plotino C. Rhodakanaty o le Aai o Mekisiko, lea na mauaina ia tusi o le Ekalesia i le 1875, ina ia papatisoina o ia faapea ma isi. E oo atu i le 1885 ua maea ona faaliliuina i le gagana Sipaniolo le Tusi a Mamona.



Na auai atu ia taitai o le Ekalesia i le suatiaina o le eleele mo Benemérito de las Américas i le aso 4 Novema, 1963.



O LE EKALESIA I MEKISIKO	
Tagata auai	1,234,545
Misiona	23
Siteki	232
Uarota ma Paranesi	2,009
Malumalu	12 o loo faaoga; 1 na faasilasila atu

Kerisimasi mo Paionia Anamua

O masina faigata o le taumalulu na oo mai ai taimi faigata mo le tele o paionia, ma ua tau le maua ai ni punaoa mo ni meaalofa ma ni faafiafiaga o le Kerisimasi. Ae peitai e le'i faavaivai ai ia paionia anamua mai le foafoaina o ni mea faapitoa e manatua i le vaitau o aso fiafia. O ni nai faamaumauga nei o le auala na faamanatuina ai le Kerisimasi i vaitaimi o paionia:

O La'u Kerisimasi Aupito Sili ona Fiafia

“O la'u Kerisimasi muamua lava i le Vanu o [Sate Leki] na oo mai i le Aso Toonai. Sa matou faamanatuina i le aso Sapatu. Sa matou potopoto uma faatasi e siomia le pou o le fu'a i le ogatotonu o le malae. O iina sa faia ai le matou sauniga. O se matuai sauniga lava. Sa matou usuina viiga i le Atua. Sa tuufaatasia i matou i le tatalo amata, ma o le failauga o lena aso e le galo lava ia te au. O ni upu o le loto faafetai ma le fiafia, e le'i i ai lava se upu le lelei na saunoa i ai. Sa i ai le faamoemoe ma sa fiafia ia tagata, ona o lo latou faatuatua i le lumanai. Ina ua mae'a le sauniga sa lulu lima tagata uma. O nisi sa fetagisi i le fiafia. Sa taaalo tamaiti i le malae ma i autafa o le afitafu i lena po. Sa matou faatasitasi ma usu le, 'O mai, o mai, outou le Au Paia, galulue fiafia.' O le lapiti na saka ma sina falaoa laititi o le matou aiga lea o le afiafi. Sa matou maoona ma sa i ai le lagona o le filemu ma le fiafia moni. E le'i i ai se isi Kerisimasi na sili atu ona fiafia i lo'u olaga.”

E le mailoa le tusitala, upusii a Bryant S. Hinckley, i le Kate B. Carter, tuufaatasi, *Our Pioneer Heritage*, 20 volu. (1958–77), 14:198.

Oka, Se Televave o le Taimi

“I se tasi po i le sefuluono o o'u tausaga, sa faia ai e Tama se pati o le Kerisimasi mo lana lava fanau ma o latou aiga ma tuaoi e lalata ane. Sa matou sisiva. O le aufaifi o o'u tuagane lava. Sa matou iloa o loo faamoemoe ia Tama e faaiu le pati i le sefulu, lea na ia faia tonu lava i le ogatotonu o se siva faasikuea e ala i le

faatonuina o le faili e taofi le pese. Peitai e le'i iloa e Tama le tele o taimi na sii ai a'u e o'u tuagane i luga i le uati i lena po. O taimi uma lava ou te kiina ai i tua i le 30 minute. Masalo o le te'a o le vaeluapo na taape ai le pati.”

Mai faamaumauga a le aiga o Christian Olsen, i le Carter, *Our Pioneer Heritage*, 15:199.


O Se Taimi Fiafia

“Ina ua ala mai tamaiti i le taeao o le Kerisimasi o le 1849, e leai ma se pepe meataalo na maua i le nuu atoa, leai, e oo lava i se lole laau, po o se apu na maua i totonu o fale. Peitai na fiafia lava tamaiti ma o latou matua mo mea uma. Sa latou fiafia o loo maua lava sina meaa e aai ai, ma sa amata ona malamalama mai i aso taitasi o latou faamoemoea i o latou fale

fou. Peitai, afai e leai ni pepe meataalo po o ni meataalo mo le fanau, o le a le galo lava i matua le Kerisimasi, ma a o le'i uma le aso sa latou maua uma lava se aso fiafia.

“Sa latou potopoto i le afiafi i le fale o John Rowberry. O le fale lea sa fai ai a latou uluai sauniga. O iina sa fai ai se siva faaanamua e faaiu ai le aso, ma e le'i i ai lava se faatasiga faapenei muamua i se Kerisimasi ua sili ona faafiafiaina. . . . Peitai o le faafitauli sili lava o le musika. E le'i i ai ma se mea faifaifi o soo se ituaiga na maua i i. O Cyrus Call o se tagata e lelei tele lana mapumapu ma sa na ia mapumapuina ia fati o pese ao sisiva ma le fiafia ia le au paionia.”

Sarah Tolman, i le Kate B. Carter, tuufa., *Treasures of Pioneer Heritage*, 6 volu. (1952–57), 4:197–98.



MANATUAINA O SOIFUAGA MAOAE

Peresitene Lorenzo Snow (1814–1901)



E ui lava ina sa avea mulimuli ane o ia ma Peresitene lona lima o le Ekalesia, ae e le'i fiafia Lorenzo Snow e papatiso pe ana le valaauliaina o ia e lona tuafafine o, Eliza, e auai i vasega o le gagana Eperu i le Aoga a Perofeta i Katelani, Ohaiō. Sa auai ai foi ia Iosefa Samita ma isi taitai o le Ekalesia. E le'i leva ae fiafia Lorenzo i le talalelei ma auai ai loa i le Ekalesia i le aso 19 o Iuni, 1836. Sa galue faamisiona ia Elder Snow i Italia, Atumotu o Sanuisi (lea ua ta'ua nei o Hawaii), ma Peretania Tele, lea na ia tuuina atu ai se kopi o le Tusi a Mamona i le Masiōfo o Victoria.

Sa ia Elder Snow ni meaalofa mataina lea na ia faaagaina e auuana atu ai i le

Alii. I lona faamanuiaga faapeteriaka na folafola atu ai ia te ia, o le a ia soifua seia loa ona tausaga, ae o le ana le lagonaina ia aafiaga o le matua. O lona malosi na mafai ai ona ia tumau malosi ai i tausaga mulimuli ane o lona soifua a o avea ma se aposetolo ma se perofeta. Na ia faaagaina foi le perisitua e toe faatutu mai ai nai tagata mai le oti.

O le vaitaimi ao avea Peresitene Snow ma perofeta, na aafia ai le Au Paia o Aso e Gata Ai i saute o Iuta i le leai o se timu. Na musuia Peresitene Snow a o lauga atu i se konafesi i le taulaga o St. George i saute o Iuta, ina ia folafola atu i le Au Paia o le a oo mai timuga ma o le a latou fiafia i se seleselega o fua o faatoaga matua tetele pe a fai latou te totogiina le sefuluai. E ui lava na totogiina e tagata o le au paia a latou sefuluai, ae na mavae ni nai masina o leai lava se timu. Na aioi atu Peresitene Snow i le Tama Faalelagi ina ia auina mai se timu. I nai aso mulimuli ane na ia maua ai se feau faauaealesi o loo ta'u mai ai, "Timuga i St. George."

Mo nisi faamatalaga, tagai Francis M. Gibbons, Lorenzo Snow: Spiritual Giant, Prophet of God (1982).



Luga: Ata o Lorenzo Snow pe tusa o le 1865. Oगतotonu: O Peresitene Snow (ogatonu) ma ona fesoasoani i le Au Peresitene Sili o, George Q. Cannon (agavale) ma Iosefa F. Samita (taumatau) i le 1900. Lalo: Ua faamanuiaina le Au Paia o Aso e Gata Ai i timuga mo fua o a latou faatoaga ina ua usitaia le fautuuga a Peresitene Snow e totogi le sefuluai.



E PA'ULUA AE E TAUTONU LAVA

Saunia e JaNeal B. Freeman

Sa usuina e lo'u tama se laina o le pese i lona lava leo—e le o le ato, e le o le malu, ae o se mea e lavea uma ai lava na vaega e lua. E ui lava e na te le mafai ona iloa le eseese o le C ogatotonu mai le A paulua, ae na usu leotele ma le malosi lava Tama.

Ou te le manatuaina so'u maasiasi i le pese a lo'u tama, ae ou te manatuaina lo'u fiafia ma le le mautonu i si ona maloā fiafia. Pe na te le o iloa o la e faalogologo isi tagata?

O le fiafia ia o lo'u tama i viiga o le talalelei, ma e na te le avea lona le talenia e fai ma faalavelave i le vivii atu e ala i musika. Sa ia pese ma le fiafia, naunautai, ma le lagona. Ou te fiafia i le auala e na te usuina ai ma le malosi ma le tuuto se viiga e pei “O Le Agaga o le Atua” ona toe usuina lea ma le leovaivai ma le migao i ni nai minute mulimuli ane o se viiga o le faamanatuga.

Sa aoaoina au i se tasi aoauli e lo'u tama i se lesona mamana e ala i se viiga. Sa ou taina le piano e pei ona ou masani ai ou te mapu i ai pe a maea se aso mai le aoga mauuluga. E masani lava ona taumafai lo'u tama e saili se taimi ia tau ai o ma'ua, ma o lea na sau ai ma faatasi mai. O se tulaga ou te masani ai: e na te sueina itulau o le tusipese, saili se pese, ona tuu mai lea ou te taina ae pese.

I lenei la aso faapitoa, sa toso mai ai e Tama le tusipese ma susue i se pese.



“O se pese matagofie lenei. O se tasi o pese ou te fiafia i ai,” o lana tala lea, ma tuu le tusi i luga o le piano. O le pese “Se Tagata Mativa Faanoanoa.” Sa ta'u mai e Tama ia te au o se viiga na sili ona fiafia i ai le Perofeta o Iosefa Samita ma na talosagaina e Iosefa ia Ioane Teila e usuina le pese i Karefaasi i sina taimi a'o lei toe mamao le maliufasia o Iosefa ma Ailama.

Ona usuina lea e Tama o fuaiupu uma e fitu ao ou taina le piano. I lenei taimi, e lua mea mata'ina na tutupu. O le mea muamua na usuina e lo'u tama le pese atoa e aunoa ma se nota e misi. O ana A paulua na mo'i lava o A paulua! Na fetau ma faigofie le leo o Tama, ma e ia te au lava ia na manaia le leo. O le mea mata'ina lona lua na itiiti le faateia ae na sili atu lona taua. Ao usu lo'u tama, sa ou iloa ai e alofa o ia ia Iosefa Samita ma sa i ai sana molimau i lona valaauga faaperofeta. Na molimau mai le Agaga ia te a'u o Iosefa Samita o se perofeta.

Na maliu lo'u tama i ni nai tausaga mulimuli ane, ma e masani lava ona ou mafaufau i lenei aso ma le aafiaga na oo ia te au. O se vaega taua o la'u molimau i le talalelei ua mausali ona o se tamā “sa le mafai ona pese” ae na filifili lava e pese ma lona loto atoa. ■



FAAOGA AVANOA FAAFAIAOGA

“E le gata i le faalii atu i le autalavou o le ala e auala i faaitaiga, ae tatou te taitaia i latou e ala lea i le malamalama i o latou loto ma savavali faatasi ma i latou i le ala o le talalelei. Ina ia malamalama moni i o latou loto, e tatau ona tatou faianisi mea nai lo le na ona i ai faatasi ma i latou i le potu e tasi po o le auai faatasi i se gaoioiga faale-aiga ma faale-Ekalesia. E tatau ona tatou fuafua ma faaoga avanoa uma faafaiaoga lea e faia ai se uuniga tumau i o latou mafaufau ma loto. . . .

“Ou te faamoemoe o le a tatou maua le avanoa e tuuina atu ai a tatou molimau ua tatou iloa o loo soifua le Atua ma o lesu o le Keriso. Ou te faamoemoe o le a tuuina atu a tatou molimau ina ia iloa e a tatou fanau le mea o loo i ai o tatou loto ma tatou te alofa ia i latou. O le alofa sili ma aoaoga sili e tatau ona faaalua i totonu o o tatou lava aiga.”

Elder Robert D. Hales o le Korama a Aposetolo e Toasefululua, “O Lo Tatou Tiute i le Atua: O Le Misiona a Matua ma Taitai i le Tupulaga Faia'e,” *Liahona*, Me 2010, 95, 98.

O LA'U AUAUNAGA O SE TAGATA NOFOFUA O LE EKALEZIA

Saunia e Julie Burdett

Mekasini a le Ekalesia

Ina ua maua so'u valaauga fou, sa ou te'i.


“Pe mafai ona ou faia lena mea?” sa ou fesili ai ia te a'u lava ia.

Pe a ma le fitu tausaga ua mavae, a o 29 o'u tausaga, sa ou siitia atu ai i luta mai Oregon, ISA. Ina ua uma ona faia ni a'u fetuutuunaiga, sa ou filifili loa e auai i le uarota a lo'u aiga i le lotofale, ma mafaufau ai ua ou manaomia se suiga mai le uarota a le au nofofua lea sa ou auai.

Sa aoaoina a'u e o'u matua ina ia talia e le aunoa ia valaauga o le Ekalesia, ma o lea sa fai ai so'u avanoa e vaai le epikopo ma faailoa atu au lava e avea ma se tasi o loo manao e galue. E le'i leva ae ou faiaoga loa i tamaiti e ta'i lima tausaga i le Peraimeri, lea sa ou fiafia i ai. E lima masina mulimuli ane ae tofia loa a'u e le epikopo e avea ma peresitene o le Peraimeri. Sa ou te'i. “Pe mafai ona ou faia lena mea?” sa ou fesili ai ia te au lava ia.

O lo'u nofofua ma le leai o se fanau na ou ofo ai pe ua ou agavaa e galue i lena tofiga. O o'u aafiaga ua mavae i uarota faaleaiga, o peresitene o Peraimeri o ni tina e fiafia ua faaipoipo, talenia, ma tuuto. Peitai, o lo'u manatuaina o mea na aoaoina ai a'u e o'u matua, na ou talia ai le tofiga fou. Na matuai faamaoni a'ia'i le epikopo i le tiutetauave e tataui i epikopo ona “sailia ni valaauga 'anoa mo talavou nofofua matutua uma.”¹ Atonu na sili atu ona 'anoa le valaauga nai lo le mea sa ou faamoemoeina, peitai sa ou matuai faafetai ai lava.

A o ou galue ai i lo'u valaauga fou, sa ou maua ni taimi fiafia, malie, ma le musuia tele ma tamaiti. I se tasi tausaga, i le vaitaimi o le Kerisimasi, sa matou toe faatinoina ai le tala i le Soifua mai o le Faaola mo se taimi o le fetufaaiga faapitoa. Sa matou



usuina ni pese. Sa matou aumaia ni ofu talaloa ma pulou e fai i solo mo le au leoleo mamoe ma Iosefa. Sa i ai ni pale ilaila mo ulu o agelu. Sa matou faia ni pulou tupu mai pepa malo ae ufi i pepa iila mo le Au Makoi.

A o matou toe faatinoina le tala o le Kerisimasi ma usu ia pese paia o le vaitau, sa ou vaaia se teineitiiti lalelei o loo avea ma Maria. O ana faataitai-iga o le migao ma le agamalu na pa'i mai i lo'u loto, ao ia tootuli, filemu ma siiina le pepe meataalo o loo avea ma Iesu le pepe. O le agaga o lena taimi na ou maua ai le agaga faafetai i se Tama Faalelagi alofa mo lo tatou Faaola ma na fesoasoani lea e faamalositia la'u molimau i Lana misiona maoae ma le alofa. Sa ou maua ai foi le



agaga faafetai mo le faamanuiaga ofo-
ofogia sa ou mauaina i le valaauina e
galue, ma mo se epikopo musuia o lē
na fesoasoani i le faataunuaina o lena
auaunaga.

Tatou te faitauina i le Mataupu
Faavae ma Feagaiga, “O lea, afai ua ia
te outou le manao e auauna atu i le
Atua, ua valaaulia outou i le galuega”
(MF&F 4:3). E ui lava e tele ina fesoo-
tai lenei mau ma galuega faafaifeautai,
ae ou te fia manao ina ia mafaufau
e mafai foi ona faasino i soo se tulaga
o auaunaga e faatatau i le talalelei.


Po o le a lava le tulaga faaleaiga
po o fegalegaleaiga, o le mea mua-
mua lava ma e sili ona taua o i tatou
taitoatasi o se atalii/afafine o se Tama
Faalelagi alofa, e finagalo ina ia tatou

tuputupu ae, auai, atiina ae a tatou
taleni, feauaunaa i le tasi i le isi, ma
fesoasoani le tasi i le isi ina ia toe foi
atu ia te Ia.

Sa ou lagonaina le vave ona talia-
ina ma le alofa i lena uarota ma e
tumau ai pea i lo’u loto e oo mai i
lenei aso. Sa iloa ma na faaaogaina
lo’u naunau ina ia galue, ma e tele
tagata na aapa mai ma faamasani mai
ia te a’u, ma na faamanuiaina moni
lava a’u e le Tama Faalelagi. Ona o ni
taitai agalelei ma le mataalia, sa faa-
manuiaina ai a’u ina ia aoao atu ma
aoao mai nisi o Ana fanau e sili
ona matagofie. ■

FAAMATALAGA

1. *Tusitaulima 2: Taitaiina o le Ekalesia*
(2010), 16.3.3.



MANATU- LIA MA LE ALOFA

“E ui lava
ina toatele
tagata matu-
tua nofofua o le ekalesia ua
mau fetuutuunai lelei i le olaga
ma ona faafitauli, ae latou te
manaomia pea le manatulia ma
le alofa mai le Ekalesia ma ona
tagata e faamaonia ai lo latou
aoga ma le alofa o le Atua o loo
i ai mo i latou taitoatasi.”

Perisitene James E. Faust (1920–2007),
Fesoasoani Lua i le Au Perisitene Sili,
“Taliaina o Tagata Taitoatasi Uma,”
Liahona, Aok. 2007, 4.

O Se Tali mo Soo Se

“PE FAAPEFEA PE AFAI?”

“Ma o le a afio atu o ia [Iesu], ma mafatia i tiga ma puapuaga ma faaososoga o ituaiga eseese uma; ma o le a oo ia te ia nei mea, ina ia mafai ona faataunuuna o le upu ua fai mai, o le a ia ave i ona luga tiga ma ma’i o ona tagata” (Alema 7:11).



O LE MANA FAAMALO O LE TOGIOLA

“E silafia e [Iesu Keriso] o tatou tiga, ma ua la i ai iina mo i tatou. E pei o le Samaria agalelei i Lana faataoto, ina ua la mauaina i tatou o manunu’a i tafaala, Na te nonoa i o tatou manua ma tausi ia i tatou (tagai i le Luka 10:34). Uso e ma tuafafine, o le mana faamalolo o Lana Togiola e mo oe, mo tatou, ma tagata uma.”

Elder Dallin H. Oaks o le Korama a Aposetolo e Toasefululua, “Na te Faamaloloina i Latou e Mafatia i Avega,” *Liahona*, Nov. 2006, 7.

Saunia e Michael D. Woodbury

I ni nai tausaga ua mavae atu, na ou pau ai i la’u mea faase’e, ma ou pau ai i le ogatotonu o le auala. Na so’a a’u i le taimi lava lena e se isi taavale—e telē atu—ma toso a’u i le auala. Na ta’ua e i latou na lipotia mai le faalavelave ou te le ola.

Ina ua iloa e le au faigaluega o faalavelave faafuasei o lea lava ou te ola, sa latou ave faanatinati a’u i le falemai, ma faia ai ni ou taotoga faatopetope e tele mo isi aso na sosoo ai. Ao faoia a’u i le masini ma ou le iloa se mea, sa tuu e lo’u tama ma nisi o latou lima i o’u luga ma faamanuia a’u, e ala i le mana o le perisitua. Mai lena lava taimi, na avea le faagasologa o lo’u malosi ma se vavega. Peitai na sili atu ona taua le mea lea na tupu faaleagaga nai lo le mea na tupu faaletino.

O lenei aafiaga na tatala atu ai lo’u loto i le uunaiga a le Faaola. O le vaiaso talu ona maea le faalavelave, na

ou malosi ai ma iloa ai le mea na tupu. Sa ou iloa na faasaoina a’u e le Alii ma faatagaina a’u matou te faatasi ma lo’u toalua ma le ma fanau i le lalolagi. Sa ou iloa le faamafanafanaina o a’u, e le’i tuulafoaia e le Atua. Sa ou lagona le filemu, nai lo le le mautonu ma le lofituina e ala i le faagasologa o lo’u toe malosi lea o loo taoto mai i o’u luma.

I aso na sosoo ai, sa ausia ai e lo’u alofa mo le Tama Faalelagi ma Iesu Keriso ia ni o’oo’oga fou, ma ua faateleina lo’u naunau ina ia tumau faamaoni i lo’u olaga atoa. Sa ou vaaia le alofa o le Atua e ala i tagata agalelei sa ou fetai ai i ai. Ma sa ou iloa na faafogaina ma tali mai e le Tama Faalelagi ia tatalo ma anapogi a tagata o le tele o faatuatuaga mo a’u.

A o ou faamatalaina lenei tala i isi, na le uma fesili “pe faapefea pe afai?” “Pe faapefea pe ana fai e te oti?” “Pe faapefea pe afai ua le mafai ona e savali?” “Pe faapefea



PE FAAPEFEA ONA FAAMALOSIA I TATOU E LE ALII?

Na fesoasoani ia Elder David A. Bednar o le Korama a Aposetolo e Toasefululua e tali le fesili lenei i lana lauga o le konafesi aoao “I Le Malosiaga o le Alii” (*Liahona*, Nov. 2004, 76–78):

- “O le malosi o le Alii e mafai ai ona tatou faia ma onosaia ma faatoilalo mea uma.”
- “O le vaega malosi ma le mamana o le Togiola e fesoasoani ia i tatou e iloa ai ma fai mea lelei, ma avea ai ma tagata lelei i auala e le mafai ona tatou iloa, ma faatau-nuaina i lo tatou lava malosi faaleolaga nei.”
- “I le malosiaga o le Alii ma ala i Lona alofa tunoa, ou te iloa e mafai ona faamanuiaina ai oe ma a’u ina ia faataunuaina mea uma.”

Mafaufau e faasoa atu i se isi lau molimau e uiga i faamanuiaga e oo mai ona o se taunuuga o le Togiola a Iesu Keriso.

pe afai o le a e tauivi ai pea ma se tiga tuga i lou olaga atoa?” O le vaega ofoofogia ia te au o le tuuina mai lea e le Togiola o se tali i fesili uma “pe faapefea pe afai?”

Ona o le Togiola, o lea o le a ou toetu ai ma o le a soloiesea soo se faaletonu po o se tiga faaletino. Ua faamauina faatasi i maua ma lo’u toalua, ma le ma fanau e avea o se aiga e faavavau. Ua mafai lena tulaga ona o le Togiola. Afai tatou te agai i luma ma le faatuatua i lo tatou Faaola ma a o tatou pasi atu i luitau o le olaga ma tumau seia oo i le iuga, o le a tuuina mai e le Togiola le ala tatou te manaomia e mulimuli atu ai, faatasi ai ma se folafolaga faamamaluina o le ola e faavavau o loo faatalitali mai i le iuga. ■

“Ma o le a ia ave i ona luga le oti, ina ia mafai ona ia tatalaina ona tagata; ma o le a ia ave i ona luga o latou vaivaiga, ina ia mafai ona faatumuina ona loto i le alofa mutimutivale, e tusa ai ma la le tino, ina ia mafai ona ia silafia e tusa ai ma la le tino, le ala e fesoasoani ai i ona tagata, e tusa ma o latou vaivaiga.” (Alema 7:12).

Mo nisi faamatalaga e uiga i lenei autu, tagai i le Mataio 11:28–30; 3 Nifae 17:7–9; ma Bruce C. Hafen, “Beauty for Ashes: The Atonement of Jesus Christ,” *Liahona*, Ape. 1997, 39.

O LESONA MAI LE

Matai



**Saunia e Elder
Marvin J. Ashton
(1915–94)**

O Le Korama a Aposetolo
e Toasefululua

Na faauuina Marvin J. Ashton e avea ma Aposetolo i le aso 2 Tesea, 1971. O le tusiga o loo i lalo o se vaega mai se saunoaga na ia tuuina atu i se faigalotu a le Iunivesite a Polika Iaga i le aso 5 Iuni, 1988.

Po o le a lava le umi e mafai ona ou manatua ai, e i ai so'u alofa faapitoa mo Iesu Keriso. Sa aoaoina a'u o Ia o le Alo o le Atua soifua. Sa aoaoina a'u o Ia o la'u uo, o lo'u faiaoga, ma o lo'u malosiaga. I tausaga ua mavae atu, ina ua oo mai i lo'u olaga se valaauga ma se tiutetauave ma le mamalu o le tauaveina o se molimau faapitoa e uiga ia te Ia, sa ou taumafai malosi lava ina ia aoaoina a'u e ala i Lona soifuaga ma Ona ala. E moni, o Ia o le Faiaoga o Faiaoga. Ina ia fesoasoani ia te a'u i a'u galuega ma tautinoga, sa ou liliu soo atu i le mataupu e valu o le Ioane i le Feagaiga Fou mo le malosi, mo le taitaiga, ma mo le faataitaiga. Afai e mafai faamolemole, sei o tatou faitau i nisi o mau e faamalolosa ai o tatou olaga ma a tatou sootaga ma Iesu. Na fesoasoani nei laina ma upu ia te au ou te malamalama atili ai ia te Ia ma tuuina mai ai ia te au le naunautaiga ina ia faia ma avea atili ai e faapei o Ia. . . .

Na aumai mai ia te Ia e le [au tusiupu ma le au faresaio] le fafine na maua ina o mulilua. O nei fili . . . na taumafai e tofotofo ia te Ia. Sa latou faanofoina [le fafine] i le ogatotonu e pei o se faaaliga, o se tagata agasala, o se tagata eleelea. E le'i sola ese mai ai o Ia. . . . Sa molia

o ia i le mulilua—i le agasala lava lea. E le'i i ai se masalosalo e uiga i lona ta'usalaga. Sa latou tofotofoina o Ia i se tulaga na foliga mai e le mafai ona aloese mai ai. Na fai mai le tulafono a Mose e fetogi o ia i maa. "A o oe, pe se a se mea e te fetalai mai i ai?" [Ioane 8:5] sa latou fesili, ma tofotofo ia te Ia, ina ia utia o Ia—ma tuu ai o Ia i se tulaga e le mafai ona malo ai.

Po o le a lava Sana fetalaiga, o le a tuuaia o Ia i le fai o le mea sese, faamasinoga sese. Sa latou tofotofoina o Ia pe mafai ona uma Lona onosai ma faagalo Lona tagata. O le fetogiina i maa o le [fafine] o se tulaga sau. O le le amanaiaina o ia o se mea sese. . . . Na punou o Ia i lalo ma tusitusi i le eleele ma foliga mai e Na te le'i lagonaina i latou (na gauai atu i latou ma saunia tagata uma o loo faalogo mai ina ia aoaoina). . . . Ma a o leai se pisa, sa latou toe fesili atu. Sa mafai ona ou lagonaina fesili le mafaufau: "Se tope, fai mai sau upu. Ua maua nei oe. E te fefe e tali mai?" Peitai na pule lava Iesu. . . .

Na ea a'e Iesu lava Ia i luga, ma fetalai atu ma le lotomaulalo ma le agamalu i se tulaga malualii i upu nei ua sili ona mamana: "O so outou e leai sana agasala, ia lua'i togi se maa ia te ia" [Ioane 8:7]. O se tali atoatoa mai i se tamalii atoatoa.

E manaomia le faamanatu mai pea lava pea o lenei mea ia i tatou i le taimi nei, i o tatou tiutetauave, tulaga, ma valaauga. I a tatou fegalegaleaiga ma tagata uma, tuu atu i se tasi e leai sana agasala na te muai faitio pe saili se


sese pe tau faaleaga. . . . Na Ia punou i lalo ma tusitusi i le eleele. Sa latou lagona Lana fetalaiaga. Sa latou lagona le aafiaga o le filemu o Lona agaga a o le'i tuuina mai Sona finagalo. Ina ua ta'usalaina e o latou lava mafaufau, na o ese i o latou lava loto fuatia ifo, ae le'i tuliese. Sa taitoatasi ma latou o i fafo—e lei o e su'e ni maa ae na o e fōfō o latou manu'a faaleagaga.

Sa tuua na o Ia ma le fafine. Ou te fiafia sa faamauina lena mea. O nisi o i tatou e taumafai e taumamao mai ia i latou ua pauu. . . . Na Ia fetalai, “O fea ea i latou e na molia oe? ua le faasala mai ea se tasi ia te oe?” [Ioane 8:10]. . . . Na umi se taimi sa fesili ai ma faafofoga Iesu Keriso. Oi, pe ana mafai ona tatou faia sooa lena mea! O le a matuai faigofie a tatou tali, ma matuai faaleleia. . . .

Na tali atu le fafine na molia i le mulilua i le fesili a le Alii e uiga i e na molia o ia, “Le Alii e, e lei lava se tasi.” Ona tuuina mai ai lea o lenei fetalaiaga mamana: “Alu ia oe, aua e te toe agasala” [Ioane 8:11]. Sa aoao atu le Matai i lena vaitaimi ma o loo aoao mai pea i lenei lava itula. O Lana savali maoae: inoino i le agasala, ae alofa i le tagata agasala. Ou te faamoemoe ua mafai ona aumaia i lena mea lo tatou malosi ma le mautinoa ma se sootaga vavalalata i lo tatou Faaola o Iesu Keriso. E le faapea na le amana'aina e Iesu le mulilua. Na Ia avatu i le fafine le alofa nai lo le tuuina atu o se lauga pulepuletutu. Sa manaomia e le fafine ma e na molia o ia se lesona o le alofa. Sa manaomia i lea tulaga le alofa muti-mutivale ma le agaalofa. E ese le taua o le iloaina e talitonu Iesu e sili atu le tagata nai lo ana agasala uma. Pe o se mea ea e ofo ai le faasino atu ia te Ia o le “Leoleo Mamoe Lelei”? Sa alofa o Ia i Ana mamoe uma pe na taase, fiaaai, le mautonu, maalilili, pe na leiloloa.

I le faaiuga o lenei aafiaga faaleaoaoga maoae, lenei lesona o le alofa ma le agaalofa, o loo i ai se fuaiupu taua.

“Ona toe fetalai atu lea o Iesu ia te i latou,



ua faapea atu, O a'u nei o le malamalama o le lalolagi: o le mulimuli mai ia te au, e le savali o ia i le pouliuli, ae ia te ia le malamalama o le ola” (Ioane 8:12).

Se'i o tatou mulimuli i Lona malamalama. Se'i o tatou taulai atu soo i upu nei. Ou te molimau atu ia te outou sa faapolopoloina mo le lelei o tagata uma. ■

Ua faalaugatasia le sipelaga, faailoga, ma le faamataitusi tetele. Mo le anotusi atoa o le saunoaga i le gagana Peretania, asiase ane i le speeches.byu.edu.



O LE FILEMU MA LE OLIOLI I LE ILOA O LOO

SOIFUA LE FAAOOLA



I le avea ai o se molimau faapitoa i Lona suafa paia, ou te molimau atu ai o Iesu le Keriso o le Alo paia o le Atua soifua.

I le avea ai o se tasi o Aposetolo e Toasefululua, e mafai ona ou fai atu e talisapaia e uso o le Toasefululua le avanoa e aoao atu ai ma molimau atu e uiga i lo tatou Faaola pele. Matou te faasoia atu ma le fiafia a matou molimau i Lona soifua, o Lana galuega, ma Lana misiona i le olaga nei.

Tatou te faamanatuina le soifua mauualalo mai o le Faaola i le taimi lenei o le tausaga e ui lava ua tatou iloa e le'i tupu ia Tesema. Pei lava na soifua mai le Alii ia Aperila. O loo fautuaina mai i faamaoniga faatusi paia ma faaletalafaasolopito se taimi i le tautotogo o le tausaga, e latalata i le Paseka a Iutaia (tagai MF&F 20:1).

O loo ta'u mai i tusitusiga paia na faufautane Lona tina, o Maria, ia Iosefa (tagai Mataio 1:18; Luka 1:27). E mafai ona faatusa lea faufautane i se faamau faaonapo nei, lea e sosoo mulimuli ane ai ma le sauniga moni o le faaipoipoga.

O le tala a Luka o loo tusia ai le faaali o le agelu o Kaperielu ia Maria lea na ia iloa

ai e uiga i lana misiona i le olaga nei:

“Ua ulufale mai le agelu ia te ia ona faapea mai lea o ia, Si ou alofa ia te oe le ua alofaina, ua ia te oe le Alii: amuia oe i fafine. . . .

“Ua fai mai foi le agelu ia te ia, Maria e, aua e te Fefe; aua ua alofaina mai oe e le Atua.

“Faauta foi, o le a to oe, ma e fanauina se tama tane, e te faaigoa ia te ia o Iesu.


“E sili o ia, e ta'ua foi o le Alo o le Silisiliese” (Luka 1:28, 30–32).

Matau le mataitusi tele o le *S* ma le *F*. O loo tatou Tama Faalelagi o le *Silisiliese*. O Iesu o le *Alo* o le *Silisiliese*.

“Ona fai atu lea o Maria i le agelu, A faapefea le mea nei, auā ou te lei iloa se tane?

“Ua tali mai le agelu, ua faapea mai ia te ia, E afio ifo le Agaga Paia i luga ia te oe, e faamalumalu ifo foi ia te oe, le mana o le Silisiliese: o le mea lea e ta'ua ai le tama paia, o le Alo o le Atua” (Luka 1:34–35).

A o lei faatasia Iosefa ma Maria, ua ia tauaveina lena Tamaitiiti Paia. Sa naunau Iosefa



**Saunia e Elder
Russell M. Nelson**

O Le Korama a Aposetolo e Toasefululua

e puipuia Maria (tagai Mataio 1:18–19), ma le faamoemoe e faasaoina o ia mai le faasalaga e tuuina atu i se tamaitai e maitaga a o lei mae'a ona faaiipoipo. A o manatunatu o ia i nei mea, sa faaali le agelu o Kaperielu ia Iosefa ua faapea atu:

“Iosefa e, le atalii o Tavita, aua e te fefe ina aumai ia te oe o Maria lau ava; aua o lana to mai le Agaga Paia lea.

“E fanau mai e ia lana tama tane, e te faaigoa foi ia te ia o Iesu; aua e faaola e ia lona nuu ai a latou agasala” (Mataio 1:20–21).

Sa lei manaomia ona tau aoao Maria ma Iosefa i le taua loloto o le igoa *Iesu*. O le faapogai faa-Eperu e afua mai ai o le, *Yehoshua* po o le *Jehosua*, o lona uiga o “Ieova o le faaolataga.”¹ O lona uiga, o le galuega a le Alii o Ieova le Atua, e le o toe mamao ona faaigoa lea ia Iesu, o le faaolataga. O le a avea o Ia ma Faaola o le lalolagi.

I le Tusi a Mamona tatou te faitau ai i se talanoaga sa faia e Nifae ma se agelu o lē sa fesili, “Pe ua e iloa ea le faamaualalo o le Atua?”

Sa tali atu Nifae, “Ua ou iloa e alofa o ia i ana fanau; e ui i lea, ou te le iloa le uiga o mea uma.

“Ma sa fetalai mai o ia ia te au: Faauta, o le taupou ua e vaai atu i ai o le tina lea o le Alo o le Atua, e tusa ma la le tino.

“. . . sa oo ina ou vaai atu ua segia ese atu o ia i le Agaga; ma ina ua mavae ona segia atu o ia i le Agaga mo le va o se taimi, sa fetalai mai le agelu ia te a'u, ua fetalai mai: Vaai ia!

“Ma sa ou vaai ma toe iloa atu le taupou, ua sapaapaia e ia se tamameamea i ona lima.

“Ma sa fetalai mai le agelu ia te a'u: Faauta, i le Tamai Mamoe a le Atua, ioe, o le Alo lava o le Tama Faavavau!” (1 Nephi 11:16–21).

Malamalamaaga mai ia Luka

Ua faaopoopo le malamalamaaga taua mai le tala faamama'i masani tatou te faamatalaina i le taimi o le Kerisimasi e pei ona tusia i le Luka, mataupu e 2: “O aso lava ia na oo mai ai le poloaiga a Kaisara Aokuso ia tusia uma ai le lalolagi” (Luka 2:1).

O se lafoga faavae moni lava lea, o se faitauga aofai, ma se tusigaigoa—o se resitalaga o tagatanuu o le malo o Roma. Sa faatonuina e le Tupu o Herota ina ia faitauina



tagata i le nuu o o latou augatama. O Maria ma Iosefa, sa nonofo i le taimi lea i Nasareta, sa tataua ona la malaga agai i saute i le aai o Tavita, o se mamao pe tusa ma le 90 maila (145 km). Atonu pe sa mamao atu se mea sa la malaga ai pe afai sa uiui mamao mai le itumalo faamimisa o Samaria lea latou te sosoo.

Toetoe lava ina a mautinoa moni sa latou malaga ma aiga sa tataua ona o i le nuu o o latou augatuaa. E le masalomia o lenei malaga faigata sa ave ai ma a latou meaola, e pei o taifau ma asini. Atonu e i ai ni po sa latou tolauapi



O le afeafe lea e tali ai malo, lea na semanu e nonofo ai Maria ma Iosefa, e masani lava e laumiiumi faatafafa lona foliga, ma e i ai se malae i le ogatotonu mo manu, ma e siomia i ni potu faatafafa puipui e malolo ai tagata.

ai i le ala aua e ono manaomia i la latou malaga ni aso se tolu pe fa. Ina ua latou taunuu i Peteleema, ua oo i le taimi mo le fanau mai o le Tamaititi Paia.

“Ua fanau e ia lana tama ulumatua, ua ia aui ia te ia i le ie, ma faataoto ia te ia i le falepovi; aua latou te le ofi i le fale e tali ai malo” (Luka 2:7).

E tumu lenei fuaiupu i uiga, ua faamauoaina i le iloaina o se upu mai le uluai tusiga faa-Eleni o le Feagaiga Fou ma le malamalama i le aganuu o lena taimi ma le nofoaga. O le upu na faaliliu mai ai le “fale e tali ai malo” o le *kataluma*.² O le sope faa-Eleni i luma o upu o le *kata* (po o le *cata*) o lona uiga o “lalo” i le taimi po o le nofoaga. A tuufaatasi le *kata* ma le *luma*, ona ta’u mai ai lea e le upu o se nofoaga e taapeape ai tagata, pe mapu ai foi mai la latou malaga. I le Feagaiga Fou i le gagana Eleni, o le upu *kataluma* e na o le lua lava isi fuaitau o loo ta’ua ai, ma e le o faaliliuina i taimi taitasi o se “faletalimalo” ae o se “afeafe e api ai malo” (Mareko 14:14; Luka 22:11).

I lena taimi ma lena nofoaga, e le pei se faletalimalo i Asia o se Holiday Inn po o le Bethlehem Marriott i le taimi nei. O se nofoaga e tali ai malo i na aso sa i ai mea e mapu i ai karaveni femalagaai, e aofia ai tagata ma a latou meaola. E tuu karaveni i le mea sa iloa i na aso (ma o loo iloa ai pea lava) o se *caravansary*, po o se *khan*. O loo faauigaina e le lomifefiloi nei faaupuga o se afeafe tele e tali ai malo e siomia ai se malae i atunuu i sasae (po o Asia) lea e malolo ai karaveni i le po.³

O lena ituaiga o nofoaga e masani lava e fa ona itu, e

aofia ai se lotoa tutotonu mo meaola, e siosiomia e potu faatafafa puipui e malolo ai tagata. O nei tamai potu faatafafa e mafai ona faamauualuga teisi a’e ia tagata mai a latou meaola, e tatala faitotoa ina ia mafai ai e tagata ona vaavaai a latou meaola. O le Faaliliuga a Iosefa Samita o le Luka 2:7 o loo ta’u mai ai sa leai se avanoa mo i la’ua i le “fale e tali ai malo,” o lona uiga ua tutumu uma tamai potu faatafafa puipui o le afeafe tele e tali ai malo.

O le manatu faapea sa lei talileleia pe sa agaleaga ia pule o faletalimalo, atonu e le sa’o. O tagata foi iina i lena taimi e mautinoa e pei foi ona i ai i le taimi nei e—talimalo lelei. Aemaise lava e tatau ona moni lena mea i se vaitau e faatupulaia ai le faitau aofai masani o Ierusalem ma lona tuaoi o Peteleema i le toatele o tagata o aiga o le nuu.

I se afeafe e tali ai malo i le atu Asia, sa malupuipua meaola mo le po i le tulimanu o le lotoa. I lena lotoa e ono i ai ni asini, taifau, mamoe, atonu foi o ni kamela ma ‘oti, faatasi ai ma otaota ma le manogi o meaola.

Ona ua tutumu ia faleapitaga talimalo sa siosiomia ai le lotoa, atonu na faia ai e Iosefa le faaiuga e tapena le faatosagaina o Maria i le ogatotonu o le lotoa sa i ai se afeafe e tali ai malo, i le mea sa i ai meaola. E matuai foliga mai ai lava o se tulaga mauualalo faapena na soifua mai ai le Tamai Mamoe a le Atua.

E faalua ona ta’u mai i le Luka 2 le aui i le ie. O le a le uiga o le fasifuaitau “aui i le ie” (Luka 2:7)? Ou te lagonaina le taua e sili atu i le faaaogaina o se napekini masani po o se ie mafanafana masani. Nai lo na upu e lima i le tusiga

faa-Peretania, e na o le tasi le upu o loo faaaoga i le tusiga faa-Eleni o le Feagaiga Fou. O lena upu o le *sparganoo*, o se veape o lona uiga o le aui o se pepe meamea i se ie faapitoa, o ona pito e fesaua'i mai le tasi itu i le isi itu.⁴ Atonu e i ai i le ie se faailoga faaleaiga e le mafaamatalaina. O lena faiga sa faapitoa ona faatatau i le fanau mai o se atalii ulumatua.

Sa faasilasila mai e le agelu, "O le faailoga lenei ia te outou; e iloa e outou le tama meamea ua aui i le ie, o loo taotaota i le fale povi" (Luka 2:12). O le ie na aui ai o Ia e maunitino lava sa iloagofie ma iloga.

E faapefea le moega vaovao? O tagata e tautatala faa-Farani latou te iloa o le *moega vaovao* o lona uiga o le "aai ai." O le moega vaovao o se faatanoa po o se atigi pusa i se falemanu e fuafua e tuu ai meaai mo meaola. Atonu o se faatanoa, sa maualuga a'e mai le palapala o le lotoa, o le mea aupito sili lea ona mama sa avanoa. O lena faatanoa e fafaga ai meaola, na avea o se moega pepe mo lo tatou Alii!

O Tuua E Le Mafaatusalia o le Faola

E sili atu ona taua nai lo le mea maualalo na soifua mai ai le Faola o Ona tuua e le mafaatusalia. E tele mau o loo faia le fesili "O ai na te tala atu Lona tupulaga?" (Isaia 53:8; Galuega 8:33; Mosaea 14:8; 15:10). O lona uiga "O ai o le a talatalaina Lona gafa?" I le taimi nei, i le lua afe tausaga mulimuli ane, ua tatou folafolaina o Iesu le Keriso na soifua mai i se Tama tino ola pea ma se tina i la le tino. Mai Lona Tama tino ola pea, na maua mai ai e Iesu le mana e ola ai e faavavau. Mai Lona tina i la le tino, na Ia maua mai ai le tulaga lē ma'alofia o le oti faaletino.

Sa faailoa mai e Iesu nei mea moni ina ua aafia ai Lona lava soifua: "E leai se tasi na te aveeseina ia te au," Na Ia fetalai ai, "a e peitai a'u ou te tuuina atu e a'u lava. O ia te a'u le pule e tuuina atu ai, o i ai foi le pule e toe aumai ai. Ua ou maua lena poloaiga mai lo'u Tama" (Ioane 10:18).

O na uiga auau mama tulaga ese o Ona tuua, sa tatau ona i ai mo Lana misiona e togiola mo agasala a tagata uma. O lea, sa soifua mai Iesu Keriso ina ia maliu ona toetu mai ai lea i le ola e faavavau (tagai 3 Nifae

27:13–15). Na maliu o Ia ina ia mafai ai ona tatou toe ola. Sa soifua mai o Ia ina ia mafai ai ona faatoafilemu tagata uma mai le tiga o le oti ma ola ai i talaatu o le tuugamau (tagai 1 Korinito 15:55; Mosaea 16:7–8; Alema 22:14; Mamona 7:5).

Na faatino Lana Togiola i Ketesemane, lea na Ia afutoto ai (tagai Luka 22:44), ma luga i Kolokota (po o Kalevaria), lea na si'i a'e ai Lona tino i luga o se satauro i le "mea o i ai le ulupoo," lea e faatusa i le oti (Mareko 15:22; Mataio 27:33; tagai foi 3 Nifae 27:14). O lena Togiola aoao e lē gata o le a faasaoloto mai ai le tagata mai le oti e lē gata (tagai 2 Nifae 9:7). O le Togiola a le Faola ua avea ai le toetu o se mea moni ma le ola e faavavau o se avanoa mo tagata uma. O Lana Togiola ua avea ma vaega autu o le talafaasolopito o tagata uma.

Na faamamafa mai e le Perofeta o Iosefa Samita, o lē na faapea mai, "O mataupu faavae autu o lo tatou talitonuga o *molimau* a le au Aposetolo ma Perofeta, e faatatau ia Iesu Keriso, o lea na Ia maliu, ma tanumia, ma toetu mai i le aso tolu, ma afio a'e i le lagi; ma o isi mea uma e faatatau i lo tatou talitonuga ua na o ni faaopoopoga i ai."⁵

O lenei tautinoga o le musumusuga mautu lea sa taialaina ai le Au Peresitene Sili ma le Korama a Aposetolo e Toasefululua i ni nai tausaga ua mavae ina ua tatou tulata i le lona 2,000 tausaga o le soifua mai o le Faola. O i matou, o alii e toa 15 ua tuuina mai i ai ki o le malo, sa saunia a matou molimau tusitusia. Sa matou faaulutalaina "O Le Keriso Soifua: O Le Molimau a Aposetolo."⁶ Ona tofu faapiii lea i ai e Aposetolo e toa 15 sa i ai i lena taimi lana saina i lena molimau.

O tagata taitoatasi ua i ai se molimau i le Alii, ua i ai le avanoa, i le faatuatua e iloa ai Ona tuua paia ma molimau atu o Iesu o le Alo o le Atua soifua. O le molimau faamaoni e aofia ai le mea moni na faaali le Tama ma le Alo i le Perofeta o Iosefa Samita, lea tatou te faamanatuina lona aso soifua i le 23 o Tesema. O lena molimau e aofia ai le mea moni O Le Ekalesia a Iesu Keriso o le Au Paia o Aso e Gata Ai e moni ma o loo taitaia e se Alii soifua e ala mai i valoaga ma faaaliga i taitai ua faatagaina, o ē mauaina ma tali atu i le taitaiga mai ia te Ia.

E oo lava i taimi aupito tugā o le olaga faaonaponei,



O le Togiola a le Faaola ua avea ai le toetu o se mea moni ma le ola e faava-vau o se avanoa mo tagata uma. O Lana Togiola ua avea ma vaega autu o le tala-faasolopito o tagata uma.

e aumaia ia i tatou e lenei iloa le filemu ma le olioli. “Ia fiafia,” na fetalai mai ai le Alii, “ma aua le fefefe, aua o A’u o le Alii ua ou faatasi ma outou, ma o le a tu i tafatafa o outou; ma o le a outou molimau atu A’u o Iesu Keriso lava, o A’u o le Atalii o le Atua soifua, ma sa Ou i ai, ma o loo Ou i ai, ma o le a Ou alu atu” (MF&F 68:6). Ma le faanaunau, tatou te taofimau ai i Ana folafolaga faamanuia.

O La Tatou Meaalofa ia te Ia

O loo fotua’i mai aso faigata. Ua faateleina le agasala. Sa muai vaai Paulo i tagata o le Ekalesia o le a onosaia sauaga (tagai 2 Timoteo 3:1–13; MF&F 112:24–26). Sa apoapoi mai Peteru, “Afai e faatigaina se tasi aua o ia o le Kerisiano, aua le maasiasi ai o ia, a ia vivii atu i le Atua ona o lea lava mea” (1 Peteru 4:16). Talu ai na afio ifo Iesu i lalo i mea uma ina ia tulai i luga a’e o mea uma, ua faamoemoe foi o Ia ia tatou mulimuli i Lana faataitaiga. A tauamo faatasi ma Ia, ona mafai lea e i tatou taitoatasi ona tulai i luga a’e o o tatou luitau uma, tusa lava po o le a le faigata e foliga mai ai (tagai Mataio 11:29–30).

Mafaufau i mea uma na faia e le Faaola—ma o loo faia pea lava—mo i tatou, o le a se mea e mafai ona tatou faia mo Ia? O le meaalofa aupito silisili e mafai ona tatou foai atu i le Alii i le Kerisimasi, po o se isi lava taimi, o le tausisia lea o i tatou lava ia lē pona mai le lalolagi, ia agavaa e auai atu i Lona malumalu paia. Ma o Lana meaalofa ia i tatou o le filemu i le iloina lea ua tatou saunia e faafetaia’i ia te Ia, pe a oo mai lena taimi.

O le atoaga o le misiona a le Matai o loo taoto i le lumanai. E lei faataunuuna valoaga o Lona Afio Mai Faalua. E moni, i le Kerisimasi, tatou te tulaia atu ai i Lona soifua mai. Ma o le a toe afio mai o Ia i lenei lalolagi. I Lona Afio Mai Muamua, sa toetoe lava ina afio mai faalilolilo Iesu. Sa na o ni nai tagata na iloa Lona soifua mai. I Lona Afio Mai Faalua, o le a iloa e tagata uma Lona toe foi mai. Ma o le a afio mai o Ia, e le pei “o se tagata o malaga i le lalolagi” (MF&F 49:22), ae “faaalua mai le pupula o Ieova, e vaaia lava e tagata uma faatasi” (Isaia 40:5; tagai foi MF&F 101:23).

I le avea ai o se molimau faapitoa i Lona suafa paia, ou te molimau atu ai o Iesu le Keriso o le Alo paia o le Atua soifua. O le a alofa o Ia ia te oe, si’i a’e oe, ma faailoa atu Ia lava ia te oe pe afai e te alofa ia te Ia ma tausii Ana polo-aiga (tagai Ioane 14:21). Ioe, o loo ifo atu pea ia te Ia o alii ma tamaitai atamamai. ■

Mai se saumoaga i se faigalotu na tuuina atu i le Iunivesite o Polika Iaga i le 10 Tesema, 2002. Mo le anotusi atoa i le Igilisi, asiasi i le speeches.byu.edu.

FAAMATALAGA

1. Tagai Eric D. Huntsman, “Glad Tidings of Great Joy,” *Ensign*, Tes. 2010, 54.
2. Tagai i upu numera 2,596 ma le 2,646 i le James Strong, “Greek Dictionary of the New Testament,” *Strong’s Exhaustive Concordance of the Bible* (1890), 39, 40.
3. Tagai *Merriam-Webster’s Collegiate Dictionary*, 11th ed. (2003), “caravansary” ma le “khan.”
4. Tagai i le upu numera 4,683 i le “Greek Dictionary of the New Testament,” 66.
5. *Aoaoga a Peresitene o le Ekalesia: Iosefa Samita* (2007), 53; faaopoopo le faamamafa.
6. Tagai “O Le Keriso Soifua: O Le Molimau a Aposetolo,” *Liahona*, Ape. 2000, 2–3



O LE AUALA I le Malumalu

E ui lava ina eseese ala e ui ai tagata o le Ekalesia, ae ua iloa e le Au Paia o Aso e Gata Ai i Iukureini o auala uma lava o le amiotonu e tau atu i le malumalu.

Saunia e Chad E. Phares

Mekasini a le Ekalesia

O le malaga atu i taavale a’o lei tafa ata i le Auala o Kiltseva i Kyiv, Iukureini, na maua ai e le au malaga se ala e matuai toafilemu i le Malumalu o Kyiv Iukureini. Sa na o ni nai moli o taavale sa susulu i le puaoa o le taeao a o faatafatafa ese atu taavale i nai omoomo laiti.

O le susulu o le malumalu i luma atu sa avea o se moli faailo, na aumaia ai se sulu taiala e faaali atu ai ia i latou o loo malaga atu i le malumalu le mea tonu e tatau ona o i ai.

E ui ina sa faamanuiaina nisi e mulimuli i lenei ala toafimalie i le malumalu talu ona faapaiaina ia Aokuso 2010, e mafai foi e isi ona faamaonia sa le’i laulelei lo latou ala i le malumalu.

Ina ua tafa mai ata ma ua oso mai foi le la i le tafailagi, sa faatumulia le Auala o Kiltseva i taavale laiti ma pasi. Ua lilofia nei i taavale, ma o le ala sa toafimalie ua avea nei ma nofoaga pisapisao ua paka ai taavale.

I le iloa ai o le pisi o feoa’iga o se vaega masani o le auala, o le toatele o tagata e o i le malumalu sa i luga o le auala, sa o ma le

onosai a latou taavale mo nai futu i le taimi ona tutu foi lea. O le malumalu lava le mea e o i ai, ae sa telegese le o a taavale.

O isi na filifilia nisi auala. I tua atu o le malumalu e i ai ni auala e le faatāina ma ni magaala ‘alo. E le manino le makaina o le ala, ma e faigofie lava ona toe foi avetaavale. Peitai, afai e tilotilo i luga le avetaavale, e mafai e ia ona iloa atu le tumutumumu o le malumalu, lea lava e avea ma se taiala, e valaaulia tagata uma e o mai i le malumalu.

O ala faaleagaga na ui ai tagata o le ekalesia i Iukureini ina ia oo i le maota o le Alii, e le faapea e le tutusa ma auala o loo siomia ai le malumalu.

E ui ina i ai ni talavou ua faamanuiaina i le ola a’e i totonu o le Ekalesia ma ua mafai nei ona auai atu i le Malumalu o Kyiv Ukraine e fai o latou lava sauniga, e toatele isi na ui atu i le fe’oma’i o feoa’iga faaleagaga ina ia oo atu iina.

O le malumalu, na fofogaina mai i le 1998 e Peresitene Gordon B. Hinckley (1910–2008), na mae’a i le 2010. I na tausaga e 12, e toatele



**Mai luga: Asiya ma Nikolai Chemezov na faa-
mauina i le Malumalu o Kyiv Iukureini ina ua
mavae aso e tolu talu ona faapaiaina. E faa-
fetai Petr ma Adalina Mikhailenko ua mafai e
le tama teine a le la tama, o Masha, ona sagi-
sagi fiafia atu e auai i le malumalu i lona lava
nuu. Sa asiasi soo Andrei ma Valentina Dudka
i le nofoaga o le malumalu a o fausiaina.**

tagata o le Siteki a Kyiv Iukureini sa nonofo ai lava i le ala—e ui lava ina tuai tele—ma vaiti, ae sa faatalitali pea ma le onosai mo le malumalu se’ia mae’a. O isi na ui i nisi ala ese, ma galoma atu ai mo sina taimi a latou sini mo le malumalu.

Po o le a lava le eseese o ala faaleagaga o loo ui ai tagata o le au paia ina ia oo atu ai i le malumalu, ae ua iloa e tagata faamaoni o le Ekalesia i Iukureini o auala uma lava o le amiotonu e toe taitai atu ai i latou i le malumalu.

O Le Ala Sa’o

E toatele talavou matutua o le Ekalesia i Europa Sasae sa taitai mai i le talalelei a o laititi. O lena uluai iloa o le talalelei ua le gata ina mafai ai e i latou ona atiina ae molimau mai lo latou talavou ae ua fausia ai se faaiuga malosi ina ia faaiipoipo i le malumalu.

O Nikolai Chemezov ma lona toalua, o Asiya, o le Uarota a Kharkivs’ki, sa muai faailoa atu i ai le talalelei a o laititi i la’ua—Nikolai i le valu o ona tausaga a o Asiya a o talavou.

“Talu ona ou papatiso, sa ou iloaina o le fuafuaga a le Tama Faalelagi o le ala lea i le faaeaga,” o le tala lea a Uso Chemezov. “O aoaoga a le Ekalesia i le misiona paia a le aiga sa taua pea lava pea ia te au.”

Sa iloaina foi e Tuafafine Chemezova le taua o aiga e faavavau a o laititi o ia. “Ina ua ou auai i le ekalesia o se tamaitai talavou, sa aooina au i le taua e ulu atu ai i feagaiga paia o le malumalu,” o lana tala lea. “Sa ou moemiti pea i se faaiipoipoga i le malumalu, ma sa ou taumafai pea lava ia ou agavaa ia mafai ai ona ou faaiipoipo i le malumalu.”

Sa amata ona tafafao faamasani i la’ua i le 2009. Ina ua totogo a’e le alofa ma ua amata foi ona liliu atu talanoaga i le faaiipoipoga, sa iloa e le toalua lea la la’ua laasaga e sosoo ai. “Ina ua fofogaina mai o le a faapaiaina le Malumalu o Kyiv ia Aokuso 2010, sa tonu ia i ma’ua o le a faamauina i ma’ua iina,” o le tala lea a Tuafafine Chemezova.

“Manaia e lei umi ona ma faatalitali,” na faaopoopo mai ai Uso Chemezov.

Sa faamauina le ulugalii i le faaiipoipoga i le aso 1 o Setema, 2010.

“O le aso e sili ona matagofie lea o lo’u olaga,” le tala lea a Uso Chemezov. “Sa ou lagona le fiafia e u’u le lima o la’u pele o Asiya ma ave o ia i le maota o le Alii. E sili le faapea atu o le aso lena na faataunuuna ai la’u miti—o le miti o le fatuina o se aiga e faavavau.”

O Le Ala Umi

E ui ina sa sa’o le ala i le faaiipoipoga e faavavau mo tagata o le Uarota a Vynohradars’kyi o Petr ma Adalina Mikhailenko, ae sa matua umi naua. O le au Mikhailenko o se tasi o uluai aiga na auai i le Ekalesia i Iukureini, na papatiso i le 1993—na o le lua tausaga

*O le Malu-
malu o Kyiv
Iukureini, o
le malumalu
lona 134 lea o
le Ekalesia ua
faagaioioia, o
loo tautuaina
ai tagata o le au
paia i atunuu
e iwa.*

talua ona faavaeina le uluai paranesi i Kyiv.

E ui o lea, o le mamao mai le malumalu ma isi tulaga moni na taofia ai le ulugalii mai le faamauina i le malumalu mo le tele o tausaga. E aunoa ma le lotovaivai, sa tumau pea lo la'ua faamaoni a'ia'i o le tasi i le isi ma la la'ua miti mo se faaipoipoga e faavavau.

“Sa ou faatalitali ma le onosai mo le malumalu,” o le tala lea a Uso Mikhailenko. “Sa leai lava se manatu e tuua le Ekalesia. Sa manino i taimi uma le ala.”

Ina ua uma ona faapaia e Peresitene Thomas S. Monson le malumalu ia Aokuso 2010, sa matua le ma taofiofia le naunau o le toalua lea ina ia faamauina. “Sa ma usupo mai tele i le aso sa tataua ona faamau ai i ma'ua ae e lei tatalaina le malumalu,” o le tala lea a Tuafafine Mikailenko.

Sa le na o lea ulugalii. E toatele tagata o le uarota sa o mai ai foi i le malumalu i lena aso, ma le naunau e olioli faatasi ma le au Mikhailenko.

“Sa matagofie le faamauga,” o le tala lea a Tuafafine Mikhailenko. “Sa i ai se lagona e pei e te le'i alofa moni lava i lou toalua e pei ona e alofa nei i ai i lena taimi.”

Na uunaia lagona o le alofa talu mai lena aso. “Ua i ai se eseese mautinoa i la ma sootaga,” o le tala lea a Uso Mikhailenko. “Ua leva ona ma faaipoipo, ae o lea ua i ai nei se lagona ese. Ua ma mananao e faia nisi mea se tele e le tasi mo le isi, ma ua ma faia ma le alofa ua tele atu.”

Toe Foi i le Ala

O Andrei ma Valentina Dudka o le Uarota a Vynohradars'kyi sa uluai faafeiloai atu i le talalelei e ni tuaoi i le 2003. Ina ua mavae ni feiloaiga mo ni nai vaiaso ma faifeautalai, sa tonu loa i le toalua lea e auai i le Ekalesia.

E ui ina sa naunau le au Dudka e aoao i upumoni o le talalelei e pei o le manaomia o malumalu i aso e gata ai ma le tulaga e mafai ai ona maua se aiga e faavavau, ae sa faifai malie lava ona se'e atu i la'ua i le lē toe toaaga mai. “Sa na ona ma sueina o mafuaaga e le o ai i le lotu,” o le tala lea a Tuafafine Dudka. “Sa ma faatagaina mea e tula'i mai—pei o le, ua ma le lavavā tele po o le, e i ai le ata ma te fia matamata ai i le TV.”

O le le toaaga mai o le au Dudka na matua aafia ai lo la'ua fiafia. “Sa amata ona ma vaaia se eseese moni i le va o le olaga i le Ekalesia ma le olaga faalelalolagi ina ua ma tuua le Ekalesia,” o le tala lea a Uso Dudka. “Ma te le'i fiafia.”

Pe tusa ua fa masina ma te lei toe o i le lotu, ae taunuu Tuafafine Dudka i lona tulaga e faia ai se suiga. “Na oo mai se Aso Sa patino, ma sa ou faapea atu, ‘Afa'i ou te le alu i le asō, atonu ou te le ola,’” o lana tala lea.

“Sa pei a'u o se tagata ua tele ni aso e le o inu. Sa ou manaomia lena vai.”

Ina ua toe toaga mai, sa tatalo ma le onosai Tuafafine Dudka mo lona toalua ma faamalosiaina e toe foi mai i le lotu. Pe tusa ma le afa tausaga talu ona toe foi mai o ia i le lotu, ae toe foi mai lona toalua.

“O tatalo a lo'u toalua na aafia ai au,” o le tala lea a Uso Dudka. “Sa ou iloaina o le umia ai o le Perisitua Mekisateko, sa ia te au le tiutetauave e avea ma tagata toaga. Sa ou iloaina a aunoa ma le Atua, e leai se mea ou te mafaia.”

Ina ua toe foi mai le au Dudka i le Ekalesia, sa toe foi o la'ua mafaufauga i sauniga laveai o le malumalu. Sa auai le ulugalii faatasi ma isi o le Au Paia o Aso e Gata Ai o Iukureini e talisapaia le suatiaina o le eleele o le malumalu i le 2007.

“Ina ua mavae le amataga o le fausiaina o le malumalu, ma te o mai soo lava tau lava ina vaavaai i le galuega sa faia,” o le tala lea a Uso Dudka.

“Sa matua ou oso i luga ina ua ou vaaia i latou o tuuina ifo le ulua'i maa,” na faaopoopo mai ai Tuafafine Dudka.

Ina ua faatuina le faatagata o le agelu o Moroniae i le tumutumu o le malumalu, sa anoanoai ni feopoa'iga ma loimata o le Au Paia aemaise lava i le au Dudka.

“Ina ua mae'a le fausiaina o le malumalu, sa i ai le mafanafana aua sa ma iloaina ua ma agavaa e ulufale i ai,” o le tala lea a Uso Dudka.

Fai mai le au Dudka, o le faamauina i le malumalu na fausia ai ia i la'ua se vaaiga malosi atu o le faavavau i le olaga. “Ua e malamalama o lou aiga ua le na o oe ma lau tane—o lea ua avea nei le Alii ma se vaega,” o le tala lea a Tuafafine Dudka. “Ua tilotilo atu le tasi i le isi i mata o le faavavau.” ■

O Le Ki i Avanoa

FAAMANATUINA O LE 10 TAU- SAGA O LE TUPE FAAAGAGA MO AOGA



I le sefulu tausaga talu ona fofogaina mai e Peresitene Gordon B. Hinckley le Tupe Faaagaga mo Aoga, ua matua faamanuiaina le fuafuaga ma ona tagata auai.

**Saunia e
Rebekah Atkin**
Mekasini a le Ekalesia

I le 1850, na o le tolu tausaga talu ona taunuu mai i le Vanu o Sate Leki, sa amataina ai e Peresitene Polika Iaga (1801–77) ona faatuina a’oga ma iunivesite e aoga ai le Au Paia o Aso e Gata Ai. Sa faamalosiua ina e perofeta uma o lenei tisipenisione le aoaoina o tagata o le Ekalesia.

O se tasi o i latou o Peresitene Gordon B. Hinckley (1910–2008), o lē sa faatomua maia le Tupe Faaagaga mo Aoga (TFA), e mamau i se tasi o fuafuaga a Polika Iaga i le seneturi lona 19, o le Tupe Faaagaga mo Femalagaaga. O lenei teugatupe faaleaoaoga o le a avea, i upu a Peresitene Thomas S. Monson, o se tasi o pinefaamau iloga o le taitaiga a Peresitene Hinckley.¹ Na silasila Peresitene Hinckley i le mativa ma le lē lava o aoaoga ma le aoaoina ua taofia ai le toatele o talavou matutua o le Ekalesia mai le ausiaina o mea latou te gafataulimaina. Sa ia saili atu i le Alii mo ni tali.

I le konafesi aoao i le aso 31 Mati, 2001, sa fofogaina mai ai e Peresitene Hinckley lana vaaiga mamao i le polokalama. Sa ia ioe o se “taumafaiga matautia” ae o loo i ai le “aoaoga o le ki lea i avanoa.”² Sa valaaulia e Peresitene Hinckley i latou uma o ē fia fai saofaga i ai, ina ia faia, ma sa amataina loa le polokalama.

O lea, i le 10 tausaga mulimuli ane, o saofaga tetele ma saofaga laiti mai tagata foai i le lalolagi atoa ua mafai ai e le fuafuaga—ma ona tagata auai—ona manuia. Na saunua Elder John K. Carmack, o se Fitugafulu ua faamalolo faamamaluina ma o le Faatonu Sili o le TFA, “ua laveai mai ai le Au Paia mai le fetu’u o le mativa.” Ua manuia i lenei laveai, o le tala lea a Rex Allen, o le faatonu volenitia o aoaoga ma fesootaiga mo le TFA, aua sa faavae i luga o mataupu faavae e faavavau ma o loo aumaia faatasi ma folafolaga faaperofeta e i ai “se aafiaga e sili atu ona o’o’o e le mafai e se tasi o i tatou ona malamalama i ai.”

I le sefulu tausaga talu lona amataga, ua faaleleia atili e le Tupe Faaagaga mo Aoga ia olaga o le 50,000 tagata auai i atunuu e 51, e pei o Kevin Moore o West Indies ma tagata mai Peru (tauagavale).



2001

FAATUPULAIA O LE FUAINUMERA O TAGATA AUAI I TAUSAGA

2011



UA ANOANOAI I LATOU UA AUAI I LE TFA

O le Tupe Faaagaga mo Aoga ua faamanuiaina ai olaga o le silia ma le 50,000 tagata ua auai i atunuu e 51 i le 10 tausaga ua tuanai. O nisi nei o fuainumera e uiga i nei talavou matutua:

- 47 pasene o alii, 53 pasene o tamaitai.
- 34 pasene ua faaipoipo.
- 80 pasene o alii o faifeautalai ua mae'a misiona.
- 82 pasene e faigaluega a o loo aoga.
- O le averesi o le matutua e 24.5.
- E 2.6 tausaga le averesi latou te faamae'a ai a latou a'oga.
- E faatoluina pe faafaina le tele o a latou tupe maua pe a mae'a a latou a'oga.

O Se Taumafaiga Matautia

Sa faamalamalama mai e Peresitene Hinckley i le 2001, o le teugatupe na faavae mai foi tautupe; o le tului o loo maua mai i le tupe faavae o loo nono atu i tamaiti ua faamoemoe e aoga.

O talavou matutua e fia auai e mafai ona faafesootai taitai perisitua i le lotofale ma faatonu o le inisitituti. Faatasi ai ma la latou faamaoniga e maua ai e nei "alii ma tamaitai talavou sogasoga," o le toatele lava ua mae'a misiona, ia nonogatupe e o ai i a'oga i o latou lava nuu.³ A o i ai lava i a'oga, latou te amata totogiina le nonogatupe, ina ia mafai ai e isi tamaiti a'oga ona faaogaina foi lea tupe.

I le sefulu tausaga talu lona amataga, ua faaleleia e le polokalama ia olaga o le 50,000 tagata auai i atunuu e silia ma le 50, ua fesoasoani ai ia te i latou e "tulai ese mai le mativa sa feagai ma i latou ma augatupulaga na muamua ia i latou," e pei ona saunoa ai Peresitene Hinckley.⁴

Ua faamatalaina e Uso Allen le TFA i le ala leni: "Sa faia e le perofeta se mea ofoofogia i lena aso. I aso lava la ua leva, sa faaloaloa ai e Mose lona tootoo i luga o le Sami Ulaula ona vaeluaina ai lea o le sami. Sa faaitai foi e Peresitene Hinckley lea lava faatuatua ina ua ia faaloaloa atu faavaoli'a lona ofutalaloa i luga o le vasa pogisa o le mativa ma amatatia le TFA."

Mataupu Faavae

O le Tupe Faaagaga mo Aoga o loo fausia i luga o se faavae o mataupu faavae o le talalelei—faatuatua ma le faamoemoe ia Iesu Keriso, aoaoga, galuega, ositaulaga, faalagolago o le tagata ia te ia lava, amiosa'o, ma le auuna atu. Ua faatinoina e tagata auai o le TFA ma le au faau'u i le lalolagi atoa nei mataupu faavae i o latou olaga.

Fai mai Carolina Tello Vargas, o se ua faauu mai Kolumipia, o le TFA o "se 'ave o le faamoemoe" ma o se faamaoniga o le fesoasoani a le Tama Faalelagi, o le "o loo taialaina

[o ia] ma tatalaina le ala i le alualu i luma."

Ua malamalama o ia i le taua o a'oga ma le galue ma le ositaulaga o loo alu ai. A o le'i auai o ia i le TFA, sa faigaluega Carolina i ni galuega se tele ma sa ia faatauina atu ana maataua ina ia mafai ai ona a'oga i le tulafono. Sa ositaulaga foi lona aiga.

"Sa ou iloa ina ia mafai ona suesue, e tatau ona ou ositaulaga," na faamatala ai e Carolina. "Sa ou naunau e faia ina ia ou maua ai ni avanoa faigaluega e sili atu i le lumanai."

Peitai o le taimi lena na tulai mai ai luitau i lona aiga i lona tausaga faaii i le a'oga, ma sa le mafai ai ona ia totogiina lona pili. Sa ia maua se nonogatupe mai le TFA ma sa faaogaina e faamae'a manuia ai lona faailoga.

O loo ola foi Shirley Mwelase o Aferika i Saute i nei mataupu faavae. Sa ia faaogaina se nonogatupe mai le TFA e faamae'a ai lana kosi o le faapolokalamaina o komepiuta, ma ina ua ia maua se galuega i se kamupani inisiua, sa vave ona totogi uma le mea na totoe o lana nonogatupe, ma sa fesoasoani e lagona ai lona "faalagolagoina ma le faatuatuaina."

Sa faamatala e Shirley, "O se galuega e lelei se totogi o lona uiga o le maualuga foi lea o le lelei o le olaga. O lona uiga e mafai ona ou fesoasoani i o'u matua ma le aiga, ma ua fesoasoani tele nei tomai ma le faaleleiga atili ua ou maua mai le faigaluega, ua sili atu ai la'u auunaga i o'u valaauga uma i le Ekalesia."

O le faigaluega o se faipolokalama komepiuta, ua tele naua ai mea ua ia ausia. Fai mai a ia, "Ua ou lagona ana leai a'u suesuega ma lo'u auai pea lava pea i le lotu, semanu e leai sa'u galuega, semanu foi e le mafai ona ou ausia se tasi o nei mea lelei."

O Folafolaga ma Faamanuiaga

Ina ua fofogaina mai e Peresitene Hinckley le Tupe Faaagaga mo Aoga, sa ia folafola mai o le a aumaia ai faamanuiaga i tagata taitoatasi, i o latou aiga ma nuu, faapea le Ekalesia



FUA E 10 O ULUAI TAUSAGA E 10

Na saunoa Elder John K. Carmack, Faatonu Sili o le TFA, o lea tupe ua maua mai ai fua nei:

1. Ua fausiaina le faalagolago o le tagata ia te ia lava ma le amiosa'o: faataunuuina ai matafaioi ma saunia mea mo aiga.
2. Faalateleina le alualu i luma e faavavau: o le mauaina o le atamai i lenei olaga o le a aoga tele i le isi olaga (tagai MF&F 130:18–19).
3. Ua atiina ae ai taitai tomai: maua ia galuega e sili atu e mafai ai ona maua le taimi e auauna ai i le Ekalesia.
4. Tatalaina avanoa e ala i a'oa'oga: agavaa ai mo galuega e manaomia ai aoaoga ma tomai patino.
5. Faamauoa ai olaga: faalautele ai le malamalama ma matala ai mafaufau.
6. Uunaia ai le agaga o le tulafono o le faapaiaoga: valaaulia ai tagata uma e saofagā, ma latalata ai ina tasi (tagai MF&F 38:27).
7. Fesoasoani e tausia e matitiva: faataunuuina se matafaioi autu o le Ekalesia (tagai MF&F 81:5; 83:6).
8. Fausia aiga e sili atu ona malolosi: o ese mai i le li'o o le mativa.
9. Atiina ae aga masani o le lelei silisili: faaagaina mataupu faavae o le talalelei.
10. Mulimuli i le faataitaiga o le tau-laga a le Faaola: foai atu o a tatou mea e fesoasoani ai i isi.




atoa e ala i avanoa mo galuega, auaunaga, ma le taitaiga.

Sa folafola mai e peresitene Hinckley o le a mafai e tagata auai ona “maua tulaga lelei faaleaoaoga o le a siitia a’e ai i latou mai le matautia o le mativa. . . . O le a latou faaipopo ma fetuleni atu i luma ma tomai latou te agavaa ai mo galuega lelei, ma maua ai o latou tulaga i nuu lea e mafai ai ona tele so latou sao.”⁵

Ua faataunuuina lenei folafolaga mo le fiaafe o tagata auai i le TFA, e aofia ai Pable Benitez o Iurukuei. Sa faigaluega Pablo i le 12-itula i le aso i se faleoloa, sa tau le ‘a’u’a’u le faasoa e ola ai, ae tonu loa ia te ia e suia lona olaga. Sa amata ona alu i le aoga, ae ona ua sii le totogi o a’oga, sa ia iloa ai e le mafai ona ia faatupeina na o ia lana a’oga.

O le TFA na mafai ai ona faauma sona tikeri i a’oga faamalositino. O le taunuuga, sa tele ni ana galuega na maua i le gasologa o tausaga, o galuega taitasi sa faaleleia atili ai ana tupe maua. Sa ia lipotia mai, “E tele lava ina ou maua galuega e ofo mai mo le taimi atoa po o le sui i isi sa le mafai ona ou taliaina ona e le

O Miriam Erquiza, o se tasi ua mae’a le misiona mai Filipaina, sa faafaigaluega i se ofisa malaga; o itula faigaluega ua faataga-ina ai o ia e galue o se peresitene o Tamaitai Talavou ma se faiaoga o le inisitituti.



PE FAAPEFEA ONA AUAI

Ua otooto mai e le TFA se faagasologa e lima-laasaga mo i latou o ē o nonofo i eria ua faamaonia e auai i le polokalama. Mo nisi faamatalaga e uiga i le faagasologa po o mea e agavaa ai, asiasi ane i le pef.lds.org. Ina ia amata, talanoa i lou taitai perisitua i le lotoifale po o le faatonu o le inisitituti.

Laasaga 1: Miti—Aoa o uiga i le polokalama o le TFA ma pe o maua i lo outou eria ma auai i le faeasaite faaleaoaoga ma mea tau galuega a la outou siteki.

Laasaga 2: Fuafua ma ia agavaa—Auai i le mafutaga faaleaoaoga o le Fuafuaina mo le Manuia i la’u inisitituti ma saili le faamaoniga ma le fautuaga a ou taitai perisitua.

Laasaga 3: Talosaga—Faatumu i le ininetoni le talosaga mo le TFA, e faavae i mea ua e aoaoina mai le mafutaga faaleaoaoga o le Fuafuaina mo le Manuia.

Laasaga 4: Tautino—Afai e faamaonia, auai i faatalanoaga mo le nonogatupe i le TFA, lea e te malie ai e faataunuu au tautinoga.

Laasaga 5: Suesue, faau’u, faaleleia le galue, ma toetotogi le nonogatupe—Faaaoga lou faatuatua ma faatino taumafaiga, amiosa’o, tautinoga, ma le ola faalagolago ia te oe lava; galue malosi e faataunuu au miti.



lava lo’u taimi. Ma o nei mea uma e faafetai ai i le TFA ma avanoa sa tatala mai ia te au ona o a’u aoaoga.”

Ona o avanoa sa maua e ala mai i a’oga, ua mafai ai e Pablo ona lagolago lona aiga a o au auna atu o ia ma atiina ae lona nuu i le avea ai ma se faiaoga.

O le galue ai i itula uumi ae tau le lava se tupe e maua e totogi ai mea e ola ai ma le sefuluai, e mafai ai ona avea le au auna i le Ekalesia o se lu’itau tele, o le saunoaga lea a Brother Allen. O se tauviga lea mo le toatele o tagata o le Ekalesia i le lalolagi atoa, ae o le folafolaga lena na faia e Peresitene Hinckley e uiga ia i latou e auai i le TFA: “O le a avea i latou ma taitai i lena galuega tele i o latou lava nuu. O le a latou totogiina a latou sefuluai ma taulaga, lea o le a mafai ai e le Ekalesia ona faalautele tele atu lana galuega i le lalolagi atoa.”⁶

E toatele ua auai ua latou iloa o aoaoga ua latou maua e ala mai i le TFA ua tau atu ai i galuega e sili atu ona lelei faatasi ai ma itula ua mafai ai ona tele o latou taimi e au auna ai i le Ekalesia. O Miriam Erquiza,

O Vanderlei Lira o Pasila, sa avea o se peresitene o le paranesi mo le ono tausaga a o faigaluega leipa. Ina ua uma ona faalautele lana a’oga, sa ia faafetai i se nonogatupe i le TFA, ua ia maua ai se galuega fou ma se totogi ua faateleina. E faamatalaina o ia e lona peresitene o le siteki o “se sau’ai ua faasaolotoina e le avanoa.”

o se tasi ua mae'a le misiona mai Filipaina, sa ia faamae'aina se polokalama e mamana ai uepi i le initoneti mo le lua tausaga ma, e ala i le "tatalo faatauanau," sa maua ai se galuega i se ofisa malaga. O lea galuega na mafai ai e ia ona lagolago lona aiga ma maua ai se taimi e avea ai o se peresitene o Tamaitai Talavou ma se faiaoga o le inisitituti.

O Vanderlei Lira o Pasila, sa avea ma se peresitene o le paranesi mo le ono tausaga, ma fesoasoani i lana paranesi e tuputupu a'e mai le 18 tagata e oo atu i le 110 tagata malolosi, a o faigaluega o ia o se leipa aua e le i lelei sana a'oga. Ina ua fofogaina mai le TFA, sa mafai ona ia aoaoina galuega o le saogalemu ma maua ai se galuega fou, lea sa fesoasoani e faateleina ai lona totogi ma sa vave ona ia totogiina ai lana nonogatupe. O loo faaauau pea ona ia auauna atu i le Ekalesia i le taimi nei. E faamatalaina o ia e lona peresitene o le siteki o "se sau'ai ua faasaolotoina e le avanoa."

Sa ta'u mai e Peresitene Hinckley i tagata o le Ekalesia o le a manuia le polokalama aua ua i ai i le Ekalesia "o le faalapotopotoga . . . ma auauna faamaoni a le Alii" e tatau ai mo le manuia.⁷ Ioe, ua manuia le Tupe Faaagaga mo Aoga aua o loo aofia ai le galulue faatasi o tagata auai ma taitai perisitua i lotoifale i lalo o le taitaiga a le Au Peresitene Sili, Korama a Aposetolo e Toa-sequentialua, ma isi taitai aoao o le Ekalesia. O loo taufai punouai foi nofoaga autu o punaoa mo galuega a le Ekalesia ma seminare ma inisitituti i le taumafaiga.



O SE LUMANAI MANUIA

"O Le Tupe Faaagaga mo Aoga . . . ina ia o ese mai le mativa i le tele o vaega o le lalolagi ma saunia ai tomami

ma aoaoga lea e faaagavaaina ai alii ma tamaitai talavou mo le mauaina o ni galuega e totogi lelei. O lenei fuafuaga musuia ua tuuina atu ai se faamoemoega ia i latou o e na lagonaina le leai o se faamoemoega mo i latou e faaleleia ai o latou tulaga ae o lea ua maua nei se avanoa mo se lumanai manuia."

Peresitene Thomas S. Monson, "Na Latou Faailogaina le Ala e Mulimuli Ai," *Liahona*, Oke. 2007, 6.

PE FAAPEFEA ONA FAI SOU SAO

O le manuia o lea teugatupe e faalagolago tele i le agalelei ma le fesoasoani mai o tagata o le Ekalesia ma volenitia i le lalolagi atoa. O ni nai auala nei e ono mafai ai ona e fesoasoani:

- Volenitia faavaitaimi i se nofoaga autu o le TFA i le lotoifale.
- Galulue i le taimi atoa ma lou toalua e avea o se ulugalii matutua faamisiona i le polokalama o le TFA.
- Foai atu i le Tupe Faaagaga mo Aoga.

O aafiaga o le tupe e faaagaga pe faifai pea e le gata i le itu tautupe, aua e toe totogi le tupe ona faaune atu foi lea i isi tamaiti a'oga, ae e faaleagaga foi ma faaagafesootai a o faamanuiaina ai i latou e auai, o ē o loo foa'i i le teugatupe, taitai, ma le isi e le mafaitaulia i soo se itu. "O Aoaoga o le ki lea," o le saunoaga lea a Uso Allen, "e tatala ai faitotoa i se papuipui mausali, e le gata mo tagata taitoatasi ae faapea foi i o latou aiga ma nuu."

I le 10 tausaga ua tuanai, sa fesoasoani tekinolosi ma le potomasani i le faaleleia o le faagasologa mo tagata auai ma faufautua, ae o loo saili pea le Tupe Faaagaga mo Aoga e faataunu le vaaiga faaperofeta na faatuina ai. O lenei "taumafaiga lototoa" o le a tumau pea o se taumafaiga faaperofeta. O loo faaauau pea e Peresitene Monson le galuega a le teugatupe, lea na ia saunoa ai, o le a "mamao lona alu i le lumanai."⁸ ■

FAAMATALAGA

1. Tagai "16th President Fields Questions from Media," *Church News*, Sep. 9, 2008, 15.
2. Gordon B. Hinckley, "O Le Tupe Faaagaga mo Aoga," *Liahona*, Iulai 2001, 62, 67.
3. Gordon B. Hinckley, *Liahona*, Iulai 2001, 62.
4. Gordon B. Hinckley, *Liahona*, Iulai 2001, 62.
5. Gordon B. Hinckley, "E Agai Pea i Luma le Ekalesia," *Liahona*, Iulai 2002, 6.
6. Gordon B. Hinckley, "Aapa Ifo i Lalo e Faatu i Luga Le Isi," *Liahona*, Ian. 2002, 62.
7. Gordon B. Hinckley, *Liahona*, Iulai 2001, 67.
8. Thomas S. Monson, i le "16th President Fields Questions from Media," *Church News*, Sep. 9, 2008, 15.

Asiasi i le peflds.org e faitau i isi tala mai ia i latou o auai i le TFA ma aoao mai ai pe faapefea ona e aofia ai.



*E faigofie ona leiloa lo tatou
ala pe afai e le fesootai a tatou
faaiuga i aso taitasi ma lo
tatou taunuuga faavavau.*

LEILOA & TOE MAUA



Saunia e Adam C. Olson

Mekasini a le Ekalesia

Toetoe lava ina atoa lona 30, ae iloa e Roberta Tuilimu sa le'i fiafia o ia. E toa-tolu lana fanau aulelei, ma sa alofa foi i le tama o lana fanau, o Daniel Nepia, ae e le'i faaiipoipo Roberta ma Daniel. O Daniel e le o se tagata o le Ekalesia, ma sa umi se taimi talu ona auai e le aunoa ia Roberta i le lotu.

Sa mamao o ia mai le faaiipoipoga i le malumu lea sa moemiti pea i ai o se teine talavou sa alu i le lotu i vaiaso uma faatasi ma ona matua i Aukilani, Niu Sila. Peitai, o le fulitua i ana sini o le faavavau sa le o se faaiuga na faia i le taimi e tasi; o se liliu faifai malie na i'u lava ina mae'a e ala i faaiuga laiti sa ia faia i aso taitasi.

“Ou te sailia foi le ua sē, ou te aumaia le ua tulia,
ou te fusia le ua gau, ou te faamalosia le ua vaivai”
(Esekielu 34:16).

Faaiuga E Le Fesootai

Ia Roberta lava ia, e tasi le faaiuga na manino le tu matilatila e pei o le taimi na ia faatoa laa ese ai mai le ala o le talalelei, e ui e i ai isi filifiliga sa aumaia ai o ia i lona tulaga. A o talavou Roberta, sa faamisi e ia le alu i le lotu i ni nai vaiaso ina ia fai ai ana meaa’oga. “E uiga ese ona e mafai ona amata i se mea sa foliga e matua itiiti lava i le taimi,” o lana tala lea.

Ina ua uma ona misi ni nai vaiaso, sa matua faigofie lava ia te ia ona le alu i le vaiaso na sosoo ai. Na liua vaiaso o le misimisi o le auai e aveia ma masina. Ina ua atoa lona 18, sa uunaia o ia e ana uo latou te o i falekalapu i le tuneva o le po i Aso Toonai, lea na atili ai ona faigata ona alu i le lotu i Aso Sa. Na iu ai foi ina amata ona inu o ia.

“Sa ou iloina e le sa’o, ae sa ou mafaufau faapea e mafai lava ona ou taofia loa lava pe afai ou te manao ai,” o lana tala lea. “Sa ou taumafai e ta’uamiotonuina a’u faaiuga.”

Sa ola o ia i se ituaiga olaga e le talafeauga ma le ulu atu i le malumalu, ae ina ua mae’a ona ia feiloai atu ia Daniel, sa ia aveina o ia i le lotoa o le Malumalu i Hamilton i Niu Sila, ma fai atu ia te ia e manao e faaipoipo iina.

“Sa ou iloina o iina sa ou manao ou te alu i ai,” o lana tala lea. Peitai o faaiuga leaga taitasi sa foliga mai ai ua faigofie atu ona faia ai foi le isi faaiuga leaga—ma saga taitai ese mamao atu ai o ia mai lona taunuuga sa manao ai. E lei leva ae nonofo faatasi Roberta ma Daniel.

“Sa i ai se mea na motusia i le va o le mea sa ou manao ai—ma le mea sa ou iloa e sa’o—ma faaiuga sa ou faia,” na ia fai mai ai. “Ua ou i ai i le taimi nei. Sa ou le faafesoota’ia faaiuga o le taimi nei ma le mea o le a aveina i ai au.”

E Sailia e le Alii I Latou ua Leiloloa

E tusa ma le mea sa faamoemoe o ia e alu i ai, e lei leiloloa Roberta i le Alii. E ui ina sa le’i iloina e Daniel ma

Roberta i le taimi lea, ae sa sailia e le Leoleo Mamoe Lelei, o lē na sau “e saili ma faaola i le na leiloloa” (Luka 19:10), i la’ua i le taimi atoa.

Sa galue le Agaga ia Daniel, ina ua aveina o ia e Roberta i le lotoa o le malumalu ma ina ua faamanuia e le tama o Roberta le la fanau. E ui ina sa tele taimi na siitia ai i latou, ae o taimi taitasi e siitia ai latou te feiloai ai—ma aoao faatasi mai lea taimi i lea taimi ma—faifeautalai.

Ina ua mae’a ona toe siitia i le 2006, sa latou feiloai manisi na latou aoga, o Dan ma Lisa Nathan, o e sa malolosi i le Ekalesia. Faatoa siitia atu lava Daniel ma Roberta i totonu o tuaoi o le uarota a le au Nathan.

E tolu vaiaso o tolotolo lava e Roberta le valaaulia a Lisa la te o faatasi i le lotu. “Sa ou le manao e faamatala le tulaga sa ou i ai,” o lana tala lea. “Peitai sa tonu ia te au ou te fia manao i la’u fanau i le Peraimeri.”

E lei leva ae toe feiloai Daniel ma Roberta ma faifeautalai. Sa amata ona alu Daniel i le lotu, lea sa i ai se faiaoga lelei o Mataupu Faavae o le Talalelei sa faia se eseese. Sa asiasi atu i ai faiaoga asiasi i masina taitasi. Sa feiloai foi le toalua lea ma Elder David A. Bednar o le Korama a Aposetolo e Toasefululua i le taimi o se faigalotu faapitoa.

Sa vaaia e Roberta i ona aafiaga ia le faamaoniga sa saunia lava e le Tama Faalelagi “le tele o tagata lelei sa fesoasoani ia i ma’ua.”

Mafaufau i Ou Ala

E ala mai i aafiaga eseese ma tagata, na saunia ai e le Tama Faalelagi ia avanoa mo Daniel ma Robert e “mafaufau [i o la’ua] ala” (Hakai 1:7). Peitai e tatau ona la “tuuina atu [lo la’ua] ala ia Ieova” (Salamo 37:5) a o lei mafai ona la agaigai i luma.

“Sa ou iloina o o’u ala e le o Ona ala ia,” o le tala lea a Roberta (tagai Isaia 55:8–9), “ae sa ou le iloina



pe faapefea ona faafesoota'i le lua.”

Na oo mai le faaiuga tonu ina ua fai atu faifeautalai ia Daniel ma Roberta e filifili po o fea la te mananao e o i ai, i le tulaga faaleagaga, ma le mea sa manaomia ona la faia ina ia oo atu ai iina.

“Ina ua tonu ia i ma'ua i le faaiuga e faapea o le mea sa ma mananao i ai o le i ai lea i le nofoaga e tau atu i ai Lona ala,” o lana tala lea, “sa amata ona ma vaavaai i le mea e tatau ona ma ui ai e mulimuli ai i Lona ala iina.”

I masina na sosoo ai, sa galue ai Roberta e fulitua i faaiuga leaga i le taimi ua fano ae toe foi i le ala sa ia tuua i le silia ma le sefulu tausaga talu ai. E faapei ona amata lona fulitua i le ala o le talalelei i faaiuga laiti a o talavou, na faapena foi le toe foi mai o Roberta i le ala na amata i le faia o nai mea laiti lava i aso taitasi.

“Ina ua amata ona ou taumafai e faia mea faavae i aso taitasi—tatalo taitoatasi ma faaleaiga, faitauina o tusitusiga paia, aveina o tamaiti i le lotu, fesoasoani i isi pe a mafai ai—sa mafai ona ou lagonaina le tausaga o i matou e le Tama Faalelagi ma faafogaina a matou tatalo,” o le tala lea a Roberta. “Sa sili atu le fiafia o lo matou aiga.”

Sa fesoasoani na faaiuga laiti e faamalolosia ai Daniel ma Roberta pe a oo i taimi e fai ai faaiuga tetele. Sa tonu ia i la'ua e faaiipoipo. Ona oo lea ina ua toetiiti ato le tausaga talu ona amata feiloai Daniel ma Roberta ma faifeautalai, o lo la naunau ia faatasia e faavavau ma lo la aiga, na taitai atu ai Daniel e papatisoia.

Mulimuli ane, ina ua mavae le lua tausaga

o la taumafai e faatusatusa mea sa la faia i aso taitasi i mea sa la mananao ai i le lumanai, sa faamauina Daniel ma Roberta i le malumalu—ma ua faataunuuna ai le miti a Roberta a o laitiiti.

Ola i le Taimi Nei mo le Faavavau

Ina ia avea o se vaega o le fuafuaga a le Tama Faalelagi, e i ai le avanoa o Daniel ma Roberta e filifili ai i aso taitasi po o le fea ala o le a la'ua filifilia—po o lo la'ua po o Lona. Ua sili atu nei ona nofouta le ulugalii i le itu o le ave i ai i la'ua e a la filifiliga i aso taitasi.

Mai aafiaga patino, ua la malamalama ai i le faigofie ona leiloa lo la'ua ala pe a faia faaiuga i aso taitasi e aunoa ma le mafaufau i le aafia ai o taunuuga e faavavau. Peitai, e faafetai foi i la'ua i lo la'ua muai aoaoina e i ai se ala e toe foi ai.

“Ou te iloa e alofa le Alii ia te au ma e finagalo ia ou toe foi atu aua sa Ia faamanuiaina o ma'ua olaga i tagata sa matou feiloai i la ma'ua faigamalaga o ē sa fesoasoani ia i ma'ua e toe foi mai, “o le tala lea a Roberta. “Na te lei faagaloina a'u i le taimi na ou aluese ai mai le Ekalesia.”

Faafetai i le alofa—ma le taulaga togiola— a le Leoleo Mamoe Lelei, “[e mafai] e le amioleaga ona lafoai lona ala, ma . . . ia foi mai ia Ieova, ona alofa mai lea o ia ia te ia . . . , aua na te matua faamagaloina” (Isaia 55:7).

Ua taumafai nei le au Nepia e tula'i atu i le mea ua la mananao ia i ai. “A oo ina e iloaina e tele atu isi mea o i lenei olaga nai lo mea o i ai i le taimi nei,” o le tala lea a Daniel, “e suia au filifiliga.” ■



O FAAIUGA E ILOA AI LE TAUNUUGA

“Na ta'ua e se tasi, i tausaga ua leva, e faapea o le talafaa-solopito e faagaoioia sooga laiti, ma e faapena foi olaga o tagata. O le a faalagolago o tatou olaga i faaiuga tatou te faia—aua o faaiuga e iloa ai le taunuuga.”

Peresitene Thomas S. Monson, “Decisions Determine Destiny,” *New Era*, Nov. 1979, 4.

E FAAPEI ONA FAAMAFANAFANAINA I TATOU E KERISO

O la matou uluai Kerisimasi i le Motu i Matu o Niu Sila—o se nuu manaia ma le matagofie. Ae ui lava i le lasusulu ma le agalelei o tagata o le Ekalesia, sa ou lagonaina le loloto o le tiga o le tuuatoatasi mo o’u matua ma nai o’u tei. Sa matou siitia mai le Iunaita Setete i le amataga o le tausaga, ma sa ou lagonaina le ma’imanatu.

I le matou eria fou, sa amata ona matou faauo ma lo’u toalua ma le au Wilson, o se aiga Aialani talavou o se isi tapuaiga Kerisiano, faatoa taunuu mai foi i Niu Sila. O Noleen Wilson ma te faigaluega, ma e lei leva ae avea i ma’ua o se uo lelei, ua fefaasoa’i aafiaga o le malaga mai ma lo matou fiafia i o matou aiga fou. A o tuputupu a’e le matou faigauo, sa oo ina ou iloaina o la foi e tauivi lo latou aiga ma

le tuua na o i latou faapea foi lagona o le lofituina. E toatolu le la fanau laiti ma le lona fa lea e faatalitali.

I se tasi afiafi ina ua ou matua lagonaina lava lo’u tuuatoatasi ma le faanoanoa mo a’u lava, sa ou maua ai se uunaiga o le ala sili lava e faatoilalo ai lo’u tuuatoatasi o le auauna atu lea i se tasi—aemaise lava i le au Wilsons. Sa tonu ia i ma’ua ma lo’u toalua i lena po e amata ona faamanatu ia aso e 12 o le Kerisimasi i le au Wilsons e ala i le tuuina e aunoa ma le iloa o ni savali ma ni meaalofo laiti i luma o lo latou faitotoa. O po taitasi, sa suia lo’u tuuatoatasi i le sagisagi fiafia ma le nautaitai a o matou tolotolo atu i lo latou fale, tuu le matou savali ma meaalofo, tu’itu’i lo latou faitotoa, ona taufetuli ese lea ma le matua fiafia lava.

O aso taitasi i le galuega e faamatala mai ai e Noleen e uiga i “tamai aitu o le Kerisimasi” e le mailoa, sa asiasi atu i le po ua mavae. Na te faamatalaina tala i le faatalitali o lana fanau i le taunuu atu o a latou ‘au asiasi, ia sa avea ai le Kerisimasi a le aiga o se mea fiafia. E tele ni afiafi sa matou auai faatasi ma le autalavou a le uarota i lea mea sa matou fiafia ai.


I le po faaii, le Po o le Kerisimasi, sa tuu ai e le au Wilson se savali ma ni kuki i luma o lo latou faitotoa, ma talosaga ai ia mafai ona latou feiloai i a latou tamai aitu. Ina ua matou taunuu ma le autalavou e usuusu pesepesega o le Kerisimasi e fai ma a matou meaalofo faaii, sa matua fiafia tamaiti ma sa opoina i matou e a matou uo i ni sogi ma loimata o le lotofaafetai. Sa suia le tuuatoatasi i lo’u loto i le alofa ma le olioli, ma sa faamalosia ai le noataga o le faigauo i le va o o matou aiga.

Mulimuli ane sa matou mauaina se i-meli mai se tagata o le lotu a le au Wilson lea na fai mai sa matua tuia lava lona loto i le mea sa matou faia mo le aiga, ma o lea sa ia fesili mai ai e uiga i la tatou Ekalesia ma faatinoga o le auaunaga tatou te tuuina atu mo isi. E lei faalogo lava le aulotu i le 12 aso o le Kerisimasi ma o lea ua tuufaatasi ai lenei aga masani ma le Au Paia o Aso e Gata Ai.

O le a le galo lava ia te au lena uluai Kerisimasi i Niu Sila, lea sa ou aoaoina ai se ala e lei mafaufauina e faagalo ai a’u lava ia, ae alu e galue ma “faamafanafana atu ia te i latou o e e manaomia le faamafanafanaga” (Mosaea 18:9)—e faapei lava ona faamafanafanaina i tatou e Iesu Keriso i o tatou taimi e manaomia ai ma tuuatoatasi ai. ■

Angela Fallentine, Niu Sila

Ina ua matou taunuu ma le autalavou e usuusu pesepesega o le Kerisimasi e fai ma a matou meaalofo faaii, sa matua fiafia tamaiti ma sa opoina i matou e a matou uo.




O LA'U KATA O LE KERISIMASI MAI OBREGÓN

Ao ou faamisiona i Mekisiko, sa ma feiloai atu ma la'u soa i se tamaloa mai Obregón, o se aai i matusisifo o Mekisiko e latalata i le Faga o Kalefonia. Sa fiafia o ia i la ma'ua savali e uiga i le Toefuataiga o le talalelei, peitai sa na o le 10 minute na matou talanoa ai ona sa alu e pue lana nofoaafi. Sa ma aoaoina o ia i mea uma sa ma mafaia i lena taimi puupuu ma avatu ia te ia se kopi o le Tusi a Mamona ma 'anomea uma sa ia i ma'ua. O le taimi lena, sa leai ni faifeautalai o la matou misiona i Obregón.

Na mavae ni masina mulimuli ane ona ou maua lea o se kata Kerisimasi mai se tasi i Obregón. Sa ou tilotilo i le kata ma tau mafafau po o ai na aumai ai. Ona ou iloa ai lea sa aumai i le tamaloa lea sa ma talanoa i ai mo le 10 minute. Sa ou faatautauina le kata i lo ma fale ma isi kata o le Kerisimasi sa ma mauaina ma le isi faifeau.

Ina ua uma le Kerisimasi sa toetiiti lava o'u tia'ia le kata ae ou maua se uunaiga e teu. O lea uunaiga e le o se leo na faalogoina ae o se lagona i lo'u loto. Sa ou le tia'ia le kata, ae ou tuuina i la'u atopa'u.

I ni nai masina mulimuli ane a o ou faitauina le tusi faalemasina mai le ofisa o le misiona, sa ou vaai ai i se faasilasilaga o le a tatala le galuega faafaifeautalai i Obregón. Sa ou toe mafafau ai foi, "O le a la'u mea e fai i lea aai?" Ona ou toe manatua ina ai lea o le tamaloa mai iina lea sa matou feiloai. Sa ou toe su'eina la'u atopa'u ma maua ai le kata o



Ina ua uma le Kerisimasi sa toetiiti lava o'u tia'ia le kata ae ou maua se uunaiga e teu.

le Kerisimasi. Sa ou tusia i luga o le kata, "O faifeau nei o a'u uo, ma o lea ua ou auina atu i la'ua e aoao atili oe e uiga i le talalelei." Ona ou auina lea o le kata i faifeau na tofofi e galulue i Obregón ma fai i ai e o ma ave ma asiasi i le tamaloa lea.

E lei leva ae ou mauaina se tusi mai faifeau i Obregón. Sa faitauina: "Lau Susuga Elder Ramos, sa matua faigata lava le galuega iinei ma o lea sa fuafua ai le peresitene o le misiona e aveese i ma'ua ae te'i ua ma mauaina lau kata. Sa ma o e vaai

lenei uso, ma sa matua fiafia o ia i la ma'ua savali ma o lea na ia aveina ai i ma'ua e feiloai i lona aiga uma ma uo. Ona o lenei uso, o lea ua ma amataina ai se paranesi.

Na mavae tausaga, ma o le taimi nei ua tolu siteki ua faatulagaina i Obregón. Ua faalotomaulaloina lava a'u i le iloa ai, aua sa ou faalogo i uunaiga a le Agaga, o lea sa faama-nuiaina ai a'u e faatino se vaega itiiti e fesoasoani ai i o'u uso ma tuafafine i Obregón ia maua le talalelei a Iesu Keriso. ■

Robert Ramos, Oregon, ISA

SA LEAI SE MATOU MEA E 'AI

Sa ou alapo i le aso i luma mai o le Kerisimasi ma sa ou popole aua sa leai ni a matou meaai mo le toonai o le Kerisimasi i lena po; sa leai foi se matou tupe e faatau ai ni meaai. O le taimi lena sa ma nonofo ai ma lo'u uso o Edicta i Maracaibo, Venesuela.

Ina ua ou alu ese mai lo'u moega, sa ou tootuli i lalo ma amata ona tatalo. Sa ou ole atu i lo'u Tama Faalelagi ia manatua i matou. Sa ou ole atu ia te Ia ia aumai lava na o ni nai meaai mo i matou i lena aso faapitoa, *la Noche Buena* (Po o le Kerisimasi).

A o ou tatalo, sa faatumulia a'u i le filemu. Sa pei o la ou te faalogo ina se leo malu o faapea mai ia te au, "O le a lelei mea uma. Aua e te popole." Ina ua uma la'u tatalo, sa ou iloa o le a i ai se mea lelei e tupu i lena aso.

Ina ua uma ona fafagu lo'u uso, sa ou alu e salu le poletito i luma. Sa vaai mai lo matou tuaoi i le isi ituala ona sau lea aumai ia te au le 1,000 bolíva-res sa aitalafu ai ia te au i le ie laulau o le Kerisimasi ma teuga sa ou su'iina mo ia. Sa ou ofo aua sa ou le manatua ina na aitalafu o ia ia te a'u i le tupe.

Sa ou tamoe atu i le potu o lo'u uso ma faaali atu ia te ia le tupe sa ou maua. Sa ofo o ia ma fesili mai po o fea sa ou maua mai ai. "E mafai mea uma e le Atua" (Mataio 19:26), sa ou tali atu ai.

I ni nai minute mulimuli ane, sa ma faalogo ina ai se tasi i fafo o tauvalaau mai i lo'u uso. Ina ua ma iloina o le tuaoi lava lea e tasi, sa ma o i fafo e talanoa i ai. Ona ia totogiina ai lea i lo'u uso le 1,000 bolíva-res sa ia aitalafu ai mo ni mea sa ia su'iina. Sa matuai

fiafia lava i ma'ua ma lo'u uso aua o lea ua mafai nei ona faatau meaai mo le taeao, aoauli, *ma le* afaifi.

Ina ua fo'i mai le ma faatauga, sa ma maua mai se ma uo o faatalitali atu mo ma'ua. Sa fesili mai pe mafai ona matou fai *la Noche Buena* ona sa le manao e fai Kerisimasi na o ia. Sa ma faamatala atu i ai o le a na o si toonai laititi lava i le fale, ae ma te talia lelei o ia. Sa ia aumaia foi le 2,000 bolíva-res e fesoasoani ai i le tau o le toonai. Sa faigata ona ma talitonu i le tele o faamanuiaga a le Atua ia i ma'ua.

Mulimuli ane sa valaau mai si o'u tei e ta'u mai e taunuu mai o ia i le po lena ma aumai le 33 pauna (15 kg) o fasipovi ua uma ona faamalū. I le aoauli sa taunuu mai ai le isi o'u tei ma

lona toalua ma le la fanau. Sa fesili mai pe mafai ona toe foi mai i le afaifi lena ma ni meaai matou te faamanatu faatasi ai le Po o le Kerisimasi.

"O le a leai se tatou toonai tele" sa ma tali atu ai, "ae o le a lava meaai mo tagata uma."

I lena afaifi sa ma taoina ai ma Edicta ia moa, salati pateta, ma se measuamalie i le tipolo, ma le *majarete*, o se puligi popo masani, lea sa matou fiafia ai ma a matou malo uma. Ae na muamua lava ona matou faafetai i le Tama Faalelagi mo faamanuiaga maoae na Ia tuuina mai mo i matou. O lena aso sa faamanatu mai ai ia i matou afai matou te faatuatua ma le le masalosalo, o le a Ia faamanuiaina i matou pe a ole atu mo Lana fesoasoani. ■

Estilita Chacin Hart, Utah, ISA



Ina ua ou alu ese mai lo'u moega, sa ou tootuli i lalo ma amata ona tatalo. Sa ou ole atu i lo'u Tama Faalelagi ia manatua i matou.

O LE KERISIMASI MULIMULI A LINDA

I lo'u tausaga lona lua i le Iunivesite o Polika Iaga, sa saina ai e le au epikopo o la matou uarota le uarota mo le polokalama mo se Sui-mo-Santa, lea o le a matou saunia ai ni meaalofo o le Kerisimasi mo se aiga e manaomia.

Peitai, sa fai lava ma le vaaia le igoa o la matou uarota i le lisi o volenitia. Ina ua latalata mai le Kerisimasi, sa leai lava se aiga e fesoasoani i ai. Ona fai mai lea o se tasi o fesoasoani o le epikopo, e i ai se aiga atonu e faaogaina la matou fesoasoani. Ina ua matou iloa lenei aiga, sa matou mautinoa uma lava ua tatau ona matou taulai atu i ai.

O Linda (ua suia le igoa), e i ai lana fanau tama e amata mai i le 9 tausaga e oo atu i le 15, sa tauivi o ia ma se taua faigata o le kanesa o le susu. I le taimi o le mafatiaga o lena ma'i, sa tuua ai o ia e lona toalua. Faatoa siitia ane lava o ia mai i se tasi setete e faigaluega i Provo, Iuta, ae sa faaletonu foi le galuega, ma o lea sa tuua ai o ia e aunoa ma se tupe maua.

Ina ua matou feiloai ma Linda, sa vave ona matou taliaina o ia i o matou loto. Sa faamanuiaina i matou e vaai atu ia te ia i le ala sa faia ai e le Faaola—o se agaga maoae ma le tamalii o le saatoilaloina le tele o luitau faigata. Sa lei aveava lava o ia o se tiute ia i matou; ae, sa aveava o ia o se uo e faavavau. Sa saofagā tagata uma o le uarota e fesoasoani ai ia te ia ma lana fanau tama. O i matou uma lava o ni talavou aoga i le iunivesite, ma e matitiva foi i o matou lava manatu,



A o i ai Linda i le pati o le Kerisimasi a le matou uarota, sa o nisi o tagata o le uarota i lona fale sa mautotogi ai ma faatutumu ana kapoti ma le pusa aisa i meaai.

ae sa matou foi fiafia atu lava aua sa matou alolofa ia te ia.

Sa sau Linda i le pati a la matou uarota o le Kerisimasi, ma o le taimi lea sa o ai le toatele o tagata o le uarota i lona fale sa mautotogi ai ma faatutumu ana kapoti ma le pusaaisa i meaai. Sa latou teuteuina se laau Kerisimasi ma faatumulia i meaalofo mo le aiga atoa. Sa latou tuua ai foi ni pa'u taavale fou se fa ma totogi le lisi o lona fale mo ni masina. Ou te le iloa pe na mafai faapefea e a matou saofaga faalē'a'u'a'u ona faatino uma ai na mea, ae ou te iloa sa faaogaina e le Tama Faalelagi a matou osigataulaga e faamanuia ai o ia.

I se tausaga mulimuli ane sa ou i ai i se isi uarota a tamaiti a'oga, ae sa ou toe foi i le taimi o le Kerisimasi e asiasi i le matou au epikopo talu ai. Sa ou iloa ai na toe foi ane le toalua o Linda i le aiga, ma sa mautu o latou tulaga tautupe. Peitai, sa toe foi ane lona kanesa ma sa i'u ai lona ola. Sa ou iloina na matou fesoasoani e avatu ia Linda lana Kerisimasi mulimuli.

I le lagonaina "o le alofa le pona o Keriso" (Moronae 7:47) sa matua malosi i lena aafiaga, sa ou aoao ai o le alofa moni o se meaalofo faaleagaga anagata lea e uunaia i tatou e galulue i le tulaga o le Faaola. ■
J. Audrey Hammer, Utah, ISA

Saunia e Elder
Patrick Kearon
O Le Fitugafulu



O Mai, TATOU VIVII IA TE IA

I le Kerisimasi talu ai a o ou galue ai i le laumua o le Ekalesia i le Aai o Sate Leki, Iuta, ISA, sa ou fetaia'i ai ma se tulaga faalelotoifale o le tau e ta'u o se feliu'a'iga. O se felua'iga o se tulaga e malulu atu ai le ea e latalata i le palapala nai lo le ea i luga atu, o le faafeagai—o le feliu'a'iga—o le tulaga masani. O feliu'a'iga e le o se mea e tulaga ese i le Aai o Sate Leki, ae e tele lava ina iloa lona aafiaga aua o le aai e tu i se vanu e siosiomia e mauga mauualuluga. O le mea lena e punitia ai le asu o le aai ma to'a feteena'i ai ma le fola o le vanu, ma ufitia ai le aai ma ona fao'a aai i se ao mafiafia, pogisa, ma le malulu. O le asu e matautia mo le soifua maloloina o i latou e i ai toatuga o le mānava, ma e aafia ai le agaga o le toatele o isi, aua e lagona le palapala o le ea ma e ufitia le la mo le tele o aso, e oo lava i vaiaso, i se taimi.

Peitai, o sina tietie atu i le taavale i luga o mauga, e iloa ai o le asu e na o ni nai futu pe fiaselau le mafiafia. I ni nai minute, e mafai ai ona e i ai i le mutigitigi o le la, manavaina le ea manino lelei, pulato'a atu i atumauga mama a'ia'i, ua faapulou i le kiona. Sa iloa lelei lava le eesesea ma le vanu i lalo ifo. Pe a e a'e atili atu i luga o mauga, ma tilotilo ifo i lalo i le asu na e vaai ai i le vanu, ma ua foliga e pei o se palanikeke eleelea i lalo ifo o le lagi lanumoana.

E i ai taimi i o tatou olaga tatou te lagonaina ai lo tatou punitia i lalo i le vanu, i le pogisa o

E tatau ona tatou iloaina ua ia te i tatou le mana ma le malosi tatou te aveesea mai ai i tatou lava mai le ea palapala o le vanu ae o mai i le lasusulu malamalama o le filemu ma le faamoemoe lea e na o le o mai i le Faaola e maua ai.



le puaoa asuasua uliuli. Ona o filifiliga le lelei tatou te faia, o amioga e faatiga ai i le Agaga, pe na o faaiuga ma luitau tiga ma le faaumi-umi masani o le olaga nei, tatou te manatu ai ua pa'ulia i le puaoa mafiafia, ma le lofituina. E le mafai ona manino la tatou vaai, tatou te lagona le fememea'i, ma tatou te manatu ua tatou aveesea mai i tatou lava mai le malamalama ma le mafanafana o le alofa o lo tatou Tama Faalelagi. E galo ia i tatou o loo faatality mai mo i tatou le malamalama atoatoa o le Alii, o loo talotalo mai, ma ua na o ni nai sitepu lava le mamao o le faatuatua. E tatau ona tatou iloaina ua ia te i tatou le mana ma le malosi tatou te aveesea mai ai i tatou lava mai le ea palapala o le vanu ae o mai i le lasusulu malamalama o le filemu ma le faamoemoe lea e na o le o mai i le Faaola e maua ai.

I le taimi lea o le Kerisimasi i le tausaga, tatou te olioli ai i le soifua mai o Iesu Keriso, o le Malamalama o le Lalolagi, o le ua valaauina i tatou uma e o mai ia te Ia ma le malamalama. E mafai ona tatou faitau i tusitusiga paia e uiga i alii ma tamaitai sa faamanuiaina moni lava e o mai ia te ia i le taimi o le Soifua mai o le Faaola. O nisi e mamao le mea na o mai ai, a o isi e latalata. O nisi sa mauaina le asiasiga a agelu, o isi foi na gaoioi i luga o faaaliga faaletagata lava ia. Ae sa talia e tagata taitoatasi le valaaulia e o mai ia te Ia.

O a ni mea e mafai ona tatou aoao mai leo-leo mamoe, Simeona, Ana, ma le Au Makoi, o



i latou uma sa fiafia e o mai e vaai i le tamaiti-iti o Keriso, i o latou lava mata? A tatou mafau-fau loloto i a latou tali atu ma le faatuatua i le valaaulia e o mai ia Keriso, e mafai ona tatou iloa ai ina ia si'i a'e atili ma le mataalia i tatou lava mai o tatou feliu'a'iga, mai le pogisa ma le fenumia'i, ma aumaia i tatou lava i le Malamalama o le Lalolagi. O iina, ia te Ia, tatou te lagonaina ai pe o ai moni lava i tatou, ma le mea tonu e fetau ai i tatou i le ata o le faava-vau. E faaleaogaina lo tatou lava feliu'a'iga ae toefuatai mai le vaaiga lelei.

O lo tatou tulaga o ni soo e le manaomia ai i tatou e tuua a tatou mamoe i le lotoa pe laasia ia toafa. O la tatou faigamalaga i le Faaola e le faaletino; e faaleagaga ma faaleamio. E aofia ai le taliaina ma le faaogaina o Lana Togiola.

O Leoleo Mamoe

I fuaiupu lauiloa mai le Luka 2, tatou te aoao ai i mea moni taua e uiga i na uluai molimau o le soifua mai o Keriso, o leoleo mamoe i le vao e latalata i Peteleema. Ina ua “tu mai ia i latou le agelu a le Alii, . . . sa matua fefefe lava i latou” (fuaiupu 9). Peitai sa latou faalogo i “le tala lelei e olioli

tele ai” ua fanau mai le Faaola ua loa ona mua'i ta'u mai, o le Mesia, le Keriso (fuaiupu 10). Sa latou faalogo ia iloa le faailoga e mafai ai ona latou iloa le Faaola, o le a “aui [o Ia] i le ie, o loo taoto i le falepovi” (fuaiupu 12). Ina ua mae'a le folafolaga fiafia a 'au o le lagi, sa vave ona tali atu le au leoleo mamoe, ua faapea atu, “Ina tatou o ia i Peteleema, tatou te vaavaai i lenei mea ua faia” (fuaiupu 15). Sa latou “faataalise atu” (fuaiupu 16) ma maua Keriso le pepe meamea e pei lava ona sa ta'u atu ai e le agelu, ona latou “foi mai lea, o vivii ma faafetai i le Atua” (fuaiupu 20). O lo latou mananao e faasoa atu le talafou mamalu i le

soifua mai o le Faaola, “na latou faailoa ai [le tala] i nuu mamao” (fuaiupu 17).

E faapei o leoleo mamoe, e tatau foi ona tatou tali vave atu, ma le faanatinati, i soo se taimi e fetalai mai ai le Agaga ia i tatou. I le saunoaga a Peresitene Thomas S. Monson, e “lē tatau, lē tatau lava, ona tatou tolopoina le mulimuli i se uunaiga.”¹ O nisi taimi pe a uma ona gauai atu i se uunaiga, e le mafai ona manino la tatou vaai pe aisea ua taialaina ai i tatou e le Agaga e fai se mea patino. Ae o le tele lava o taimi, e pei foi o leoleo mamoe, tatou te vaai i vavega o tutupu, ona faamautuina ai lea o la tatou tali atu ma le faamaoni. Ona mafai ai lea ona tatou faaaogaina avanoa e faasoa atu ai lo tatou olioli ma a tatou molimau i isi. O le faia o lena mea e mafai ai ona faamalolosa le faatuatua ma le faamoe-moe o isi, ma saga faamautuina ai a tatou lava molimau ma tatou latalata atili ai i le Faaola ma Ona ala.

Simeona

O le isi molimau lelei i le tama meamea o Keriso, o Simeona. O ia o se tagata “amiotonu ma le mata’u i le Atua” sa fesootai e le aunoa ma le Agaga Paia (Luka 2:25). Sa faailoa atu ia te ia “e le oo ia te ia le oti, seia muai vaai i le Keriso o le Alii” (fuaiupu 26), ma sa ola o ia ma le faamoemoe ma le naunau atu i lena aafiaga paia. Sa uunaia o ia e le Agaga e sau i le malumalu i le aso na aumaia ai e Maria ma Iosefa le pepe meamea o Iesu i Ierusalem “e tuu atu ai i luma o le Alii” (fuaiupu 22). Sa iloa e Simeona le pepe o le Mesia na folafola mai ona “sapaia lea o ia i ona lima, ma faafetai atu i le Atua” (fuaiupu 28), ma vavalu e uiga i le taunuuga o le pepe paia o le “malamalama e faamalalalamaa’i Nuu Ese, ma le mamalu o lou nuu o Isaraelu” (fuaiupu 32).

O le olaga amiotonu ma le faamaoni o Simeona na mafai ai e ia ona i ai i le malumalu ina ia mafai ai ona ia molimau e uiga i

le Malamalama ina ua i’u ina ia mauaina. O i tatou, e faapei foi o Simeona, e mafai ona taumafai ia tele atu le gauai ma le usiusitai i musumusuga a le Agaga Paia ina ia mafai ai e o tatou olaga ona savavali i le ala ua finagalo ai lo tatou Tama Faalelagi mo i tatou. Talu ai sa atiina ae e Simeona lona tomai e faalogo ai ma tali atu i le Agaga, o lea sa i ai o ia i le nofoaga sa’o i le taimi sa’o, ma sa faataunuuna folafolaga a le Alii ia te ia i le ala e aupito sili ona mamalu.

E mafai foi ona maua na lava avanoa e i tatou taitoatasi ma mafai ai ona tatala mai le fuafuaga a le Alii o tatou olaga. A tatou feagai ma le faia o faaiuga e faavavau le taua, a tatou i ai i se fetaula’igaala i o tatou olaga, e manaomia le manino o o tatou mafaufauga ma le vaaiga sa’o. O nisi taimi o le natura tonu lava o le faia o nei faaiuga taua, e afua ai ona tatou lagona le faaletonu, lē mautu, ma lē mafai ai ona gaoioi, i lalo i le vanu pogisa i le feliiua’iga. Peitai a tatou savavali i le faatuatua ma gaoioi ai e tusa ma mataupu faavae amiotonu, e i’u lava ina tatou vaaia le fuafuaga a le Atua ua tulai mai i o tatou olaga, ma toe aumaia ai i tatou i le lasusulu malamalama o le alofa o le Atua.

Ana

O Ana o se fafine ua “loomatua” o se fafine nofofua ua faamatalaina o se “perofeta fafine” (Luka 2:36), o lona olaga umi ma le faamaoni sa iloga i ana anapogi ma talosaga i ao ma po ma sa “lei alu ese o ia i le malumalu” (fuaiupu 37). Ina ua vaai o ia i le pepe i le malumalu, sa ia “faafetai” mo le pepe o Keriso “ma tautala e uiga ia te ia i tagata uma lava e na faatali atu i le togiola i Ierusalem” (fuaiupu 38).

Ua tatou aoao mai le aafiaga o Ana e mafai ona tatou ola faamaoni i ituaiga tau uma pe afai tatou te tumau i lo tatou anapogi ma tatalo ma pe afai tatou te le o ese mai le malumalu i o tatou loto. Afai tatou te lei maua



FAASIASIAGA I LEOLEO MAMOE, SAUNIA E DEL PARSON; TATALO O LE FAAFETAI A SIMEONA, SAUNIA E ROBERT T. BARRETT; O LE FATU O LE FAAMOEMOE, SAUNIA E ELSPETH YOUNG; E LE MAFAI ONA KOPINA; O LE TAUNUJ ATU, SAUNIA E MICHAEL ABRECHTSON, E LE MAFAI ONA KOPINA



lava le avanoa e malaga ai i se malumalu ma maua ai ona faamanuiaga, e mafai lava ona tatou olioli i faamanuiaga e tafe mai i o tatou olaga pe a tatou umia ma le agavaa se pepa faataga o le malumalu. Ua faatele ona valaaulia i tatou e perofeta ia umia se pepa faataga tusa lava pe le mafai ona auai atu i le malumalu ona o tulaga tatou te i ai.² E mafai ona tatou si'i a'e i tatou lava mai taimi o le pogisa ma o atu i le malamalama o le lotofaafetai e ala i a tatou tapuaiga i le malumalu ma ala i le



A tatou mafaufau loloto i tali faamoni a le au leoleo mamoe, Simeona, Ana, ma le Au Makoi, e mafai ona tatou aoao ai ina ia si'i a'e atili ma le mataalia i tatou lava mai o tatou feliu'iga, mai le pogisa ma le fenu-mia'i, ma aumaia i tatou lava i le Malamalama o le Lalolagi.

molimau atu e uiga ia Iesu ia i latou uma o loo sailia le filemu ma le faamoemoe.

O Le Au Makoi

O le mea mulimuli, i le Mataio 2 tatou te faitau ai i le Au Makoi, o ē sa malaga mai i le mea mamao, ina ua “vaai i lona fetu i sasae” ma ua malamalama i le faailoga (fuaiupu 2). Sa latou saunia meaalofa e saafi ai ma ifo atu ai, ma sa latou o mai e saili ia te Ia, ma fesili “Po o fea o i ai le ua fanau mai o le tupu o tagata Iutaia?” (fuaiupu 2). Ina ua mae'a la latou sailiga sa latou mauaina le pepe o Keriso, sa latou “faapauu i lalo, ma ifo atu ia te ia” ma tuuina atu a latou oloa (fuaiupu 11). E ui ina sa latou fetaia'i ma le faa'ole'ole a Herota, ae sa “faailoa atu ia te i latou i le miti e aua ne'i foi atu ia Herota” ae ia latou foi “i le tasi ala” (fuaiupu 12). Sa faatino e le Au Makoi e ala i le faaaliga mai

le Atua ma sa puipuia le aiga paia mai faamoemoega leaga o Herota.

E tele mea e mafai ona tatou aoao mai i le Au Makoi. E faapei foi o i latou, e tatau ona tatou suesue i tusitusiga paia ma iloa faailoga e matauina a o tatou taufai saunia uma le lalolagi mo le Afio Mai Faalua o le Faaola. O iina la, a tatou saili ma mafaufau loloto i tusitusiga paia, o le a tatou naunau atili atoatoa ai e saili le Alii i aso uma o o tatou ola, ma ave a o se meaalofa mo Ia, lafoai le manatu faapito, faamaualuga ma le fouvale. A oo mai faaaliga patino e fetuuna'i ia fuafuaga ua tatou faia, e mafai ona tatou usitai, ma faatuatua ma faalagolago e silafia e le Atua le mea e sili mo i tatou. Ona oo mai lea o le taimi, i o tatou olaga o ni soo moni, e tatau ai ona tatou faapauu i lalo ma ifo atu i le Faaola i le lotomaulalo ma le alofa.

O lo tatou tulaga o ni soo e le manaomia ai i tatou e tuua a tatou mamoe i le lotoa pe laasia ia toafa. O la tatou faigamalaga ia te Ia e le faaletino; e faaleagaga ma faaleamio. E aofia ai le taliaina ma le faatauaaina o le mea moni e faapea o Lana Togiola e le i'u ma e aofia ai vaega uma o o tatou olaga—o a tatou agasala, vaivaiga, tiga, ma'i, ma puapuaga (tagai Alema 7:11–13). O lona uiga e mafai ona tatou lafoaia na mea o loo taofiofia ai i tatou i lalo i le pogisa o le puaoa o o tatou lava feliu'iga ma ola ai nai lo le mafanafana o le alofa o le Malamalama o le Lalolagi. E pei ona sa aoao mai e Peresitene Henry B. Eyring, Fesoasoani Muamua i le Au Peresitene Sili: “O upu ‘o mai ia Keriso’ o ni valaaulia. O se valaaulia e pito i sili ona taua e mafai ona e ofoina atu i se isi tagata. O se valaaulia sili ona taua e mafai ona talia e se tagata.”³ ■

FAAMATALAGA

1. Thomas S. Monson, “O Le Agaga e Ola ai,” *Liahona*, Iulai 1985, 65, 67.
2. Tagai, mo se faataitaiga, Howard W. Hunter, “The Great Symbol of Our Membership,” *Tambuli*, Nov. 1994, 6.
3. Henry B. Eyring, “O Mai ia Keriso,” *Liahona*, Mati 2008, 49.



“Pe mafai faapefea ona ou tausisia se uiga faaalua lelei e uiga i le lumanai?”

Ua tatou oo uma lava i taimi e foliga mai e i ai se lotovaivai tele faifai pea ma tala e le lelei i se tulaga patino ma o nisi foi taimi i le lalolagi atoa. Ae e tataua lava ona tatou manatua ua ia i tatou se mafuaaga mo le faamoemoe ona o lo tatou faatuatua i le Alii o Iesu Keriso.

I le konafesi aoao ia Aperila 2009, na faamanatu mai ai e Peresitene Thomas S. Monson ia i tatou le poloaiga a le Alii “ia fiafia” (MF&F 68:6) ma sa tuuina mai nei upu o le faamalosiaga: “E ui ina fofou mai afa, e ui ina to mai uaga i o tatou luga, ae o lo tatou malamalama o le talalelei ma lo tatou alolofa i lo tatou Tama Faalelagi ma lo tatou Faaola o le a faamafanafanaina ma lagolagoina i tatou ma aumaia le olioli i o tatou loto a o tatou savavali ma le amiosao ma tausi poloaiga. O le a leai se mea o lenei lalolagi e mafai ona manumalo ia i tatou.”

E tusa lava pe ua foliga mai mea ua sili ona faigata, ma ua aunoa ma se suluaia mai o ata i le tafailagi, ae o le a avea lava lo tatou malamalama i le talalelei e fesoasoani i le tausisia ai o se uiga faaalua lelei e uiga i le lumanai. E pei ona saunoa mai Peresitene Monson i lea lava lauga: “E i ai le faamoemoe i le lumanai, pei foi o o outou faatuatua” (“Ia Outou Lototetele,” *Liahona*, Me 2009, 92).

Faitau, Tatalo, Matafiafia



I ni nai tausaga talu ai, sa tuuina mai ai e le au peresitene aoao o Tamaitai Talavou le lu’i o le 100 pasene: faitau le Tusi a Mamona i aso uma, tatalo i aso uma, ma matafiafia. Sa ou manatu o le a ou taumafai ma tausisia i le umi ou te mafaia. Sa ou ofo, na aumaia e le lu’i se suiga ofoofogia i lo’u olaga. Sa sili atu ona ou fiafia, sa ia te au le Agaga, ma sa ia te au se uiga faaalua lelei. E ui lava ina sa ou feagai pea ma faigata, ae sa fesoasoani le malosi o le Agaga ia te au ou te onosaia ai ma le fiafia.

Ariana G., 16 tausaga, Virginia, ISA

Ia I Ai le Faamoemoe

Ou te manatu o le mea aupito sili e mafai ona tatou faia e tausisia ai se uiga faaalua lelei o le matafiafia lea ma ia i ai le faamoemoe! Sa fesoasoani le faamoemoe ia te au i lo’u olaga atoa i ala e le mafaitaulia. E tataua foi ona tatou mafau-fau i le faamanuiaina tele o i tatou ma iloa le tele o le alofa o lo tatou Tama Faalelagi ia i tatou. E mafai ona tatou liliu atu ia te Ia mo le filemu i soo se tulaga lava. Sa puapuagatia Lona Alo mo i tatou, o lea ua Ia silafia ai o tatou tiga. O le mea moni, e ala mai ia te Ia e mafai ai ona tatou maua le faamoemoe, faamaloloina, ma le fiafia.

Corey D., 18 tausaga, Iuta, ISA

Mafaufau i le Togiola

O le mafaufau loloto i le Togiola a le Faaola o le a aumaia ai i taimi uma le faamoemoe ma o le a fesoasoani ai foi ia tatou mautinoa. Ua tatou oo uma lava i tofotofoga o lenei olaga. Ae o le Togiola, o loo i ai tali o tofotofoga uma ma faafitauli, i le faaletino ma le faaleagaga. O le Togiola tatou te mafai ai ona vaai i nei tali. O le Togiola o se faatinoga sili lea o le alofa o le Atua mo Ana fanau. E le i’u, ma e faapena foi Lona alofa mo i tatou. O le a aumaia ai ia i tatou le lototele ma le malosi e feagai ai ma le lumanai e aunoa ma le fefe.

Daryl A., 18 tausaga, Laguna, Filipaina

Tumau i le Faatuatua



O taimi faigata nei o se vaega o le fuafuaga a le Alii ma sa muai ta’ua talu mai taimi o le Feagaiga Tuai. I tusitusiga paia uma lava, o loo folafola mai ai e le Alii o le a faamanuiaina le au amiotonu ma

faasaoina. A e tumau i le faamaoni, o le a i ai le Agaga Paia iina e taiialaina oe i nei taimi uma o le fememea'i, e faamafanafana ia te oe, ma faamanatu atu ia te oe ua i ai se fuafuaga a le Alii mo oe. Afai ua i ai lou faamanuiaga faapeteriaka, suesue i ai ia iloa ai le mea o loo teuina e le Alii mo oe.

Rae B., 17 tausaga, Uosigitone, D.C., ISA

Mafaufau e uiga i Ou Faamanuiaga



O se tasi o mea e aumaia ai ia te au le olioli ma le faamoemoe i nei taimi faigata o le faaoga lea o se taimi e nofo ai ma mafaufau e uiga i o'u faamanuiaga ma lo'u iloa i le talalelei. O nisi taimi e faigofie e pei o le i ai o se uo silisili po o se mea e maoae e pei o le ata o le faaolataga e faatumuina ai au i le olioli ma ou manao ai e faaso'a atu le olioli. O le mea lena ou te tausia ai le lelei o o'u uiga faaalii.

Annette M., 15 tausaga, Michigan, ISA

Manatua le Malumalu



A ou lotovaivai, ona ou mafaufau loloto lea i upu o loo maua i le faaiuga o le autu a Tamaitai Talavou: "Matou te talitonu o le a matou talia ma ola i nei mataupu taua, o le a matou saunia e faamalosi i le aiga ma le auaiga, osia ma tausia feagaiga paia, maua sauniga o le malumalu, ma olioli i faamanuiaga o le faaeaga." E mafai ona ou maua le mafanafana i nei upu, ma ou te iloa o le a faataunuaina i lo'u olaga ma olaga o tamaitai talavou amio mama uma. E leai so'u masalosalo, e i ai lo'u faamoemoe i sauniga paia o le malumalu. O faamanuiaga o se olaga amiotonu e le muta, ma a ou

manatuaina nei mea, e faatumulia lo'u loto i le olioli, faamoemoe, alofa, ma le lototele.

Nathalia M., 18 tausaga, Mérida, Venezuela

la i ai i le Au Manumalo



Ina ia tausia se uiga faaalii lelei, e tatau ona e iloaina le upumoni faigofie lena: o le 'au a le Alii o le 'au manumalo lea i le iuga. O lona faigofie lena. E leai se malosi o Satani e faatoilalo ai le Atua. Aua ua uma ona tatou iloa le au manumalo, o lea e manaomia ai ona tatou tulaui atu e tumau ai i le 'au a le Alii. A tatou ola agavaa e ulu atu i le malumalu, ua tatou ofuina la tatou toniga e iloa ai o loo tatou i ai i Lana 'au. O le faitauina o a tatou tusitusiga paia, faia o a tatou tatalo, ma le auauna atu i o tatou uso ma tuagane, tatou te maua ai le fiafia moni lea e faafaigofie ai ona i ai o tatou uiga lelei faaalii.

Brayden F., 17 tausaga, Utah, ISA

Atiina Ae se Uiga Faaalia o le Lotofaafetai

Aua nei tulaui atu i taimi o faigata. Ou te tausia se "Api Talaaga o le Faafetai." O aso uma lava ou te tusi ai e le itiiti ifo i le tasi le mea ou te faafetai ai i

lena aso. Po o le a lava le faaletonu sa foliga mai ai se aso, e mafai lava ona ou maua se mea e faafetai ai. Faitau ou faamanuiaga. O le atiina ae o se uiga faaalii o le lotofaafetai e mafai ona fesoasoani ia te oe e tulaui ai i mea lelei i lou olaga.

Ashlee H., 18 tausaga, Oklahoma, ISA



O LOU LUMANAI MATAGOFIE

"E finagalo le Alii ia te outou, a'u ou talavou e, ina ia outou naunau ma o outou loto atoa e tausia ma ola ai i nei upumoni o le talalelei o loo maua i tusitusiga paia. A outou faia lena mea, o le a mamao atu la outou vaai nai lo le taimi nei, ma o le a outou iloa atu ai o outou lumanai matagofie ma le ofoofogia faatasi ai ma avanoa ma tiutetauave. O le a outou naunau e galulue malosi ma onosai mo se taimi umi, ona outou maua ai lea o se uiga faaalii lelei mo le olaga."

Peresitene Dieter F. Uchtdorf, Fesoasoani Lua i le Au Peresitene Sili, "Iloa le luga mai le Amataga," Liahona ma le Ensign, Me 2006, 44.

O LE ISI FESILI

"Pe faapefea ona ou tali atu i fesili a a'u uo e uiga i le malumalu pe afai e le tele so'u lava iloa i ai?"

Auina mai lau tali a o lei oo i le aso 15 Ianuari, 2012, i le:


Liahona, Questions & Answers 1/12
50 E. North Temple St., Rm. 2420
Salt Lake City, UT 84150-0024, USA
Po o le i-meli:

liahona@ldschurch.org

E ono faapupuina tali mo le uumi po o le manino.

O le faamatalaga ma le faatagaga o loo i lalo e tatau ona aofia mai i lau i-meli po o le tusi: (1) igoa atoa, (2) aso fanau, (3) uarota po o le paranesi, (4) siteki po o le itu, (5) lau faatagaga tusitusia, ma, afai e itiiti ifo i le 18 ou tausaga, o le faatagaga tusitusia a ou matua (e talia foi le i-meli) e lolomiina ai lau tali ma lou ata.

E LE O TUUA NA O OUTOU



"Ou te le tuua outou o matuaoti;
ou te sau ia te outou"

(Ioane 14:18).

Sa Liligi Mai e le Alii Faamanuiaga

Sa ou taumafaufau, “Pe o ai le Atua? Pe o Puta, Iesu Keriso, po o se isi atua?”

Saunia e Kim Koung

Sa ou fanau i Kemupotia, lea o le toatele o tagata e Lotu Puta. Ina ua mavae le fasiotiga o le anoanoai o tagata i le puleaga a Khmer Rouge, sa toatele i latou na sao mai e lei malamalama pe aisea, ae pe i ai se Atua, ua Na faatagaina ai lenei mea e tupu i o matou tagata. I le 14 o o’u tausaga, sa ou taumafaufau ai foi i le mea lava lea e tasi.

Ina ua muta lea puleaga, e toatele tapuaiga sa amata ona mauaa i Kemupotia. Sa ou le mautonu aua sa aoaoina e lotu le tele naua o mea eseese. Sa tumau pea lo’u aiga i le Lotu Puta, ae sa ou manao i ni tali i fesili o lo’u agaga: o fea na matou o mai ai, aisea ua matou i ai iinei, a o fea foi matou te o i ai pe a uma lenei olaga?

I se tasi aso ina ua ou fo’i mai le aoga, sa fai mai le uso o lo’u tina e i ai ni alii talavou se toaula e ofutino papae ma fusiua sa o mai i lona fale ma talanoa atu e uiga ia Iesu Keriso. Sa ofo o ia aua sa lelei le la faa-Kemupotia. Sa ou fia aoa e uiga ia Keriso. Sa ou fia iloa po o ai na faia i matou. Sa ou taumafaufau, “Pe o ai le Atua? Pe o Puta, Iesu Keriso, po o se isi atua?”

Sa ma taliaina ma le uso o lo’u tina ia faifeautalai. I le lesona muamua, sa ma lagonaina le Agaga o ta’u maia ia i ma’ua e moni mea sa la fai mai ai. Sa la tuu maia ia i ma’ua se Tusi a Mamona ma folafola mai afai ma te faitauina, mafaufau loloto i ai, ma fesili atu i le Atua ma se loto faamaoni, ma le faatuatua ia te Ia, o le a Ia faaalina mai le moni ia i ma’ua. Sa ou lagonaina le moni. Sa ou taliaina

le talalelei, faatasi ai ma le uso o lo’u tina ma lana fanau. Pe tusa o se masina mulimuli ane, ae papatisoina i matou uma ma faamauina.

Sa ou auai i le seminare mo le fa tausaga ma le inisitituti mo le tasi le tausaga ma sa avea foi o se faiaoga seminare. Ina ua 19 o’u tausaga, sa ou lagona ua tatau ona ou alu i se misiona. Sa ou talanoa i o’u matua, ma sa la fai mai atonu o se manatu lelei, o lea sa ou tuuina ai i totonu la’u talosaga. I se masina mulimuli ane, sa ou maua lo’u valaauga e galue i le Misiona a Sacramento Kalefonia, i le gagana Peretania ma le Kemupotia.

Ona ua ou taliaina lo’u valaauga, ua tele faamanuiaga e tuuina mai e le Alii ia te au. O lo’u uso laitiiti na te lei faia ni faaiuga sili. Sa ou anapogi ma tatalo mo ia, ma sa tupu se vavega ae ou te lei alu mo la’u misiona. Sa ou papatisoina o ia, ma ua toaga nei o ia i le Lotu ma ua alu i le seminare. E tele isi faamanuiaga ua maua e lo’u aiga, ma sa liligiina mai foi e le Alii i o’u luga ia faamanuiaga i le taimi o la’u misiona.

O Iesu o le Keriso. O loo soifua o Ia. E alofa o Ia ia i tatou taitoatasi ma e silafia i tatou i o tatou igoa. Na te silafia o tatou luitau ma faafitauli, ma ou te iloa o le a Ia faamanuiaina i tatou a o tatou taumafai e tausi Ana poloaiga. ■





Saunia e Elder
Carl B. Pratt
O Le Fitugafulu

O SE MOLIMAU MAUTINOA

O lo'u ola ae i se aiga e malolosi o le Au Paia o Aso e Gata Ai, ou te manatu ai sa ou ola a'e ua i ai se molimau. Ou te lei masalomia moni lava le moni o le talalelei. E faapei o le tele o talavou, e i ai lava taimi ou te fesiliga ai ni mea i lo'u mafaufau, ae ou te lei lagonaina lava faapea e le'i moni le Ekalesia.

O le faatuatua lenei sa musuia ai a'u e auuana i se misiona. Sa ou iloina e tatau ona ou auuana atu. Peitai e ui lava ina leai ni o'u masalosologa matuia e uiga i le Ekalesia, ae sa ou iloina e tatau ona maua sa'u lava molimau.

Sa amata la'u misiona ia Fepuari 1961, ina ua ou tuua le taumalulu o le Aai o Sate Leki mo le vevela o le taumafanafana o Atenitina. Sa leai ni aoaoga faamasani o le gagana mo faifeautalai i lenei taimi, ae sa folafola mai e lo'u peresitene o le misiona o le a lelei le matou tautala faa-Sipaniolo pe a uma ona faitauina atoa leotele le Tusi a Mamona. Sa ou aoaoina le faa-Sipaniolo a o ou laititi ma sa matuai lelei la'u tautala ai i nai vaiaso muamua, ae sa ou mulimuli lava i faatonuga a lo'u peresitene o le misiona.

I le taulaga muamua sa tofi i ai a'u,

sa ma nonofo ma la'u soa i le fale i tua o se faleoloa tuai. Sa le mafai ona ma talai i le aoauli i le taimi malolo i Atenitina, o lea sa ou faaaogaina ai lenei taimi e tatalo ai ma faitau le Tusi a Mamona i luma o le faitotoa o le faleoloa tuai.

I se tasi aso, i le fiaafe maila mai le fale i luma o lenei faleoloa, sa ou tu ai e mafaufau i le mea sa ou faitauina. A e tatalo ma mafaufau loloto i le Tusi a Mamona, e mafai e le Agaga ona uunaia oe. Sa ou mafaufau loloto i le mea sa aoao mai e le Tusi a Mamona, sa ou mafaufau e uiga ia Iosefa Samita o faaliliuina ia papatusi, ma sa ufitia au i se lagona faafuasei. O le taimi lenei sa ou iloa ai e moni mea uma sa aoaoina ai au i lo'u olaga atoa. Sa faafuasei ona manino mai ia te au o Iosefa Samita o se perofeta ma o loo ou faitauina le afioga a le Atua. E moni uma lava.

O lenei lagona faafuasei sa pei e faauila. Sa ufitia ai lo'u tino atoa mai le ulu e oo i o'u tamatamaiva. E le o se lagona maalili, e le o se lagona mufoi. Ae o se molimau mautinoa.

Ou te lei faagaloina lava lenei aso, ma talu mai lenei taimi e tele taimi na ou lagonaina ai le Agaga Paia. Ona

o lenei aafiaga, ua ou iloa ai le Agaga Paia pe a la molimau mai ia te au. E le tutusa lenei lagona i taimi uma, ae e mafanafana lava ma mautinoa i taimi uma.

E ui ina fetalai patino mai le Agaga ia i tatou, ae o le folafolaga a Moronae e mo tagata uma (tagai Moronae 10:3-5). O le folafolaga a Moronae i le Tusi a Mamona e faapea o le a molimau mai e le Agaga ia te outou le moni o le Tusi a Mamona pe afai o le a outou faitau i ai, sutesue, mafaufau loloto, ona tatalo ai lea ma le loto faamaoni. E faatatau lenei folafolaga ia te au, ia te oe, ma tagata uma o i le lalolagi. O le a oo mai se molimau mautinoa ia i latou o ē sailia. ■

FAALATALATA ATILI ATU I LE ATUA

"Na ou tauina atu i le usoga e faapea o le Tusi a Mamona o se tusi silisili ona sa'o i tusi uma lava o i le lalolagi, ma o le maa autu o la tatou ekalesia, ma e sili atu ona latalata le tagata i le Atua e ala i le usitaia o ona mataupu, nai lo se isi lava tusi."

Iosefa Samita, i le Aoaoga a Peresitene o le Ekalesia: Iosefa Samita (2007), 68.



O LE FAAILOGA LENEI

ia te Outou

“E oo i perofeta uma o e sa vavalu talu mai le amataga o le lalolagi—sa latou lei tautatala tetele pe itiiti mai ea e uiga i nei mea?” (Mosaea 13:33).

Saunia e Whitney Hinckley

O le Kerisimasi o se taimi e faatumulia i le faanaunauga—faanaunauga i meaalofa, o meaai lelei, ma faafiafiaga. O nisi taimi e foliga mai e uumi tele ona faatalitali i aso muamua e 24 o le Kerisimasi. Mafaufau la pe afai e te faatalitali mo le 1,000 tausaga!

O le uluai Kerisimasi—le soifua mai o le Faaola—sa valoia mo le fiaselau o tausaga, mai ia Isaia i le Feaigaiga Tuai e oo mai ia Samuelu le sa Lamana i le Tusi a Mamona. Sa silafia e perofeta anamua ma sa faatalitali i faailoga o le afio mai o Keriso, ma sa latou faatalitali ma le onosai mo na faailoga. Sa latou valoia Lona afio mai ina ia mafai ai e isi ona iloa ia faailoga ma latou olioli ai i le iloa na afio mai o Ia! O le faataunuuga o na valoaga o se moli-mau lea i Lona valaauaga paia o le Faaola ma le Togiola.

Faitau ia valoaga nei i le soifua mai o Iesu Keriso ma tulaga faavavega e faatatau i ai ma aoao ai i le ala na faataunuuna ai nei valoaga.

Fanau mai ia Maria, o se Taupou

Valoaga: E fituselau tausaga a o lei fanau mai o ia, sa valoia ai Maria o le a avea ma tina o Keriso. Na tusia e Isaia, “E tuuina mai e le Alii lava le faailoga ia te outou; Faauta, e to le taupou ma fanau mai se tama tane, na te faaigoa foi ia te ia o Emanuelu!” (Isaia 7:14).

Sa faailoa foi e Alema le Itiiti ia Maria o le tina o le Faaola pe tusa o le 80 tausaga a o lei fanau mai Iesu ma mai le isi afa o le lalolagi le va ma Isaia: “O le a fanau mai o ia ia Maria, . . . ona o ia o se taupou, o se ipu pele ma filifilia, o lē o le a faamalumuina ma to i le

mana o le Agaga Paia, ma fanau mai se atalii, ioe, o le Alo lava o le Atua” (Alema 7:10).

Faataunuuga: E valusefulu tausaga mulimuli ane, ae faaali le agelu o Kaperielu “i se taupou na faufautane i le tagata e igoa ia Iosefa, . . . o Maria foi le igoa o le taupou” (Luka 1:27). O Maria le tina o Iesu, o le Alo o le Atua.

Ua Fanau mai mo i Tatou se Tama

Valoaga: Sa valoia e Isaia le fanau mai o le Mesia: “Aua ua fanau mai mo i tatou le tama, ua foaiina mai mo i tatou le atalii: e i lona ua le malo, e igoa foi o ia, o le Silisili Ese, o le Faipule, O le Atua malosi, O le Tama o le Faavavau, O le Alii o le Filemu” (Isaia 9:6).

Faataunuuga: Na faataunuuna i le misiona a le Faaola mea uma sa valoia e Isaia, ae na fanau mai Keriso i tulaga maualalalo: “Aua o le aso nei ua fanau ai i le aai a Tavita lo outou Faaola, o le Alii ia o Keriso. . . e iloa e outou le tama meamea ua aui i le ie, o loo taoto i le fale povi” (Luka 2:11–12).

Fanau mai i Peteleema

Valoaga: Na soifua le perofeta o Mika pe tusa o le taimi lava lea na i ai Isaia. Sa ia valoia le fanau mai o le Alii i le nuu o Peteleema: “A o oe Peteleema Efarata, e itiiti oe i afe o Iuta, a e tupu mai ia te oe mo a’u o lē na te fai ma faipule ia Isaraelu, o lona tupu mai talu mai anamuā lea, talu mai ona po o le vavau lava” (Mika 5:2).

Faataunuuga: E fituselau tausaga mulimuli ane, ae poloaiina e Herota ua ta’u atu e ana tusiupu le mea e mafai



ona maua ai le faipule fou: “Ua ia fesili atu ia te i latou po o fea e fanau ai le Keriso. Ona latou fai mai ai lea ia te ia, O Peteleema i Iutaia” (Mataio 2:4–5).

Mai le Fanauga a Tavita

Valoaga: Sa ta’u atu e le Alii ia Ieremia i le ono seneturi a o lei fanau mai le Keriso e faapea o le a sau o Ia i le gafa o Tavita: “O ia ona po, ma lena lava tausaga, ou te faatupuina ai ia Tavita o le La laau amiotonu; e faia foi e ia le faamasinoga ma le amiotonu i le nuu” (Ieremia 33:15).

Faataunuuga: Ua tuuina mai e Mataio ia i tatou le gafa o Keriso, o loo faaalua ai le auala ua tupuga mai ai le Alii mai lena tupu o aso anamua: “O le tusi i le gafa o Iesu Keriso, o le atalii o Tavita, o le atalii ia o Aperaaamo. . . . O lenei, o tupulaga uma e afua mai ai Aperaaamo e oo ia Tavita, e sefulu ma le fa ia tupulaga; e afua foi ia Tavita e oo i le tafeaga i Papelonía, e sefulu ma le fa ia tupulaga; e afua foi i le tafeaga i Papelonía e oo i le Keriso, e sefulu ma le fa ia tupulaga” (Mataio 1:1, 17).

Asiasia e Tupu

Valoaga: E ui lava i tulaga maualalalo o Lona soifua mai, ae na tautino mai lava e


perofeta o le a o mai tupu e vaai le Keriso: “E o mai Nuu Ese i lou malamalama, o tupu foi e o mai i latou i le pupula o lou alu ae” (Isaia 60:3).

Sa ta’u atu e Samuelu le sa Lamana ia sa Nifae i le lima tausaga a o loma le fanau mai o Keriso e uiga i faailoga o le a faafeao maia Lona afio mai. O se tasi o nei faailoga o le fetu sa mulimuli ai le Au Makoi: “O le a i ai se fetu fou e oso mai, o se ituaiga o fetu tou te lei vaai lava i ai; ma o lea foi o le a avea mo se faailoga ia te outou” (Helamana 14:5).


Faataunuuga: Sa iloa e le Au Makoi le faailoga latou te sailia aua ai lava na latou sailia le faataunuuga o valoaga. Ua latou faapea mai, “Po o fea o i ai le ua fanau mai o le Tupu o tagata Iutaia? Aua ua matou vaaia lona fetu i sasae, ua matou o mai ai e ifo atu ia te ia” (Mataio 2:2).

I le Lalolagi Fou, sa vaaia foi e sa Nifae ia faailoga ma sa latou iloaia ua faataunuaina ia valoaga: “Ma ua faataunuaina, ioe, mea uma lava, o mea auiliili taitasi, e tusa ma upu a perofeta. Ma sa oo ina oso mai se fetu fou, e tusa ma le upu” (3 Nifae 1:20–21).

Mafaufau i le tele o lou olioli pe a e tatalaina au meaalofa o le Kerisimasi. E faapefea ona e faatusaina pe afai sa e faatalitali mo faailoga o le soifua mai o Keriso seia iu lava ina vaaia ua faataunuaina? Ua leva ona saunia e lo tatou Tama Faalelagi nei faailoga e le gata ia olioli faatasi ai le au faatuatua i le lalolagi atoa i le soifua mai o Lona Alo, ae ia molimauina ai foi le vala-
auga paia o Keriso. ■



O Meaalofa na Mafaufauina



1 Tupu 9:14, 28) aua o le faatusa o le tulaga tautupu ma le aigatupu—o se meaalofa ua fetaui lelei mo le “Tupu o tupu” (1 Timoteo 6:15).

Pulu Muro

Aoga mautinoa: E le gata i lona taua tautupe, ae sa faaaogaina foi le pulu muro o se faamanogi e manaia lona manogi ma se fagusausau.

Uiga faafaatusa: O le pulu lipano e maua mai i se laau vine manaia ma sa faaaogaina i sauniga o le perisitua, i taulaga mu (tagai Levitiko 2:1), ma i le suauu mo le faauuina o faitaulaga. O lea, e mafai ona faatusa i le perisitua a le Alii ma Lana matafaioi o le Tamai Mamoe a le Atua o le a ositaulagaina mo i tatou (tagai Ioane 1:29).

Pulu Muro

Aoga mautinoa: O le pulu muro, o se suauu oona mai se laau vine, sa taua foi i le tamaoiga, ae atonu sa sili ona aoga ia Maria ma Iosefa mo lona faaaogaina o se vailaau.

Uiga faafaatusa: I le Feagaiga Fou, e masani ona fesootai le pulu muro mo le atulalaina ma le faasoina o tino maliu (tagai Ioane 19:39–40). O le aoga o le pulu muro o se vailaau e mafai ona faatusa i le matafaioi a Keriso o se Fomai o Fomai, ma lona aoga i le faasoina o tino maliu e mafai ona faatusa i le “ipu oona” o le a Ia inumia pe a puapuagatia o Ia mo a tatou agasala (tagai MF&F 19:18–19). ■

Aisea na avatu ai e le Au Makoi ia Iosefa ma Maria ia auro, pulu lipano, ma le pulu muro?

E toatele tagata e talitonu e taulia le mafaufau pe a oo ina foai atu meaalofa. Atonu ona o le mafaufau o i tua atu o le meaalofa, e taulia tele ai nai lo le na o se mea aoga pe matagofie—e avea ai le meaalofa o se faatusa o le alofa o lē foaiina atu le meaalofa po o le manatua o le tagata o loo avatu i ai. O nisi meaalofa e tele atu sona uiga nai lo le mafaufau o i ai i tua atu o le meaalofa; o nei ituaiga o meaalofa e i ai se faatusa lautele ua taliaina e faaopoopo atili ai lona taua. A i ai i se meaalofa mea uma e tolu—aoga mautinoa, taua patino, ma le uiga—e mafai ona avea ma meaalofa

e aupito sili ona mafaufau i ai ma talisapaia i lo meaalofa uma.

Manatu i le mafaufau o i tua atu o meaalofa o le auro, pulu lipano, ma le pulu muro na tuuina atu e le Au Makoi i le tamaitiiti o Keriso (tagai Mataio 2:11). E le o ta’u mai e le Tusi Paia le mafuaaga na aumaia ai e le Au Makoi nei meaalofa faapitoa, ae e tofu nei meaalofa uma ma se taua mautinoa ma atonu foi o se uiga faafaatusa mo le Alo o le Atua ma Ona matua faalelalolagi.

Auro

Aoga mautinoa: Mo se ulugalii talavou e le o toe mamao ona totogi lea o le malaga atu i Aikupito e aloese ai mai le ita o Herota, o le a avea le auro o se meaalofa aoga tele.

Uiga faafaatusa: O le auro o se meaalofa masani mo tupu (tagai



O Latou E TATAU ONA SUI

Ina ua ou papatiso, sa teena e lo'u aiga le Ekalesia. O lea la sa ou tau mafau-fau ai pe faapefea ona ou tali atu pe a feteena'i o latou olaga ma mataupu faavae o le talalelei.

Saunia e Francisco Javier Lara Hernández

I na ua ou papatiso, sa na o au le tagata o lo'u aiga na taliaina le talalelei. Sa 19 o'u tausaga, ma sa ou fiafia e uiga i lo'u papatisoga. Sa taliaina au e uso ma tuafafine o le Paranesi a Panuco Muamua i Veracruz, Mekisiko. E le gata i lea, ae sa amata ona ou sauniuni e faamisiona tala'i i le taimi lava e atoa ai le tausaga talu ona avea au ma tagata o le Ekalesia. Sa matagofie le iloa e moni le Ekalesia, ma sa ou manao e faasoa atu le talalelei i isi.

Sa teena e lo'u tama, o le toalua o lo'u tamā (na oti lo'u tina i le 12 o o'u tausaga), ma o'u uso e toatolu le Ekalesia ina ua ou papatiso. O le mea e leaga ai, sa lei lelei ona ou tali atu i ai. Sa ou le faaloalo ia te i latou. Ou te lei amanaiaina lo'u tama ma ona manatu. Ina ua ou ta'u atu ia te ia e le o toe mamao ona ou alu lea i se misiona, sa le fiafia aua o le a ou le toe faigaluega aemaise lava atonu o le a mamao se mea ou te alu i ai. Sa faalavelave ai lava ia te au i taimi uma e feteenai ai olaga o lo'u aiga ma a'u mataupu faavae, e pei o lo latou matamata TV pe faalogologo

i polokalama faamusika sa ou manatu e le talafeagai ma Aso Sa, pe valaaulia foi au e lo'u tama i le toonai i Aso Sa anapogi.

Sa ou ta'uamionuina o'u uiga le lelei sa faaalua i lo'u aiga i lo'u faapea ifo ia te a'u lava, e leai lava se mea sese o o'u faia—i lo'u avea ai o se tagata o le Ekalesia, e tatau lava ona ou ola i mataupu faavae o le talalelei tusa lava pe faalavelave mai lo'u aiga. Sa ou faapea ifo ia te au lava o *i latou* e tatau ona sui. O le mafuaaga lea, sa le lelei ai le ma mafutaga ma lo'u tama. Sa atili ai ona leaga ona o o'u uiga faaalua ma lo'u faamaualuga. Sa ou faaaauai ai lava faapena—lo'u le popole i lona manuia faaleagaga.

I se tasi aso a'o ou suesue mo la'u vasega o le inisitituti, sa ou tau atu ai i le 1 Nifae 16, i le mea lea na gau ai le aufana a Nifae, ma sa faigata ai ona maua ni meaai. Sa amata ona muimui tagata uma—o Lamana ma Lemuelu, e pei lava o la la'ua masani, faatasi ai ma lo latou tama, le perofeta o Liae. Sa tali atu Nifae e ala i le faia o se aufana ma se au mai se laau ma fesili atu i lona tama po o fea e alu e maua mai ai se meaai. Sa tatalo lona tama mo se tai-taiga, ma sa a'oa'i o ia e le Alii ona o lona muimui. Sa talia lelei e Liae ma sa ia toe tauaveina lana matafaioi o se taitai o lona aiga ma o se perofeta a le Alii. E lei faamasinoina e Nifae lona tama i lona tulaga vaivai, na te lei mafaufau foi faapea ua le tatau ona toe avea ma perofeta, e oo lava i le taimi na talanoa ai Nifae ma le Alii ma ia mauaina faaaliga vaaia.

Ina ua ou faitauina ma malamalama i lenei tala, sa vave ona ou mafaufau i le leaga o la'u amio i lo'u aiga. Sa ou maasiasi i o'u uiga faaalua—i lo'u manatu sa sili atu a'u nai lo i latou—ma sa sili ona ou lagonaina le faanoanoa i lo'u le faaloalo i lo'u tama. Sa ou faanoanoa i lo'u le faamua-muaina o le faasoa atu o le talalelei ia i latou.

Sa ou lei vaai i lo'u aiga i le tulaga e mafai ona avea ai



Sa faasolosolo malie le suiga o o'u uiga ma la'u amio. E ui lava ina tele taimi e le tutusa ai o ma manatu ma lo'u tama, ae sa ou taumafai lava ou te amanaiaina ona manatu i taimi uma.


i latou. Sa na o lo'u taulai atu lava i o latou vaivaiga. Mai lava i lena aso, sa faasolosolo malie ona suia o'u uiga faaalua ma la'u amio. Sa ou taumafai e faaalua i taimi uma i manatu o lo'u tama, e ui lava e tele taimi ou te le ioeina ai. Afai na te valaauliaina au i le toonai ae o la ou te anapogi, ou te faamalie lava i ai i le le mafai ona ma aai. Ua le o toe faalavelaveina a'u i polokalama po o musika latou te matamata ai pe faalogologo ai i Aso Sa, ou te manatua o la lava latou te lei osifeagaiga ma lo tatou Tama Faalelagi, e pei ona ou faia.

I se tasi taeao a o ou fesoasoani i lo'u tamā i le faiga o se meaai, sa ou ta'u atu ai ia te ia le tele o lo'u alofa i ai ma ou faatoese foi i ai i la'u amio lē mafaufau. Sa ou ta'u atu ia te ia lo'u mitamita ia te ia o lo'u tama, ma ou te manao ina ia maua se ma sootaga filemu ma ia.

Sa amata ona suia mea uma. Sa faaitiitia ma sa mou atu le feupua'i. E ui lava sa ou mafaufau o le a umi se taimi ona faatoa auai lea o lo'u aiga i le Ekalesia, ae sa faaleleia o latou uiga faaalua i le Ekalesia. Semanu e le tutupu nei suiga pe a na ou le suia muamua.

Ina ua mavae le tausaga e tasi talu ona avea au ma se tagata o le Ekalesia, sa ou faamisiona tala'i i le Misiona a Mekisiko Tijuana. Toe tolu masina ae ou te le'i toe foi, sa ou maua ai se tusi sa faapea mai ua talia e lo'u aiga le talalelei ma o le a papatisoina. Ina ua ou toe foi atu, ua avea i latou ma tagata o le Ekalesia.

I tausaga e 15 o avea a'u ma se tasi o le Ekalesia, o se tasi o a'u lesona aupito sili mai lo'u suesueina o le Tusi a Mamona ma faatasi ai ma fanau a le Atua, ua sili ona latalata mai ia te au: o lo'u aiga. ■



Feiloai ia Uso Iosefa

Ua e iloa o Iosefa Samita o le uluai perofeta i nei aso e gata ai, ae pe na e iloaina sa fiafia o ia e 'ata ma faataliē tagata? po o lo la vaetamaina ma lona toalua o Ema o se masaga? O nai nisi nei o mea atonu e te le o iloaina e uiga i le Perofeta o Iosefa:

- Na fanau Iosefa Samita le Itiiti i le aso 23 Tesema, 1805, i Sarona, Veremona, ISA, ma sa faaigoaina i le igoa o lona tama. O uso ma tuafafine o Iosefa, i le faasologa o tausaga, o Alavini, Ailama, Sofaronia, Samuelu Harrison, Efaraima, Viliamu, Katerina, Don Kalosi, ma Lusi.


- Ina ua fitu tausaga o Iosefa, sa maua o ia i le fiva taifoi. Sa toe malosi mai o ia i le fiva, ae ua fula ai lona vae. E iva fasi ponaivi na aveesea mai ai e aunoa ma se vai faagase (vai e taofi ai le tiga). Sa savali o ia ma si faavaesi'i teisi i aso uma na totoe o lona ola.¹
- Sa 14 tausaga o Iosefa ina ua faatoa tatalo leotele ma vaai ai i le Tama Faalelagi ma Iesu Keriso (tagai Talafaasolopito—Iosefa Samita 1:17).
- Na maliu le uso matua o Iosefa, o Alavini, ina ua 17 tausaga o Iosefa. Toetoe a atoa le 13 tausaga mulimuli ane ae vaai Iosefa ia Alavini i se faaaliga vaaia o le malo selesitila (tagai MF&F 137:5–7).
- Sa lei taliaina Iosefa e Isaac Hale, le tamā o Ema, ma sa lei manao e faaipoipo i la'ua. Sa tonu ia Iosefa ma Ema e sosola ma sa faaipoipo ai i le aso 18 Ianuari, 1827.²
- Sa faaipoipo Ema ma Iosefa mo le 17 tausaga ma e toa 11 le la fanau, e toa 6 na maliliu a o laiti.
- Ina ua ta'e lona nifo i le taimi na osofaia ai o ia e tagata leaga i le 1832, sa fai si faaletonu o le faaleoga o upu a Iosefa pe a tautala.³
- Sa fiafia Iosefa e taalo i taaloga. O na taaloga sa aofia ai le taalo i le polo, piiga, tau'aigā polo kiona, fagotaga, ma le tosogā fasilaau.⁴
- Sa faamatala e se uluai Au Paia o Aso e Gata Ai le leo o Iosefa e pei "o faititili o le Lagi."⁵
- O Iosefa sa malosi ma umi, pe tusa ma le 6'2" (1.9 m) ma o lona mamafa e tusa ma le 200 pauna (91 kg).⁶
- O Iosefa sa le gata o le Peresitene o le Ekalesia, ae sa tauva foi mo le


peresitene o le Iunaite Setete.⁷

- Ina ua mavae le faamaturoida o Iosefa, sa tusia e Elder Ioane Teila (1808–87), i le taimi lea o i ai i le Korama a Aposetolo e Toasefulu-lua, e faatatau ia te ia, "O Iosefa Samita, le Perofeta ma le Tagata-vaai a le Alii, e tele atu mea na ia faia, vagana ai lava Iesu, mo le faaolataga o tagata i lenei lalolagi, nai lo se isi lava tagata na ola ai" (MF&F 135:3). ■

FAAMATALAGA

1. Tagai *Presidents of the Church* (Church Educational System student manual, 2003), 3–4.
2. Tagai "Life of the Prophet: Joseph and Emma," JosephSmith.net.
3. Tagai "Life of the Prophet: Friend of Man," JosephSmith.net.
4. Tagai Alexander L. Baugh, "Joseph Smith's Athletic Nature," i le *Joseph Smith: The Prophet, the Man*, ed. Susan Easton Black and Charles D. Tate Jr. (1993), 137.
5. Joseph L. Robinson, in "Life of the Prophet: Teacher of God's Truth," JosephSmith.net.
6. Tagai Baugh, "Joseph Smith's Athletic Nature," 138–39.
7. Tagai "Life of the Prophet: Leading with Love," JosephSmith.net.





Pe Mafai Faapefea Ona OU MULIMULI i le FAAOLA?

*Ua faasoa mai e
Elder Quentin L.
Cook o le Korama
a Aposeolo e Toase-
fululua nisi o ona
manatu e uiga i
lenei mataupu.*



Tatou te faaalua lo tatou alofa
mo le Atua pe a tatou tausia
Ana poloaiga ma auauna atu
i Ana fanau.



O le faamanatuga e mafai ai e i
tatou ona molimau atu i le Atua
o le a tatou manatuaina Lona
Alo ma tausia Ana poloaiga a o
tatou faafouina a tatou fea-
gaiga o le papatisoga.



Sa tautino mai e le Faola o le
a iloa i tatou o Ona soo pe afai
tatou te fealofani.



Mulimuli i lo tatou perofeta soifua,
Peresitene Thomas S. Monson. O ia o se
faataitaiga lelei tele o se tasi o mulimuli
i le Faola.



E tatau ona tatou tauaveina le suafa
o Iesu Keriso ma mauaina Ona foliga
i o tatou mata ina ia oo i le taimi e
afio mai ai o Ia o le a tatou avea atili
e faapei o Ia.

O Na Upu

Saunia e Angie Bergstrom Miller

E faavae i se tala moni

“Aua tou te tauto i lo’u igoa ma le pepelo, aua foi e te faaleaga le igoa o lou Atua” (Levitiko 19:12).

Sa le fiafia Shelby e faalogo i upu leaga, aemaise lava pe a ta’u fua e ana uo i le aoga le suafa o le Alii.

“Faamolemole aua ne’i faia na upu a o ou i ai,” sa ia fai atu ai i ana uo.

Ae o nisi taimi e galo ai ia te i latou, ona ia toe faamanatu ai lea ia i latou.

I se tasi aso sa faasesepa ai mata o le uo a Shelby o Beth ma fai mai, “Oi, ioe, ua galo ia te au. E leai se tasi e faia *na* upu i luma o Shelby. O loo taumafai o ia ia tatou *lelei* e faapei o ia.”

Sa talie isi teineiti.

Sa maasiasi Shelby. Sa lagona lona le fiafia i lona fai soo i ana uo e aua le faia na upu pe a i ai o ia—aemaise lava pe a latou manatu e le leaga ia upu.

Ina ua taunuu Shelby i le fale mai le aoga, sa faapalasi ifo i lona moega. E lei umi ae sau lona tina, ma sa faamatala i ai e Shelby le mea na tupu.

“Taumafai e aua e te popole i ai,” o le tala lea a Mama.


“Tau lava o lou faia o le mea sa’o, ona oo lava lea ina le toe mananao au uo e toe fai na upu.”

“E afaina i se a pe a fai e a’u uo na upu?” o le fesili lea a Shelby. “E le faapea o o’u palauvale ai.”

“Ua aoaoina i tatou e perofeta e tatau ona tatou tausisia lo tatou agavaa ia lagonaina le Agaga i taimi uma. O upu leaga e faatiga ai i le Agaga,” o le tala lea a Mama.

Sa manatua e Shelby taimi na ia lagonaina ai le Agaga: i afiafi faaleaiga, pe a ia tuuina atu lana molimau, pe a ia mauaina se faamanuiaga mai lona tama. Sa fiafia Shelby i lona lagonaina o le Agaga, ma sa ia le manao e faia se mea e taofia ai lena toafilemu, mafanafana.

Sa tonu ia te ia e ave a pea ma se faataitaiga i ana uo ma fesoasoani ia i latou ia malamalama sa le’i manao o ia e faalogo i na upu.



O le aso na sosoo ai i le aoga, sa ia toe faalogo ai foi i na upu.

“Faamolemole aua nei faia na upu pe a ou i ai,” na aioi atu ai Shelby ia Becca.

Sa faataupupula atu Becca ia Shelby ona lē ano lea i ai. Sa fiafia Shelby ina ua ia fai atu i ai ae sa lagona le faanoanoa ona ua le fiafia lana uo.

I le malologa, sa toe faalogoina foi e Shelby na upu. O le taimi lea, o Beth.

“Faamolemole aua nei faia na upu pe a ou i ai,” na fai atu ai Shelby.

“Malie lou loto,” na fai atu ai Beth ma faasesepa ona mata.

Sa toe le lelei foi le lagona o Shelby.

I le taimi o a’oga sofipolo ina ua tuua le aoga, sa ta ai e Shelby le polo. Sa taavale agai i le tulimanu muamua ma taunuu i ai a o lei oo atu Shelby. Sa faalogoina e Shelby ia Bonnie, le teineitiiti fou o lana ‘au, o ta’ufua le suafa o le Alii.

Sa faatuatuai Shelby. Ua le lava o ia i le fai atu i tagata e aua le faia na ituaiga upu a o i ai o ia. Sa lei manao o ia i isi teineiti e ula ia te ia.

“Faamolemole aua nei faia na upu a o i ai o ia.”

Sa faliu Shelby e vaai po o ai la na tautala.

Sa ta’u atu e Beth ia Bonnie, o Shelby o se Au Paia o Aso e Gata Ai ma na te le faia na ituaiga upu ma e na te le maua foi se fiafia i le faalogoina o na upu.

Sa faliu atu Bonnie ma tilotilo atu ia Shelby. “Malie lou loto Shelby. Ou te lei iloaina.”

Sa ataata atu Beth ia Shelby. “Ou te masalo ua matou faapei uma lava o oe,” o le tala lea a Beth.

Sa ataata Shelby. Sa fiafia o ia ona sa ia faia se faaiuga e avea o se faaitaiga lelei i ana uo ma mulimuli i fautuaga a le perofeta ina ia tausisia e ia le Agaga. ■

“**O** le a ou faaogaina ma le migao igoa o le Tama Faalelagi ma Iesu Keriso. O le a ou le palauvale lava pe faaogaina upu masoa.”

O Ou Tulaga Faatonuina
Faaletalalelei



O La Tatou Itulau



Angie D., 11 tausaga, Peru



Ariana A., 9 tausaga, Pasila



O Le Fanau mai o Iesu, saunia e Angeles R., 10 tausaga, Bolivia



Rebecca A., 7 tausaga, Venezuela

I se tasi Kerisimasi na ou tuuina ai ni kata fepasia'i a faifeautalal i a'u uo ma faiaoga i le aoga. Ia lanuari sa fai mai ai se faiaoga na ou tuuina i ai se kata, na ia telefoni i le numera o loo i luga o le kata ma sa ia maua mai ai se DVD o le Kerisimasi. Sa ia mata-mata ai ma sa fiafia tele i ai. Ou te manatu e taua tele ia kata fepasia'i a faifeautalal. A ou tufatufaina, e mafai ona ou lagonaina le Agaga. Ou te fiafia ai e faasoa le talalelei. Ou te iloa o loo soifua Iesu Keriso ma e alofa ia i tatou uma.

Raiane R., 11 tausaga, Pasila



I-meli mai sau atatusi, atapue, po o se aafiaga, mo La Tatou Itulau i le liahona@ldschurch.org, ma tusi ai le "Our Page" i le laina o le mataupu.

Pe lafo mai foi i le:

Liahona, Our Page

50 E. North Temple St., Rm.2420


Salt Lake City, UT 84150-0024,

USA

O tusiga taitasi e auina mai e tatau ona i ai le igoa atoa o le tamaitiiti, itupa, ma ona tausaga (e tatau ona 3 i le 12 le matua) faatasi ai ma igoa o matua, uarota po o le paranesi, siteki po o le itu, ma le faatagaga tusia a matua (e taliaina i-meli) e faaoga ai le ata o le tamaitiiti ma le tusiga na auina mai. E ono faasa'oina tusiga e auina mai mo le manino po o le uumi.


Kata o Malumalu

Ina ia fai a oe lava Kata o Malumalu, aveese le itulau lenei mai le mekasini, faapipii i se pepa malo, ona tipi lea o kata. E mafai ona faaopoopoina ia kata nei i kata na i ai i lomiga o le 2003 ma Aperila 2005 ma Setema 2007. Ina ia mafai ona lolomi nisi kopi o nei kata, alu i le liahona.lds.org.



Malumalu o Rexburg Idaho

Na faapaiaina i le aso 10 Febuari, 2008,
e Perisitene Thomas S. Monson




Malumalu o Curitiba Brazil

Na faapaiaina i le aso 1 Iuni, 2008,
e Perisitene Thomas S. Monson




Malumalu o Panama City Panama

Na faapaiaina i le aso 10 Aokuso, 2008,
e Perisitene Thomas S. Monson




Malumalu o Twin Falls Idaho

Na faapaiaina i le aso 24 Aokuso, 2008,
e Perisitene Thomas S. Monson




Malumalu o Draper Utah

Na faapaiaina i le aso 20 Mati, 2009,
e Perisitene Thomas S. Monson




Malumalu o Oquirrh Mountain Utah

Na faapaiaina i le aso 21 Aokuso, 2009,
e Perisitene Thomas S. Monson




Malumalu o Vancouver British Columbia

Na faapaiaina i le aso 2 Me, 2010,
e Perisitene Thomas S. Monson



Malumalu o Gila Valley Arizona

Na faapaiaina i le aso 23 Me, 2010,
e Perisitene Thomas S. Monson



Malumalu o Cebu Philippines

Na faapaiaina i le aso 13 Iuni, 2010,
e Perisitene Thomas S. Monson

E mafai ona e faaaogaina le lesona ma le gaoioiga lenei e aoao atili ai e uiga i le autu o le Peraimeri i le masina lenei.

Ua Aoao Mai e Tusitusiga Paia ia te Au e uiga i le **Soifua Mai ma le Afio Mai Faalua o le Faaola**

Saunia e Jennifer Maddy

Mekasini a le Ekalesia

“Aua e sau le Atalii o le tagata faatasi ma ana agelu i le mamalu o lona Tama; ona tauia lea e ia e taitasi e tusa ma lana galuega” (Mataio 16:27).

Mo le fiaafe o tausaga, sa molimau mai ai perofeta o Iesu Keriso, le Alo o le Atua, o le a fanau mai i le lalolagi. I tusitusiga paia, e mafai ona tatou faitau i mea na ta’ua e nei perofeta. I le Feagaiga Tuai, fai mai Isaia, o Iesu o le a avea ma Alii o le Filemu ma o le a avea o Ia ma ulu o le Ekalesia moni. I le Tusi a Mamona, sa vaai Nifae i le tina o Iesu, o Maria i se faaaliga vaaia, ma sa ia vaaia Iesu o faiaoga i tagata i le lalolagi. Sa aoao e le Tupu o Peniamina lona nuu e uiga i vavega o le a faatino-ina e Keriso pe a afio mai o Ia i le lalolagi.

I ni nai tausaga a o lumanai le soifua mai o le Faaola, sa tu ai le perofeta o Samuelu i luga o se



papui-pui e ta’u atu i tagata sa Nifae e uiga i faailoga o le a oo mai. Fai mai a ia a fanau mai le Faaola, o le a alia’e mai se fetu fou i le lagi. I le Feagaiga Fou e mafai ona tatou faitau e uiga i lena lava fetu—sa mulimuli ai le Au Makoi e saili le tamaitiiti o Keriso.

I tusitusiga paia, o loo aoao mai ai foi e perofeta e uiga i le Afio Mai Faalua o Iesu Keriso i le lalolagi. I le Tusi a Mamona, o loo molimau

mai ai Moronae i le toe foi mai o le Faaola. I le Feagaiga Tuai, o loo talanoa Malaki e uiga i le mea o le a tupu i aso mulimuli a o lumanai le Afio Mai Faalua.

O tusitusiga paia o loo i ai moli-mau a perofeta a Iesu Keriso mai le tele o taimi eseese i le talafaasolopito. I totonu o tusitusiga paia, e mafai foi ona tatou faitau ai e uiga i le faataitaiga a Iesu. E tatau ona tatou mulimuli i Lana faataitaiga a o tatou sauniuni mo le taimi e toe afio mai ai o Ia e toe soifua ai i le lalolagi.

GAOIOIGA

E mafai ona e faia lau lava tusi ata o le soifuaga o Iesu Keriso. Tipi ese ia ata i totonu o le itulau 65. Fai ni pu i luga o itulau taitasi i le mea o loo faasino atu ma faaputu i le faasologa ia itulau. Faaaoga le manoa e nonoa faatasi ai itulau i pupu. E mafai ona outou matamata ma lou aiga i lenei tusi i le taimi o afiafi faaleaiga ma talanoa e uiga i le soifuaga o le Faaola. ■


1



2




3




4



5



6



7



8



9





O Le Laau KERISIMASI

Saunia e Harriet R. Uchtdorf

Faatoa uma lava le Taua Lona Lua a le Lalolagi, ma o le toatele o tagata i Siamani sa tau leai ni meaai po o ni tupe. E le o toe tele ni vaiaso ona oo mai lea o lo’u aso fanau a o lei oo i le Kerisimasi. E lei i ai so’u faamoemoe e maua ni a’u meaalofa o le Kerisimasi po o le aso fanau, aua ua ou iloa lelei—e ui o a’u o se teineitiiti laitiiti—sa tauivi o matou matua e tau faafetaui mea autu matou te manaomia. I lo matou aai tele, sa i ai i taimi uma le fia aai. O se taimi faanoanoa ma le pogisa.

I le aso o lo’u aso fanau, sa ou te’i ma sa ou fiafia, i se meaalofa matagofie—mo na o au lava—sa

tuu i luga o le laulau i le umukuka. O le meaalofa aupito sili ona manaia sa mafai ona ou mafaufau i ai: o se tamai laau Kerisimasi *Weihnachtsbaum*, e na o le tasi le futu (30 cm) le maualuga, sa ufitia i meateuteu maaleale na gaosilima i pepa siliva iila. Sa atagia mai i pepa siliva iila le malamalama o lo matou potu malolo i se ala ofoofogia. Ina ua ou vailiilia ia meateuteu siliva iila, sa ou iloa ai ma le maofa tele sa faatumulia i fasilole suka susunu. Sa pei o se vavega. Pe o fea na aumai ai e lo’u tina si tamai laau lanumeamata laitiiti, o le pepa siliva iila, ma si nei suka?

E oo mai lava i le taimi nei, ou te le iloa pe na faapefea ona ia faia lenei vavega i se taimi sa leai se

mea o na mea taua na maua ai. O loo tumau pea i lo’u loto o se faatusa o le alofa loloto o o’u matua ia te au, o se faatusa o le faamoemoe, alofa, ma le uiga moni o le Kerisimasi.


I le vaitau o le Kerisimasi, o loo i ai lava i lo matou fale se laau Kerisimasi, ua teuteuina nei i moli eletise ma meateuteu o ituaiga eseese. A matou faatasitasi ma le ma fanau ma a latou fanau, e faamafanafanaina lo’u loto i le matagofie o le laau ma le feilafi o moli ma e toe aumaia ai i le mafaufau mea matagofie o se aiga fiafia sa aumaia e se tamai laau ma ona meateuteu siliva iila. ■

O Harriet R. Uchtdorf ua faaiipoipo atu ia Peresitene Dieter F. Uchtdorf, Fesoasoani Lua i le Au Peresitene Sili.

O Meateuteu e Gaosilima

Faafo lou aiga i le faia o ni au lava meateuteu gaosilima! O mea ia e te manaomia: o se tipi kuki e faafoliga i se tafaoga po o se ipuinu laitiiti se pepa maaa e pei o se kata po o se pepa malo e tusi ai savali penitala seleulu pepa alumini (pule oe pe fai pe leai) keli suavaia paepae peni maka (po o valiga’o po o penivali) vulu, lipine, po o se manoa

1. Lolomi le ata o le tipi kuki po o le ipuinu i luga o le pepa maaa.
2. Vaai se tasi o ou matua e fesoasoani ia te oe e tipi le ata lea.
3. Sasae se fasi pepa alumini ma faaoga e ufiufi ai le ata lea ua i le pepa. Keli pe faapipii i lalo pito o le pepa alumini i tua o le meateuteu. (Afai e te le o faaogaina le pepa alumini, faamisi le laasaga lea ae mulimuli i laasaga o loo totoe.)
4. Faasisina ni laina o le keli i luma o le meateuteu. Tuu se’i mago lelei le keli.
5. Faaoga maka e vali ai le va o laina o le keli. (Afai e te le o faaogaina le pepa alumini, e mafai foi ona e faaogaina valiga’o po o penivali.)
6. Vaai se tasi o ou matua e fesoasoani ia te oe e fai se pu i le tumutumu o le meateuteu. Tuu se fasi vulu, lipine, po o se manoa i totonu o le pu ma nonoa i le tumutumu.
7. Faatautau lau meateuteu i luga o le *Weihnachtsbaum* a le tou aiga pe foai atu e fai ma se meaalofo.





Tupe o La'u Misiona

Saunia e Spencer S.

Ou te iloa atonu e ese se faalogoga i lenei mea, ae sa ou teuina se tupe e totogi ai la'u misiona ae ou te lei fanau mai. Ina ua iloa e lo'u tina o le a fanau mai sana pepe, sa ia aumaia se atigi apa susu, faapu, ma faaigoa, "Tupe o le Misiona." Mai lava i lena aso, o matou teuina ma lo'u aiga se tupe mo la'u misiona.

O le teuina o le tupe mo la'u misiona sa avea o se taumafaiga faaleaiga. Ina ua ou fanau mai, o tagata uma lava o o matou aiga sa asiasi mai sa tuuina ni tupe Filipaina i le apa o le tupe o la'u misiona. A oo mai foi i aso malolo o le Kerisimasi ma le Tausaga Fou, sa aumai foi e tagata o le aiga ia te au ia tupe e faaopoopo i le tupe o la'u misiona.

O nisi taimi e aumai ai e o'u matua matutua ia te au se tupe pe a ou lelei i le a'oga ma tauvaga. E tuu foi na meaalofa i le tupe o la'u misiona. Sa i ai se taimi, ina ua ou mauaina ni pine o

taui, sa faitauina e le uso o lo'u tina ia pine uma lava sa ou mauaina ma ia tuu maia ia te au tupe mo pine taitasi. Ina ua uma ona totogi a'u sefuluai, sa tuu uma foi lena tupe i le tupe o la'u misiona.

Ina ua papatisoina a'u, sa tupu atili lo'u naunau e auauna i se misi-ona. Sa faatuina e lo'u aiga se sini e teu se tupe ia lava e totogi atoa ai la'u misiona. Ona ua i ai nei nai o'u tei, ua faaopoopo foi le tupe sa matou teuina i tupe o a latou foi misiona.

Ua iva nei o'u tausaga ma ua toeitiiti lava o'u au- lia le afa o tausaga ou te faamisiona ai. Ua faateleina lo'u naunau e auauna i se misiona aua ua ou iloa ua toatele naua tagata ua fesoa- soani mai i la'u tupe mo le misiona.

O le a ou teuina pea lava tupe mo la'u misiona. Ou te iloa o le a faamanuiaina au e le Tama Faalelagi ina ia mafai ai ona ou auauna atu ia te Ia o se faifeautalai i se aso. ■



O MATAUPU FA AVAE O LE FAATUATUA

O LE EKALLESIA A IESU KERISO O LE AU PAIA O ASO E GATA AI

*M*ATOU TE TALITONU I LE ATUA, le Tama Faavavau, ma Lona Alo o Iesu Keriso, ma le Agaga Paia.

2 Matou te talitonu o le a faasalaina tagata ona o a latou lava agasala, ae lē ona o le solitulafono a Atamu.

3 Matou te talitonu e ala i le Togiola a Keriso, e mafai ai ona faaolaina tagata uma, e ala i le usiusitai i tulafono ma sauniga o le Talalelei.

4 Matou te talitonu o uluai mataupu autu ma sauniga nei o le Talalelei: muamua, Faatuatua i le Alii o Iesu Keriso; o lona lua, Salamo; o lona tolu, Papatīsoga e ala i le faatofuina mo le faamagaloga o agasala; o lona fa, Faaeega o lima mo le meaalofa o le Agaga Paia.

5 Matou te talitonu e ao ina valaauina se tagata e le Atua, e ala i le valoaga, ma ala i le faaeega o lima o i latou o e o i ai le pule, e tala'i atu ai le Talalelei ma faia sauniga o i ai.

6 Matou te talitonu i le faatulagaga lava lea sa i ai i le Ekalesia Anamua, e pei o, aposetolo, perofeta, epikopo, aoao, tagata folafola le talalelei, ma isi tofiga faapena.

7 Matou te talitonu i le meaalofa o gagana, valoaga, faaaliga, faaaliga vaaia, faamaloloina o ma'i, faamatalaga o gagana, ma isi mea faapena.

8 Matou te talitonu o le Tusi Paia o le afioga ia a le Atua e tusa ma mea ua tonu ona faaliliuina; matou te talitonu foi o le Tusi a Mamona o le afioga ia a le Atua.

9 Matou te talitonu i mea uma na faaali mai e le Atua, mea uma ua la faaalia mai nei, ma matou te talitonu foi o le a la faaali mai le tele o mea silisili ma le taua tau i le Malo o le Atua i le lumanai.

10 Matou te talitonu i le faapotopotoina moni o Isaraelu ma le toefuataiga mai o Ituaiga e Sefulu; ma o le a faatuina Siona (le Ierusalem Fou) i luga o le konetineta o Amerika; o le a nofotupu lava Keriso i le lalolagi; ma o le a faafouina le lalolagi ma maua lona mamalu faaparataiso.

11 Matou te tautino atu ua ia te i matou le aia tatau matou te tapuai atu ai i le Atua Mamana e tusa ai ma o matou lava lotofuataiaifo, ma ua matou tuuina atu foi lea lava aia tatau i tagata uma, e faitalia i latou, pe faapefea, po o fea, po o le a foi le mea latou te tapuai atu i ai.

12 Matou te talitonu i le usiusitai i tupu, peresitene, faipule, ma faamasino, i le usiusitai, faamama-luina, ma le lagolagoina o le tulafono.

13 Matou te talitonu i le faamaoni, amiotonu, nofomama, agalelei, amiomama, ma le faia o mea lelei i tagata uma; e moni e mafai ona matou faapea atu, ua matou mulimuli i le apoapoaiga a Paulo—Matou te talitonu i mea uma, matou te faamoemoe i mea uma, ua uma ona matou onosai i mea e tele, ma ua faamoemoe o le a mafai ona matou onosai i mea uma. Afai o i ai nisi mea e mamā, matagofie, pe logoleleia, pe tauleleia, matou te saili atu i nei mea.

Iosefa Samita

O Se Isi Ituaiga Ese o Laau Kerisimasi

Saunia e Eliana Osborn

E faavae i se tala moni

“Ia outou amoina la’u amo, ma ia outou faaa’oa’o ia te au” (Mataio 11:29).

1. Sa sagisagi fiafia Carlos mo le Kerisimasi. Sa i ai se mea e ese i lo latou aiga i lenei tausaga. Sa faapipii i le faitotoa se laau telē e fai i pepa i luga lanumeamata.



2. Sa tau mafaufau Carlos po o le a se mea o le a ese ai. Sa taumanatunatu foi lona tuafafine o Araceli, ma lona uso laitiiti o Diego.

4. Sa fiafia Carlos i lona manatu. Sa tamoe Araceli i meateuteu ma aumai se penitala mumu.

3.



5. Manaia
lena. Pe mafai ona ou tusia
na faia e Iesu ni vavega se tele?


Matuai
lelei lava lena. E tofua lava
oulua ma ni aitia lelei tele!



6. O po uma pe a uma le 'aiga i le afiafi, e faia ai e Araceli ma Carlos se isi meateuteu ma tuu i luga o le laau. Sa fesoasoani Diego e ala i le faamatalaina atu ia i latou e alofa o ia ia Iesu.



7. Ina ua faigata ona mafau-
fau i nisi aitia, sa latou
sueina i tusitusiga paia.
Sa le'i iloa e Carlos e
tele naua fuaiupu
e uiga ia Iesu!



8. I le Po o le Kerisimasi, sa usuusuina ai e le aiga atoa ni pese ma faitauina ia meateuteu sa latou tuuina i luga o le laau. Sa fiafia Carlos aua sa ia iloina le tele o mea e uiga ia Iesu. Sa ia iloa ua saunia o ia mo l e Kerisimasi i lenei tausaga.



MAKA IA ESESEGA

O loo aoao tamaiti nei e uiga i le fanau mai o Iesu Keriso e ala i le faatinoina o mea sa

tutupu ina ua fanau mai Iesu. Vaai pe mafai ona e makaina ni eseese se iva o ata e lua.



ITULAU E VALIVALI



O LE TALA O LE KERISIMASI



Fesoasoani mo Matua

Faitau le tala o le uluai Kerisimasi i le Luka 2. A o e faitauina, fesoasoani i lau tama e faalogologo i mea na tutupu o loo faaalua i ata e lua ma faaavanoa se taimi e valivali ai e lau fanau ia ata.

Tala Fou o le Ekalesia

Faamanuiaina Peresitene Fou o Misiona ona o le Faaaogaina o le Faatuatua

Saunia e Heather Whittle Wrigley

Mekasini a le Ekalesia

Ia Iuni, e toa 128 peresitene fou o misiona ma o latou faletua sa valaaulia i le Nofoaga Autu e Aoao ai Faifeautalai i Provo, Iuta, ISA, mo le mauaina o aoaoga a o le'i tuuvaa atu mo o latou tofiga.

Sa tatalaina e Peresitene Thomas S. Monson le semina e fa aso, sa faagasolo mai le aso 22 o Iuni e oo i le aso 26, 2011, i lana saunoaga, “Ua filifilia outou mai ia i latou e sili ona faatuatua o le Ekalesia, ma o lenei ua outou maua le avanoa e o atu ai i le fanua o le seleselega a le Alii. . . . E leai se isi fanua ua ou iloa e sili atu le manogi sasala ma le tele o rosa nai lo fanua o misiona ua valaauina i ai outou.”

E o mai nei ulugalii mai itu uma o le lalolagi—i atunuu eseese e 22—ma o le a galulue i le lalolagi atoaga i gagana e 18. E eseese mea e malaga mai ai, ae peitai ua i ai se mea ua laugatasia ai i latou.

A o faia e nei peresitene fou o misiona ma o latou faletua ni osigataulaga e sauniuni ai faaletino ma faaleagaga, ua latou vaai na toetoe lava i le taimi lava lea ia faamanuiaga o le faaaogaina o le faatuatua.

Faia o Osigataulaga

O le auuaina ai o se peresitene o le misiona o se tofiga e tolu tausaga ma e luitauina ma faafiafiaina faaleagaga. O lo latou tuuto atu i lenei valaauga, ua toatele ai ulugalii ua faataatia ese o latou olaga tuai, e aofia ai a latou galuega ma aiga.

O le motusia o galuega e faigaluega ai, o nisi taimi o lona uiga o le le toe i ai o se tupe maua. E ui ina tuuina atu e le Ekalesia i peresitene o misiona sina alauni itiiti e ola ai, ae e masani lava ona i ai ni seleni a ulugalii lava ia e faaopoopo atu i lena alauni.

Ina ua maua e Marcus Martins ma lona faletua o Mirian mai Laie, Hawaii, ISA, lo laua valaauga i le Misiona a Pasila São Paulo i Matu, sa fautuina i laua

e Elder Jeffrey R. Holland o le Korama a Aposetolo e Toasefululua e faapea, o le a tataua lava ona i ai le ositaulaga, ae sa ia ta'u atu ia i laua e aua nei tele naua ni mea e ositaulagaina.

Sa foi le au Martins i le fale ma tatalo e fia iloa pe o le a faapefea ona la gafatia le tau mo le taliaina o lenei avanoa. Sa la faatauina atu a laua mea uma. “O le faamanuiaga—e tasi le aso sa ma faatauina atu ai mea uma,” o le tala lea a Sister Martins. “Sa o se vavega mo i maua.”

E le o tagata uma e ositaulaga i mea tautupe, ae o peresitene uma o misiona ma o latou faletua, o le a feagai ma se osigataulaga e tofotofoina ai le faatuatua po o le a lava le ituaiga.

Mo Gary ma Pamela Rasmussen o Tucson, Arizona, ISA, o le taliaina o le valaauga i le Misiona a Iapani Sendai o lona uiga o le tuua o le la fanua e toaono ma a latou fanua e 23.

Fai mai Sister Rasmussen, “Ou te iloa o le a sili atu le tausiga a le Tama Faalelagi o le fanua nai lo a'u. O lea ua ma fiafia ai e fai lenei mea ma maua lenei lagona o le a avea ma se faamanuiaga tele ia i latou.”

O le toatele o e ua taliaina le valaau e auuaina atu o ni peresitene o misiona ma ni soa o peresitene o misiona, ua faaalia lena uiga lelei o le naunau e ositaulaga.

“O isi taimi ou te mafaufau ai po o le a tonu le mea e ta'u o le ositaulaga, aua o isi taimi o lena mea e mafai ona faigata tele mo se tasi tagata ae e le o se mea faigata i le isi,” o le saunoaga lea a Peresitene Martins. “E tele taimi i o maua olaga . . . sa ma faapea ai, o le a ma faamuamua le Alii ma o le a ma faia soo se mea mo le Alii, o le a ma o i soo se mea. O lea ma te le mafaufau tele i ai e faapea o se ositaulaga. . . . O se faamanuiaga; o se faamamamuga le faataatia ese o mea uma.”



O Le Saunia

I le taimi a o le'i amataina e peresitene o misi-ona ma o latou faletua o latou tofiga faamisiona, e tele ni tapenapenaga faaleagaga ma faaletino e faia. O peresitene o misiona e masani lava e ono masina e maua ai le valaauga a o le'i oo i le aso e amata ai, peitai e i ai lava foi taimi e laitiiti ai se taimi e tapenapena ai. O Brent ma Anne Scott o Eden, Iuta, ISA, na valaauina e vaaiia le Misiona a Kanata Toronto, i le na o le toe tasi o le vaiaso amata le semina mo peresitene o misiona, ae toe lua masina ona amata lea o le la auanaga.

I le va o le ta'uina atu i uo ma aiga ma le taumafai e fai feutagaiga mo lo laua fale, sa la suesueina ai tusi lesona, faalogologo i CD, ma fai isi sauniuniga faaleagaga. Ae fai mai i laua, o le la sauniuniga maoae lava o le semina lea i le NAF.

“Ua na o se faatofuga faaleagaga i le malamalama,” o le saunoaga lea a Peresitene Scott. “O le i ai faatasi ma se vaega o tagata o e ua [ositaulaga e auuina i le Alii] ma le aoaoina e perofeta, tagatavaai, ma talifaaaliga . . . ua avea ma se tasi o aafiaga aupito maoae o o maua olaga.”

Aoaoina o le Poto

I aso e fa o le semina ia Iuni, sa fafagaina ai peresitene o misiona ma o latou faletua i savali mai le Au Peresitene Sili, ma nai isi sui o le Korama a Aposetolo e Toasefululua.

“A o matou faalogologo atu ia i latou, a o latou aoao mai i matou, [sa matou lagonaina] sa i ai iina le Alii, ma e manatu mai o Ia, ma o Lana galuega lenei, ma o Ana auuina nei, ma ua matou maua le avanoa o le o atu e fai ma sui o lo tatou Faaola,” o le tala mai lea a Sister Scott.

Sa faailoa atu e Elder Russell M. Nelson o le Korama a Aposetolo e Toasefululua ia nisi o ona faamoemoega mo peresitene o misiona ma a latou soa o le a o malaga atu i misiona.

Sa ia saunoa, “Ia outou maua le malosi lelei faaletino, faalelagona, ma faaleagaga [ma] ia faamanuiaina i le aoaoina, aoao atu, ma le faa-aogaina o aoaoga faavae a Iesu Keriso. O ou faamoemoega e aofia ai lo outou gafatia ona faa-aogaina le malosi o au paia; ia taulai atu i sauniga; [ma] ia tasi ma le Alii, ma tagata o le Ekalesia, ma na faifeautalai faapelepele ua tuuina atu i lau vaavaaiga.” ■

Sa auai peresitene fou o misi-ona i se fonotaga e fa aso o aoaoga faamasani i le Nofoga Autu e Aoao ai Faifeautalai i Provo, Iuta, ISA, a o le'i ulufale atu i latou i le galuega faamisiona.

E Toafitu Tamaitai Faifeautalai ua Faasusulu atu lo Latou Malamalama i le Misiona

O le Pleiades, po o le Au Uso e Toafitu, o se āoā fetu e fitu e matuai mamao lava, ma e 350 tausaga faatoa mafai ona taunuu mai le pupula o lo latou malamalama i le lalolagi.

O lo latou matutua e mai le vaitausaga o le tai luasefulu ma ona tupu e oo atu i le tai tolusefulu ma ona tupu, o lenei au uso o loo faasusulu atu lo latou malamalama i totonu o lo latou aiga ma i totonu o le misiona a o latou faasoa atu le talalelei i tagata i atunuu e lima.

O Marisol (Chile Osorno), Antonia (Atenitina Resistencia), Daniela (Costa Rica San José), Florencia (Honotura Comayaguela), Verónica (Chile Santiago Sasae), Anai (Aai o Kuatamala i Matu), ma Balbina Nava Aguilar (Atenitina Bahía Blanca) e mai Mekisiko ma o le taimi foi lea o loo latou auauna atu faamisiona ai mo le Ekalesia a Iesu Keriso o le Au Paia o Aso e Gata Ai.

O le feiloaiga muamua a le au uso

i faifeautalai o le AAG, o le taimi lea ina ua amata ona latou auai i vasega e le totogia o le gagana Peretania sa faia i se falelotu i le lotoifale. O le 2006 sa papatisoina ai i latou—faapea ma se tasi o o latou uso ma lo latou tuagane—. O o latou matua, o Albino Nava ma Isidra Aguilar, o e sa auai i le Ekalesia i le tolusefulu tausaga na muamua atu, sa toe toaaga mai i le Ekalesia i lena foi taimi.

Fai mai Sister Aguilar, ua mafai ona ia vaaia le oo mai o faamanuiaga i le auina atu o lana fanau teine e toafitu i ni misiona.

“O loo i ai i latou i aao o le Alii, o loo galulue, e talai atu Lana talalelei ina ia aumai ai ni agaga se toatele [ia te Ia],” o lana faamatalaga lea.

Fai mai Florencia, “Ou te alofa i lenei talalelei ma ou te iloa o le galuega e suia ai olaga. Ua suia ai lo’u olaga, ma o le a suia ai olaga o i latou ou te aoaoina.”

O le a amata ona toe foi atu le au uso i lo latou aiga i le faaiuga o le 2011. ■

E masani ona asiasi atu le Au Pulega Aoao i tagata o le Ekalesia i le lalolagi atoa. E mafai ona maua lipoti o la latou auaunaga i le news.lds.org faapea foi ma le, Ua Saunoa Mai Perofeta ma Aposetolo i le Aso i le prophets.lds.org i le gagana Peretania, Farani, Siamani, Italia, Potukale, ma le Sipaniolo. O nai tala pupuu nei o a latou faigamalaga lata mai nei.

- O le aso 26 o Me, 2011, sa saunoa ai Peresitene Dieter F. Uchtdorf, Fesoasoani Lua i le Au Peresitene Sili, i se aofia e toa 800 o taitai o alalafaga, pisinisi, ma ekalesia sa auai i le Usugafono i Los Angeles mo Mataupu o le Lalolagi, o se faalapotopotoga tutoatasi ua tuuto atu i le faalauteleina o le malamalama i mea o loo tutupu i le lalolagi. Sa saunoa Peresitene Uchtdorf e uiga i le tuputupu ae o le Ekalesia mai le 1830 e oo mai i le asō. Sue le “Uchtdorf, Los Angeles” i luga o le news.lds.org.

- O le aso 5 o Luni, 2011, sa faatututaina ai e Elder Russell M. Nelson o le Korama a Aposetolo e Toasefululua le Siteki o Moscow Rusia—o le uluai siteki lea i Rusia ae o le lona lua o siteki i le eria o loo aofia i le Soviet Union sa i ai muamua. E silia ma le 1,100 tagata sa auai. Sue le “Nelson, Moscow” i luga o le news.lds.org.

- O Me, sa asiasi atu ai Elder Jeffrey R. Holland o le Korama a Aposetolo e Toasefululua i Initia, Hong Kong (lea sa faatasi atu ai ma Elder David A. Bednar o le Korama a Aposetolo e Toasefululua), ona agai atu ai lea i Monokolia. Sue le “Holland, India” i luga o le news.lds.org.

- O le aso 15 o Luni, 2011, sa asiasi atu ai le Epikopo Pulefaamalumu o Epikopo H. David Burton i Higashi Matsushima, Iapani, e iloilole le tulaga o le atunuu talu mai le mafuie ma le galulolo i le aso 11 o Mati, ma mataitu fesoasoaniga alofa a le Ekalesia o loo ofoina atu iina. Sue le “Burton, Japan” i luga o le news.lds.org. ■



O lenei au uso e toafitu mai le Aai o Mekisiko o loo auauna atu i le taimi lava lea e tasi o ni faifeautalai faamisiona i vaega eseese o le lalolagi.

Faapaia le Nofoga o Ierusalemama mo Ata Tifaga

O le Nofoga o Ierusalemama mo Ata Tifaga, sa fausia e le Ekalesia mo le gaosiga o ata tifaga e faaautu i le talalelei, ua faapaia ma ua faaaogaina nei mo le pueina o ata tifaga. O loo faaaogaina muamua e fatufatu ai le Galuega Faatino o le Potutusi o Mau o le Feagaiga Fou—o se faasologa o vitio e faaalua ai vaai taua mai le soifuaga o Iesu Keriso ma Aposetolo.

O le tulaga o loo i le LDS Motion Picture Studio South Lotoa i Goshen, Iuta, ISA, e le atoa se 60 maila (97 km) i saute o ofisa autu o le Ekalesia i le Aai o Sate Leki. E le o se ata faatusa o Ierusalemama, ae o se toe fatufatuaiga o nofoaga taua o le aai.

Ua filifilia le nuu laitiiti o Goshen ona o le talitutusa o foliga o le eria o loo siomia ai i laufanua o Ierusalemama—o atumauga, laufanua valevalenoa, togavao o laau o le arasi, faupuega oneone, ma se auvai. O le Vaituloto o Iuta lea e lata ane i ai o le a avefa ma Sami o Kalilaia.

I nisi o vaega, o vaaiga e faaaoga ai le komepiuta, o le a faatumu ai faamatalaga e le o mafai ona maua i le nofoaga. ■

Suia Aiaiga Faavae mo Faifeau Faamisiona Matutua

Na faamaonia talu ai e le Au Peresitene Sili ma le Korama a



O le nofoaga fou mo ata tifaga a le Ekalesia i Goshen, Iuta, o le a faaaoga e pue ai vaaiga mai le soifuaga o Iesu Keriso e pei ona tusia i le Feagaiga Fou.

le Toasefululua ia suiga i aiaiga faavae e faatatau i le umi o auauauna a faifeau faamisiona matutua ma fale o faifeautalai ina ia uunaia ai nisi ulugalii se toatele e auauauna atu faafaifeautalai faamisiona ma ia faaleleia ai o latou tomai faafaifeautalai.

E amata atu i le aso 1 o Setema, 2011, ua mafai nei e ulugalii ona auauauna atu mo le 6, 12, 18, po o le 23 masina. Ma le isi, o se seleni o lona maualuga faatapulaa e \$1,400 (Amerika) i le masina ua faatulagaina mo le totogi o fale. O le a faaaauu pea

ona totogi e ulugalii ia meaai ma isi tupe faaalu mo mea e patino ia i laua lava.

I le taimi ua mavae, o le aiaiga faavae sa i ai, o ulugalii e auauauna i fafo atu o o latou atunuu e nonofo ai, sa valaauina e le ititi ifo ma le 18 masina. O i latou o e mananao e galulue i fafo atu o o latou atunuu e nonofo ai mo le ititi ifo ma le 18 masina ua mafai nei ona latou faia pe afai latou te totogia a latou lava feoaiga o le o atu ma le toe foi mai i le misiona.

O fesili e faatatau i faifeau faamisiona matutua e mafai ona auina atu i le seniormissionaryservices@ldschurch.org. ■

Ua Faateleina e le Ekalesia ia Gagana e Maua i le Initoneti

Ua faateleina e le LDS.org ia gagana ua maua. Talu ai nei na faaopoopo ai ni itulau faasino upu mo gagana fou e 48 i le uepisaite aloaia a le Ekalesia. O le kiliki i soo se gagana i lalo o le sootaga “Languages” i le tulimanu pito i luga i le taumatau o soo se itulau o le LDS.org, e mafai ai e tagata asiasi ona vaaia sootaga i tusi ma mea e faaoga a le Ekalesia o loo maua i le taimi lea i luga o le initoneti i lena lava gagana.

O le a iu ina maua vaega eseese o le LDS.org i gagana e 10 e oo i le 15. A oo i le tulaga lena, o le a aveese loa le itulau o le gagana mo na gagana. (Mo se faataitaiga, e leai se itulau gagana mo le faa-Peretania, Farani, Siamani, Italia, Potukale, po o le Sipaniolo, aua o na gagana ua uma ona i ai le tele o le LDS.org i a latou gagana.)

O loo galulue foi tagata faigaluega i le Ekalesia ia faia mekasini ma isi tusi ua faaliliuina mai le LDS.org ia maua i masini faaeletonika feaveai. ■

Ua Fofogaina Mai Maimoaga, Faapaia o le Malumalu o Quetzaltenango

Ina ia faamanatuina le faapaia o le Malumalu o Quetzaltenango Kuatemala, o le a auai ai le autalavou a le Ekalesia i le atunuu i se faaaliga o musika ma siva faaleaganuu i le Aso Toonai, 10 Tesema, 2011.

Ae o le Aso Sa, 11 o Tesema, 2011, o le a faapaia ai le malumalu i sauniga e tolu, lea o le a faasalalauina i iunite uma i Kuatemala.

A maea le faapaia, o le a tatalaina le malumalu mo sauniga i le Aso Lua, 13 o Tesema, 2011.

Ua Faamoemoe le Ekalesia e Fausia se Malumalu i Farani

Sa fofogaina mai e Peresitene Thomas S. Monson ia lulai e faapea, ua faamoemoe le Ekalesia e fausia sona uluai malumalu i Farani i se fanua i fafo ane lava o Pale.

Ua tele ni masina o galulue ai le Ekalesia ma taitai i le lotoifale.

Sa i ai ni isi taumafaiga sa faia muamua e saili ai se tulaga talafeagai mo se malumalu i Farani, peitai e leai se mea na faamautuina. O le au paia o le Ekalesia i Farani o loo moomoo e fia malaga atu i se malumalu, e masani lava ona malaga atu i atunuu Europa e tuaoi ane.

Faiga Fou mo Tususiga Paia e Faalogologo i Ai ua Faateleina Ai le Mauagofie

Ua faalauiloa mai e le Ekalesia se lomiga faalogologo o tusitusiga faavae o le AAG mo le siina i iTunes i le tusifaalogologo (e taua o le “faaleleia o ‘anoleo” i iTunes) po o le MP3.

O le lomiga faalogologo o tusitusiga faavae atoa o loo maua i le gagana Peretania ma le Sipaniolo, ma o loo maua foi lomiga faalogologo o le tusi fusetolu i le gagana lapani, Potukale, ma Korea.

Ina ia maua nei punaoa fou, au i le vaega o tusitusiga paia o le alaleo o le Ekalesia i le iTunes.lds.org. ■

Ua maua nei lomiga faalogologo o tusitusiga faavae i nisi o gagana i le iTunes.lds.org.



Sa Lofituina Au i le Agaga Faafetai

O Leo o le Au Paia o Aso e Gata Ai o se tasi lea o tusiga e muamua lava ona ou susue i ai i taimi uma e taunuu mai ai la’u mekasini i masina taitasi. Sa faapena se tulaga na i ai ina ua ou faitau i le tusiga “O Oulua o Agelu” (*Liahona*, Tes. 2010, 38). Sa lofia ai au i se mana tele faaleagaga, ma sa lofituina au i le agaga faafetai mo le misiona a lo tatou Faaola ma mo i latou o e o loo auaua ma le le manatu faapito i Lona suafa. Ou te faafetai tele ia Heidi Windish Fernandez mo le faasoaina mai o lona aafiaga matagofie.

Larry D. Kump, West Virginia, ISA

O Le Liahona Ua Faia ai se Eseesega

O savali o le *Liahona*, o taimi uma lava e lagolagoina ai au o se tagata, tamā, tane, ma se taitai, ma o lomiga o le konafesi aoao, e aumai ai se agaga faapitoa i totonu o lo matou aiga. Ou te okaina i taimi uma ia lomiga eseese mo a’u, o lo’u toalua, ma ou atalii taitoatasi ina ia mafai ona matou faitau ma faailoga savali pe a matou manao ai ma ia matou le feauauai ai i se mekasini e tasi. I le faaiuga o le tausaga matou te tuu faatasia ai mekasini ma auina atu ni mekasini faasili i uo e le toaaga pe le auai i le ekalesia. Ou te molimau atu ua faia e le *Liahona* se eseese i o matou olaga.

Fabio Allegretti Cooper, Pasila

Faamolemole auina mai sou finagalo faaalua po o fautuaga i le liahona@ldschurch.org. E ono faapupuina tala mo le uumi po o le manino. ■

O lenei lomiga e aofia ai tusiga ma gaoioiga e mafai ona faaoga mo afiifi faaleaiga. O nai faataitaiga nei.

“O La’u Auaua o se Tagata Nofofua o le Ekalesia,” itulau e 12: A uma ona faitau le tala a Sister Burdett, ia mafaufau e talanoaina faamanuiaga e oo mai mai le auaua atu i le Ekalesia. E mafai ona e valaaulia tagata o le aiga e faasoa atu se aafiaga aoga na latou maua a o auaua ai i se valaauga.

“O Le Filemu ma le Olioli i le Iloa o loo Soifua le Faaola,” itulau e 18: Mafaufau e fesili atu i tagata o le aiga po o le a se mea e mafai ona latou faia mo le Faaola i le tausaga a sau. Faitau ia parakalafa mulimuli o le tusiga i lalo o le “O La Tatou Meaalofa ia te Ia.” O le a le saunoaga a Elder Nelson, o le a le meaalofa sili e mafai ona tatou tuuina atu i le Alii?

“O Mai, Tatou Vivii ia te Ia,” itulau e 42: A o lei faia le lesone, ia filifili ma le agaga tatalo le vaega po o ni vaega e sili ona talafeagai i lou aiga. Afai e te filifilia le vaega e uiga i leoleo mamoe, atonu o le a e manao e faasoa atu le fautuaga a Peresitene Monson ia “aua nei e tolopoina le mulimuli i se musumusuga” ma

ia talanoaina ma lou aiga le taua o lenei saunoaga. Ina ia faali atu lenei manatu i tamaiti e laiti ifo, ia musumusu atu se faatonuga i o latou taliga, ma ia uunaia i latou e mulimuli i ai.



“Feiloai ia Uso Iosefa,” itulau e 58: Mafaufau e faali atu se ata o Iosefa Samita a o e faitauina le lisi o mea moni mai le tusiga e uiga ia te ia. Atonu e te manao e fai se taaloga pe a uma le lesone e iloa ai pe fia mea moni e mafai ona manatua e lou aiga.

“O Na Upu,” itulau e 60: A uma ona faitauina o se aiga le tala, ia mafaufau e talanoaina po o a ni faamatalaga e mafai ona fai atu e tagata o le aiga pe afai e faaoga e se tagata o latou i ai faatasi ia gagana mataga. Atonu e te manao foi e faamalalama atu i tamaiti laiti le mafuaaga ua poloaiina ai i tatou i le Esoto 20:7 e aua le ta’u fua le suafa o leova (tagai foi i le MF&F 63:60–64). ■

.....

Fefaasoa’i o Tala i le Liua ma le Agaga

A o ou i ai i se uarota a le autalavou matutua, sa ou fai afiifi faaleaiga faatasi ma lo’u aiga o le uarota. O se tasi o afiifi faaleaiga na sili ona matagofie sa ou auai, o se afiifi lea na taitai ai e faifeautalai faamisiona.

Sa valaaulia e alii faifeautalai ia nisi o tagata liliu mai o le matou uarota e faasoa mai tala o o latou liliuga. A o talanoa mai tagata liliu mai, sa le mafaafitia le i ai o le Agaga.

Ina ua uma ona faasoa mai ia tala, sa toe foi lo’u mafaufau i o’u lava aafiaga

faafaifeautalai—o se faifeautalai faamisiona ma se olaga atoa faafaifeautalai. Sa ou toe iloilo ina au lava faatinoga i le faasoaina atu o le talalelei i lea aso-ma-lea aso, ma faaauau ai pea ona ou manatunatu i ai i vaiaso na sosoo ai.

Ina ua tofia mulimuli ane au e taitai i le afiifi faaleaiga a le uarota, sa ou faia se nisi e faaauau pea mai lea taimi i lea taimi le gaoioiga “o le po o tala o le liua,” ma fesili atu i tagata eseese na liliu mai o le matou uarota ina ia auai. ■

Janna McFerson, Kalefonia, ISA

O LE MALAMALAMA O LE ALO

Saunia e Jeff S. McIntosh

I na ua mavae le tele o tausaga o faigaluega i faleoloa e faatau atu ai lavalava o tamaloloa, sa fai lava si o'u talenia i le faafetauia o ofutino ma fusiua i suti. O se tulaga faafiafiaina le pikiina o mea eseese ua fetau lelei, ma sa masani ona fiafia tagata sa ou tautuaina i mea ou te filifilia ma tuuina atu ia i latou.

Ae ui o lea, i se tasi faleoloa patino, sa tuu suti i se vaega e sesega vaivai lona faamalalamaina a o ofutino ma fusiua e faaali i se isi itu i lalo o matauila malolosi. O lenei eseese a i le malamalama sa faamaonia e fai lava si faigata.

O le mea na tupu i le tele o taimi, a uma ona filifili e se tagata se suti se tasi pe lua, ona ou alu lea filifili mai ni ofutino ma ni fusiua sa ou manatu o le a fetau lelei. Peitai, o le taimi lava e aveese mai ai ofutino mai se vaega ma tuu i autafa o suti, sa ofo i le mea e tulai mai—e “sui” ia lanu i le malamalama fou ma e matua le fetau lava.

O le aveina o se suti i le vaega o loo faaali ai ofutino ma fusiua e sili atu lena. Peitai e oo lava foi i lena faiga, e tele lava ina le mautonu tagata faatau, latou te matauina e le tutusa le foliga mai o suti o i o matou lima ma suti sa latou faatoa filifilia. O se suti sa foliga lanuvava i le malamalama sesega a o lea ua foliga faaefuefu, lanuenaena vaivai, po o le enaena malosi ina ua iloiloina i le malamalama malosi. O suti lanuuliuli, lanu paauli, ma lanuvaiuli, e faapena foi suiga.



E fesoasoani le malamalama tatou te iloa ai le upumoni—ma atili manino ai le vaai.

O le tele lava o taimi, ou te foia ai le faafitauli i lo'u aveina lea o tagata faatau i autafa o se faitotoa i le malamalama o le ao e tilotilo ai i ofu latou te filifilia. O le vaai i ai i le malamalama o le la, e vave lava ona iloaitino ai lanu moni ma faia ai filifiliga talafeagai.

I le lalolagi moni i fafo atu o le faleoloa, tatou te feagai ai ma filifiliga i aso taitasi. O nisi taimi e matafi ai na filifiliga e ala i mataupu a tagata. O isi e puaoa i faaosoosoga a lenei lalolagi. Atonu e le foliga sa'o i taimi uma ia filifiliga e tuu mai i o tatou luma, pe atonu foi tatou te fememea'i po o le fea e mao'i ae o le fea foi e leai. Atonu tatou te manatunatu pe faapefea ona iloaitino le mea e moni.

Ua ou iloaina o le vaifofo lava o le vaaavaai lea i na filifiliga i le malamalama, po o le faaitaiga, a le Alo, aua sa Ia folafola mai, “Ma o le a avea foi A'u ma o outou sulu i le vao; ma o le a Ou saunia le ala i o outou luma, e tusa ma tou tausiga o a'u poloaiga; . . . ma o le a outou iloa ai o a'u lava ua taitaia outou” (1 Nifae 17:13; faamamafa faaopoopo).

O le taumafai e filifili i le sulu moni, o le a fesoasoani tatou te faia ai filifiliga lelei mo o tatou aiga ma i tatou lava. O le vaavaai atu foi i le Atua e ala i le taitaiga a le Agaga Paia, o le a le faaseseina ai i tatou ae o le a iloaina le lelei mai le leaga (tagai Moronae 7:16).

A tatou faia filifiliga e mulimuli ia te Ia, ua folafola mai foi lo tatou Faola alofa o le a Ia faasoia mai ia i tatou Lona sulu: “O le mea e mai i le Atua o le malamalama lea; ma o ia o lē e mauaina le malamalama, ma tumau pea i le Atua, e mauaina le malamalama atili; ma o lena malamalama o le a tupu susulu malamalama tele pea lava pea seia oo i le aso e atoatoa ai” (MF&F 50:24). ■



I Aao o Maria, saunia e Simon Dewey

“Faauta, ou te alu atu i o’u lava, e faataunuu mea uma ia na ou faailoa atu i le fanauga a tagata mai le faavaega o le lalolagi, ma fai le finagalo o le Tama ma

le Atalii—o le Tama ona o au, ma o le Atalii ona o lo’u tino. Ma faauta, ua oo mai lava le taimi, ma o le po nei o le a tuu atu ai le faailoga” (3 Nifae 1:14).



Na tusia e Elder Russell M. Nelson o le Korama a Aposetolo e Toasefululua, “Ou te molimau atu o Iesu Keriso o le Alo paia o le Atua soifua. O le a Ia alofa ia te outou, siitia outou, ma faaali atu o Ia Lava ia te outou pe a outou alolofa atu ia te Ia ma tausi i Ana poloaiga (tagai i le Ioane 14:21). E moni, o loo viia pea o Ia e alii ma tamaitai atamamai.” Tagai i le “O Le Filemu ma le Olioli i le Iloa o loo Soifua le Faaola,” itulau e 18.